

IN DUAS
CELEBERRIMAS EPISTOLAS
SS.^M FIRMILIANI,
ET

CYPRIANI

ADVERSUS DECRETUM

S. STEPHANI PAPÆ I.

De non iterando Hæreticorum Baptismo.

DISPUTATIONES
CRITICÆ,

*Quibus unam, & alteram a Donatistis fuisse
confictam nunc primo demonstrat*

FRATER RAYMUNDUS MISSORIUS

FRANCISCANUS CONVENTUALIS


Pro Serenissima Veneta Republica Revisor Publicus;
Romanique Cœnobii S. Dorotheæ trans Tiberim
Alumnus.

*Quamquam non desint qui hoc Cyprianum prorsus non
sensisse contendant, sed sub ejus nomine a præsumpto-
ribus, atque mendacibus fuisse confictum. S. Augu-
stinus Epist. xcii. Ad Vincent. Rogat. al. xlviii.*



VENETIIS, MDCCCXXXIII.

Apud FRANCISCUM PITTERIUM Bibliopolam ad Signum
Fortunæ Triumphantis.
SUPERIORUM FACULTATE.



ILLUSTRISS.^{mo}, AC REVERENDISS.^{mo}

DOMINO

D. DOMINICO PASSIONEO

ARCHIEPISCOPO EPHESINO

SS. D. N.

CLEMENTIS XII.

PONT. OPT. MAX.

Praefato Domestico, & Assistenti, Eiusdemque, ac Sedis
Apostolicæ nomine apud S.C.C.M. Carolum VI.
Romanorum Imperatorem, atque Hispaniarum
Regem, & per universam Romani Imperii
ditionem cum facultate Legati de
Latere Nuntio.

FRATER RAYMUNDUS MISSORIUS

F.

QUæcunque iustis, gratisque Scripto-
ribus causæ unquam fuerunt multæ,
ac permagnæ, cur lucubrationes
suas Viris Principibus nuncuparent, his ego pror-
us adducor, ut Criticas hasce Dissertationes in
S.^m Cypriani, ac Firmiliani Epistolas tibi inscri-
bam.

bam Viro Clarissimo juxta ac Rev.^{mo} Sive enim spectes observantiam erga te meam; sive benevolentiam erga me tuam, sive argumenti novitatem, magnitudinem, atque utilitatem, respondent isthac humanitati, sapientiæ, atque amplitudini tue. Enimvero cohærerent omnia probe, ni unum deesset, quod tibi maxime inest, nimirum doctrina; quamquam ne hanc quidem defuturam confido, si quæ a me implexe, atque imperite sunt disputata, facundia tua illustraveris, eruditione confirmaveris, divinoque ingenio tuo pene ad vitam revocaveris. Ea quoque me spes magna recreat, quod expertus noverim, quantum suavissimo Cypriano delecteris, cujus adeo & eloquentiam prædicas, & admiraris doctrinam, & recolis sanctitatem. Ex quo illud spero confore, ut mea hæc vestigatio, si nihil aliud consequatur, nisi dubitationem tuam irritet, stimulosque Tibi ad suspicandum adjiciat, & SS.^m Cypriani, ac Firmiliani vendicias per te ipse dicas, tunc enim vero serio triumpharit. De me interim ita existimes velim Vir Rev.^{mo}, nil mihi optatius contingere posse, quam ut Deus Immortalis, qui te summo Ecclesiæ bono vocavit in Evangelium suum, diutissime sospitem servet, atque felicem.

*Venetiis ex Ædibus Magnæ Domus Kalendis Martii Anno Æræ Christianæ
C1515CCXXXIII.*

PRÆ.

P R Æ F A T I O.

DUram cepi provinciam, aleæque plena m,
 vendicias SS.^m Cypriani, ac Firmiliani
 in quorum nomine Rebaptizantium
 macula penitus jam insedit, atque inveteravit.
 Nondum nostræ excusæ erant dissertationes,
 quum homines, neque oscitantes, neque impe-
 riti, susceptum, vulgatumque argumentum
 nunc mordere clanculum, nunc etiam palam
 improbare. Sed causa erat ejusmodi, ut & be-
 nevolos objurgatores placare, & invidos vitu-
 peratores confutare possem; ut alteros reprehen-
 disse poeniteret, alteri se didicisse gauderent.
 Rebaptismum Cypriani, ac Firmiliani SS.^{is} Ec-
 clesiæ Patribus græcis, latinisque compertum:
 novam eorumdem defensionem Majoribus nostris
 per sæcula XIV. inexpertam, ac desperatam:
 subitam, inauditamque controversiam Criticis
 melioris notæ intentatam identidem objiciebant.
 Ego vero quum minime videbar, tum maxime
 reponebam; nam quod à viris doctis, atque
 eruditis talia jactari persentiscerem, acutiores id
 mihi quidem stimulos adjecit ad causam jam
 tum inceptam accuratius pertractandam; quod

an reapse præstiterim iidem ipsi nunc videant , qui antea præpostere judicabant . Neque enim me tanti amo , ut sententiam meam sapientum iudicio anteferri velim , quandoquidem non rixandi libidine , sed veri inquirendi studio ad hanc disputationem accessi . Sed si in eo disputo , argumenti novitatem non eam mihi visam fuisse , quæ me ab incæpto revocaret , nemini sim injurius ; siquidem ex Tullio jampridem didiceram , apud animos anteceptos *tantum opinionem præjudicatam potuisse , ut etiam sine ratione valeret auctoritas ... Non enim [proxime prædixerat] tam auctoritatis in disputando quam rationis momenta quærenda sunt . Quin etiam obest plerumque iis , qui discere volunt , auctoritas eorum , qui se docere profitentur ; desinunt enim suum iudicium adhibere : id habent ratum , quod ab eo , quem probant , iudicatum vident* : Tametsi non video ecquam mihi auctoritatem firmam , ratamque objicere possint ad confirmandam Cypriani , ac Firmiliani jactatam de Anabaptismo sententiam Augustinus enimvero dubitat , qui , quum affirmat , in hypothesis hoc agit Donatistarum : Eusebius imponit : Reliqui vero , qui Eusebium , atque Donatum sunt consecuti , tum græci , tum latini Scriptores , Basilius , Hieronymus , ac Vincentius Lirinensis , aliique bene multi , illi ab Eusebio decepti sunt ; hi vero à Donatistis .

Qui autem requirunt , ecquæ mihi oblata sit occasio ad hanc suspensionem concipiendam , maturandamque , curiosius id faciunt , quam necesse

se est. Sed tamén libet eorum obsequi voluntati. Ante annos sex, quam hæc dissertationes elucubravi, Diatribam paravi, in quæ S. Cypriani mentem de Romani Pontificis primatu expendendam susceperam, quam in Acroases distributam in frequenti literatorum hominum cœtu stas Academiæ temporibus Venetiis pronunciaui. Jamque illam in lucem prodere cogitanti, visum est accomodatum hominem mihi amicissimum, atque ut si quis alius, eruditissimum sciscitari: an quispiam alter ante me hoc ipsum super Cypriano sibi sumisset? Negavit vir rei librariæ peritissimus, is erat Thomas Maria Minorellus Ord. Præd. Bibliothecæ Casanatensis primarius Custos, quem ego pietatis, & honoris causa nomino. Placuit responsum; sed magis profecto displicuit, quod inter percurrendum Pamelii notas ad Epist. LXXI. offendi. Didici namque ex Pamelio, exactissime hac de re scripsisse Remundum Ruffum contra Molinæum. Sub hæc hyeme ineunte in periculosum, gravissimumque morbum incidi, quo in dies ingravescente, omnique salutis significatione subblata, Medici vitæ meæ desperarunt. Quod ut ego intellexi, veritus, ne posthumam Diatribam, jam tum a nonnullis expetitam, fraternalis amor evulgaret; neve eruditi homines me actum egisse jure contenderent, sodalem mihi carissimum, qui mihi semper aderat, rogavi, ut illam quantocius posset ex scripturis compluribus fecerneret, ac flammis traderet. At ille

ho-

hominem Theologum mei amantissimum con-
 venit, eique rem aperuit. Hic illico ad me ac-
 currit: quid hoc sit? rogat. Ego contra ut mo-
 rienti morem gereret maximopere postulare.
 Spopondit Vir humanissimus: ne multa, com-
 buisset. Verumtamen Dei Immortalis beneficio,
 qui non appendit peccata mea, nec misericordiam
 suam abstulit a me, & præcipua BB.^m Johan-
 nis Nepomuceni, & Andreæ de Comitibus ope,
 servatus sum. Convalui: quum primum, vi-
 ribus utcumque instauratis, licuit, instructiores
 Venetas Bibliothecas excussi, Ruffumque diu,
 cupideque conquisitum deprehendere non valui.
 Si tum consilii mei valde me pertæsum dicam,
 non mentiar. Multa animo obversabantur, quæ
 me facti pœnitere obstringebant, quæ ipse jam
 morti proximus, nec reputavi, nec si reputassem
 discernere potuissem. Recudendum erat opus;
 neque enim quicquam aliud supererat præter
 quam notæ marginales per me appositæ ad codi-
 cem Editionis Parisiensis ex recensione Erasmi.
 Sed nec aliud succurrebat exemplum; confusum
 saltem, tritum, incompositum. Ita enim factus,
 comparatusque sum, ut semel scripta nunquam
 exscribam. Mens erat Diatribam iterum adornare;
 sed quæ mihi demandata fuerat a Viris
 Amplissimis Nobilissimorum Adolescentum in-
 stitutio, non distrahebat modo, verumetiam
 distinebat; atque adeo, ut de Cypriano cogi-
 tare ne quidem sineret: tantum erat in exi-
 guo opere & laboris improbi, & maximæ
 fol-

sollicitudinis; sed Deo favente multo maxima ex parte remissus est labor. Quamobrem in tempore ad Cyprianum meum reversus sum, & quidquid ex publicis, privatisque officiis temporis superfuit, BB.^{mo} Magistro meo lucubentissimus litavi. Tum demum intellexi, nodum plane herculeum, quo adeo involuta est Cypriani mens de Romani Pontificis primatu in quatuor potissimum locis situm esse. In duabus primum Epistolis, quæ extant inter Cyprianicas, nimirum in Epistola ad Pompejum, nec non in Epistola S. Firmiliani ad Cyprianum: deinde in conclusione Epistolæ ad Jubajanum, & in præfatione ad Concilium Carthaginiense. Quorum ego confictionem ut pridem olfeceram, ita rem pernecessariam, & Catholicæ Ecclesiæ salutarem me facturum existimavi, si eorum confictionem medullitus primo introspicerem, deinde compertam in medium afferrem; an etiam sim consecutus? judicium esto eorum qui sapiunt. Dissertationem in Epistolam Firmilianicam, quæ ordine posterior est, præpostere sed consulto in priorem collocavi, tum quod ab ea, quæ minus difficilis visa est, initium excipiendum fuit, tum quod viam sternat ad alteram, quæ sub SS.^{mi} Cypriani nomine incredibili calliditate a Donatistis conficta fuit. Alteram in Epistolam ad Pompejum methodo plane mathematica adornavi, quod universam, quæ agebatur causa, complecteretur, quæ propterea severiori stilo pertractanda fuit. Neque vero id mihi tantum

constitueram , ut ea subverterem , quæ Romani Pontificis Primatui quoquo modo adversabantur , vcrum & illud insuper erat propositum , ut **BB.^m** Carthaginensem Episcopum , eximiumque Doctorem , turpi , qua ille Donatistarum fraude Rebaptizantis macula notabatur , in tempore liberarem . At istuc neutiquam consequi poteram , si reliquas adversus baptismum hæreticorum Epistolas , quæ Cypriano adjudicantur , omnino præterissem , quas iccirco percurri universas , verius quam expendi , quod longiori disquisitione opus non esset , quippe quæ eadem sanie inficiantur ac duæ superiores .

Itaque simul atque ad Cypriani vendicias animum adjeci , ipso in limine intellexi , magnam hujuscemodi inquisitionis partem duosenimvero fuisse Sanctos Ecclesiæ Patres , Opatum Milevitanum , & Augustinum , qui ut sapientissime , ita & fute , atque ex instituto Ecclesiæ causam adversus Donatistas dixerunt . Jam tum audieram Veronæ Typis Tumarminianis Historiam Donatianam excudi , opus posthumum Em.ⁿⁱ Norisii , multis & sane præclaris additionibus Fratrum Ballariniorum , quam paullo post acceptam cupidius , ac sedulo evolvi ; sed nihil admodum ex ea lectione subsidii sum consecutus , quod Auctor doctissimus historici fines non prætervehatur ; nec hypotheticum S. Augustini systema ab absoluto secernat , quemadmodum ipse ex repetita S. Augustini lectione aperitissime deprehenderam . Quamobrem potius
quam

quam rivulos consecrari, certum fuit ad fontem reverti, quem ego non ingurgitavi, sed sorbilavi; innumeris propemodum SS.^m Optati, atque Augustini præsertim testimoniis hac illac labore improbo comparatis, quibus Donatistarum, eorundemque Patrum systemata in ea ipsa causa me affecutum fuisse non diffido. Eorum pleraque si in Donatiano systemate explanando ad verbum adduxissem, tricipiti locutione Lectores meos obtudissem, ejusdemque Theorematis intellectum vehementer perturbassem - nam identidem in una eademque sententia struenda, alterum ab Augustino verbum sumendum erat, alterum ab Optato; mihi vero, qui perspicuitati, quantum potui, perpetuo studuerim, consultius visum est historię quidem sanctissime subservire, sed institutam locutionem, quoad licuit, non abrumpere. Reliquum erat, ut loca illa, unde hæc excerpseram ad hoc ipsum Theorema confirmandum, adducerem, at res in idem recidebat; si enim in ipsum Propositionum contextum infererentur, mira lectoribus gignebatur perturbatio, quod singulis pene verbis apponenda fuissent; si ad marginem, sed neque id fieri potuit; tam multa erant, tamque densa. Propterea nec infra paginam collocare libuit [veluti non semel egi in Theoremate de Augustini systemate, ne orationem Augustinianis verbis continuatam locorum indicatione inturbarem;] tum quod expertus didicerim vix unum, aut alterum id sibi sume-

re , ut ea conferat quæ comperta sunt ; Tum quod puerilem quamdam referat ostentationem id confirmare , de quo nihil quicquam dubitatur ; Tum etiam quod nemo unus ignoret huiusmodi incuriam positam esse in more , institutoque historicorum. Ad hæc non diffiteor , multa me de meo adiecisse , quæ historiam fugiunt ; nam quid aliud agendum succurrebat homini non tam historicum , quam polemicum agentis ? nisi illud erueret , quod susceptam causam spectabat , quodve necessario ex rerum gestarum narratione , & collatione consequeretur.

Jam prior in Epistolam Firmiliani excusa erat Dissertatio , quum eam sic excusam recensens , duo offendi , quorum alterum retractare libet , alterum explanare . Primum quod dixerim ad Not. XVI. Cap. II. ad Provinciam Ponti utpote proconsularem , non Præsidem , sed Proconsulem legari consuevissime , quemadmodum & Prætores ad Prætorias , retracto , & expungo ; siquidem non uno confirmari potest exemplo Præsidis nomen Proconsulibus , ac Prætoribus nullo discrimine attribui . Deinde , quod pseudo-Firmiliani in Stephanum maledicta summam colligens , affirmaverin : Stephanum a pseudo-Firmiliano nedum hæreticis pejorem , sed & hæreticum appellatum ; distingui oportet . Non quidem directe , atque expresse hæreticum appellari , sed per necessariam dumtaxat consecutionem , colligo ex postrema ejusdem Epistolæ sententia . Et tamen *non pudet Stephanum.... Cy-*
pria-

prianum pseudo-Christum, & pseudo-Apostolum, & dolosum operarium dicere? Qui omnia in se esse conscius prævenit; ut alteri ea per mendacium objiceret, quæ ipse ex merito audire deberet. Pseudo-Christi & pseudo-Apostoli appellatio fynonyma est cum hæreticorum appellatione ex usu loquendi SS.^m Patrum, Cypriani præsertim. Atqui pseudo-Firmilianus per summam injuriam pronunciavit: *Stephanum hæc ipsa ex merito audire debere*; affirmavit igitur: Stephanum jure meritoque pseudo-Christum, & pseudo-Apostolum appellari potuisse, ac perinde hæreticum etiam ex consequenti appellavit.

Videar fortasse nonnullis nec satis cautus, nec satis accuratus, qui doctrinam de Divina, & Apostolica Traditione, quæ Epistola ad Pompejum continetur, Catholicæ non prorsus consonam, ad trutinam non revocavim. At ego compertum habeo consilium Viri doctissimi, meique tum Ordinis, tum studiorum carissimi Sodalis Paulli Antonii Agellii adversus hæreticam pravitatem Inquisitoris, qui præclarum opus de Traditionibus molitur, cui iccirco uberrimam hanc, latissimamque Provinciam officiose, lubenterque concedo.

Quotiens veras aut suppositas S Cypriani Epistolas adducere oportuit, secutus sum, non nuperum, sed Pamelianum ordinem; quod mihi non tam vehemens causa subesset, aut illum servandi, aut hunc invertendi.

Quocunque res evaserit, satis mihi fecisse arbi-

VIII.	<i>Tum Sancti Augustini.</i>	ibid.
IX.	<i>Post Donatistarum.</i>	24
X.	<i>Tum ipsius S. Cypriani.</i>	25
XI.	<i>Postremo Concilii Carthaginensis III; quod post acceptam Firmiliani epistolam celebratum ostenditur triplici argumen- to.</i>	26
XII.	<i>Primum ex Epistola Synodica ad Stepba- num.</i>	28
XIII.	<i>Secundo ex Epistola S. Cypriani ad Ju- bajanum.</i>	30
XIV.	<i>Tertium ex Concilio III. Carthaginien- si.</i>	32
XV.	<i>Ab hypotheticis argumentis proceditur ad absoluta, atque illud statuitur, nullam fuisse apud Orientales Patres disputationem su- per baptismo, qui cum SS.^{me} Trinitatis in- vocatione ministrabatur.</i>	37
XVI.	<i>Nullamque Stephano cum Orientalibus Episcopis super ejusmodi baptismo conten- tionem.</i>	39
XVII.	<i>Occasione hæresis Cataphrygum, & Paul- lianistarum historia de Orientalium, atque Afrorum Anabaptismo ab Eusebio Cæsarien- si conficta. Eusebius ante, & post Nicænum Concilium I. Arianorum significat.</i>	40
XVIII.	<i>Quid sibi Eusebius proposuerit in hujusce historiæ confictione referatur.</i>	43
XIX.	<i>Aperitur & altera causa peræque gravis, quæ Eusebium adducere potuit, ut banc hi- storiam confingeret.</i>	44

- XX. Concilium Nicænum I. Canone VIII, &
 XIX. nihil directe & expresse de Novatianensium, illisque affinium Hæreticorum baptismo decrevit. 46
- XXI. Per Nicænum Concilium Donatiano schismati nihil provisum. 47
- XXII. Insignis Augustini locus pro Nicæni Concilii contra Anabaptismum sanctione adducitur, sed ad I. Arelatense multis, magnisque momentis refertur. 49
- XXIII. Qui Augustini locum de Nicæno Concilio interpretantur, ejusdem eximii Doctoris auctoritatem, & doctrinam enervant. 50
- XXIV. Qui Concilium plenum ab Augustino enunciatum ad Nicænum traducunt, neque Augustini mentem, neque Arelatensis Concilii finem assequuntur. Cardinalis Norisii effugia præcluduntur. 54
- XXV. Arelatense I. plenum fuisse affirmatur. 62
- XXVI. Pergit Arelatense I. plenum, & æcumenicum demonstrare. 67
- XXVII. Arelatense I. non minus plenum quam Nicænum. I. 78
- XXVIII. Arelatense I. non minus plenum quam CP.^{num} I. 80
- XXIX. Arelatense I. magis plenum quam C. P.^{num} I. 82
- XXX. Idque potiori jure. 84
- XXXI. Ex Conciliarium sanctionum ordine eruitur numerus, ac tempus controversiarum
 c su-

super baptismo hæreticorum ; nullamque in sensu Donatiano in Oriente ante Nicænum habitam fuisse concluditur. 86

XXXII. *Difficultati ex S. Basilii auctoritate petitiæ satisfi.* 88

C A P U T II.

Exemplum Epistolæ ad Cyprianum. 90

Notæ in hanc Epistolam Criticæ.

Not. I. *Epistolæ exordium inhumanum* 112

Not. II. *S. Stephani cum Juda horrenda comparatio.* 113

Not. III. *Conjungit ex Veteri Testamento, quæ ab hoc non traduntur.* ibid.

Not. IV. *Repugnantia sententiarum.* 114

Not. V. *Inanis Repetitio.* ibid.

Not. VI. *Nuntii festinatio furias avertit.* 115

Not. VII. *Novi Testamenti supina inscientia.* ibid.

Not. VIII. *Affectata eruditio. Cerebrosa conjectura. Anacronismus.* 117

Not. IX. *Romane Ecclesiæ Traditionem calumniatur, damnatam hæresim tuctur. Falsa narratio.* 118

Not. X. *Confidentius negat quod non solum gravibus conjecturis affirmatur, verum etiam longe probabilius verum est.* 121

Not. XI. *Mendacium de pace a Stephano cum Afris intercepta.* 123

Not. XII. *Crimen suum alteri affingit.* 125

Not. XIII. *Anacronismus. Pagii responsum exsufflatur.* 126

Not.

- Not. XIV. *Absurda argumentatio.* 133
 Not. XV. *Ex Cypriano mutuata animadversio.* 134
 Not. XVI. *Suspecta eruditio.* ibid.
 Not. XVII. *Aut sententiæ falsitas, aut verborum repugnantia.* 135
 Not. XVIII. *Nimium philosophatur.* 136
 Not. XIX. *Suspecta nominatio.* 137
 Not. XX. *Ridicula exprobratio.* ibid.
 Not. XXI. *Injusta indignatio omnino Christiano homine indigna.* 138
 Not. XXII. *Schismaticus contemptus.* 139
 Not. XXIII. *Vera impudentia in falsa exprobratione.* 140
 Not. XXIV. *Atrocissima debacchatio.* ibid.
 Not. XXV. *Locus ex græco textu non probat banc epistolam e greco translata.* 141
 Not. XXVI. *Pergit debacchari.* ibid.
 Not. XXVII. *Assumptio falsa.* 142
 Not. XXVIII. *Contumelia in Stephanum eo insignior, quo iniquior.* ibid.
 Not. XXIX. *Ironia ad iracundiam composita.* 143
 Not. XXX. *Impudens mendacii repetitio.* ibid.
 Not. XXXI. *Mendacium ampliatum.* ibid.
 Not. XXXII. *Ridicula occupatio.* 144
 Not. XXXIII. *Ignotum crimen Stephano improperatur.* 145
 Not. XXXIV. *Mendacissime Stephanus in Cyprianum contumeliosus perhibetur.* 146
 Not. XXXV. *Epiphonema christianæ caritatis præceptis repugnans.* 147

CAPUT III.

Argumenta adducuntur, quibus Firmiliani auctoritas huic Epistolæ vendicari possit, & singillatim confutantur.

- I. *Argumentum, quod ex Augustino desumi posset lib. 3.^o Cont. Crescon. cap. I. occupatur, & convellitur.* 148
- II. *Argumentum eo vergit, ut Firmilianum male-dici labe absolvit, tum excandescentiæ obtentu, tum Sanctorum Virorum dictis, & exemplis Hieronymi præsertim, Basilii, ac Bernardi.* 150
- III. *Argumentum ex Baluzio, neminem dubitasse, an hæc Epistola sit vera.* 165
- IV. *Argumentum ex summa consensione omnium Adnotatorum, atque Illustratorum operum S. Cypriani.* 167
- V. *Ex Baluzio, non esse tenebris damnandum tam illustre Antiquitatis monumentum.* 168
- VI. *Origenis, ac Tertulliani sententia in suspicionem vocat Anabaptismi Firmilianum ex Orientalibus, & Cyprianum ex Afris.* 771
- VII. *Ex XXVI codicibus. MS.* 174

SYNOPSIS

DISPUTATIONIS II.

Exemplum Epistolæ ad Pompejum 178

Ad Systema Donatistarum.

Axioma I. *Disputantes ob pertinacem opinionem omnia invertunt.* 188

Axioma II. *Ob pertinacem opinionem disputantes unum, eundemque Auctorem in una eademque re damnant, ac probant.* 190

Ad S. Augustini Systema.

Axioma I. *Nemo unus Scriptorum est, cujus Systema ad Hypothesim non deficiat* 191

Axioma II. *Principes Theologicæ scholæ Magistri magnam partem sunt hypothetici.* 195

Axioma III. *Historici ipsi ad Hypothesin quandoque confugiant.* 197

Ad S. Cyprianum.

Axioma I. *Quicquid præcipue cujuspiam Scriptoris virtuti repugnat, suppositum habendum est.* 199

Axioma II. *SS. Scriptorum stilus non tam ex locutionis caractere, quam ex charactere personæ ducendus est.* 202

Axioma III. *Si quidpiam in Scriptoribus occurrat, quod illorum sententiæ pluries, ac serio propositæ adversetur, suppositum est.* 204

Ad S. Optati Milevitani systema.

Axioma I. *Argumentum ab Auctoritate negan-*

ganti in questione facti, nisi obstat locus
affirmans æque auctoritatis plurimum pro-
bat. 205

Axioma II. Si duo Scriptores æque dignitatis
unam eandemque causam pertractent, al-
ter absolute, alter vero in bypothesi, præfere-
ndus est is qui absolute ei, qui in bypothesi. 206

T H E O R E M A I.

Ex Donatistarum systemate Cypriani ad Pom-
pejum Epistolæ confictionem referare. 210

*Propositio I. Calumnia donatiana sectæ firma-
mentum. ibid.*

*Prop. II. Donatistæ calumnias suas ad systema
redegerunt. 212*

*Prop. III. Nihil magis Donatistæ affectabant
quam morum Sanctitatem. 215*

*Prop. IV. Nihil tam alienum a Donatistis quam
morum sanctitas. 217*

*Prop. V. Donatistarum falsa doctrina, & mo-
dica scientia. 219*

*Prop. VI. Donatianum Systema Impenetra-
bile. 221*

*Prop. VII. Incomprebensum Donatistarum Sy-
stema referatur. 224*

*Prop. VIII. Donatiani systematis ordo admira-
bilis. 239*

Prop. IX. Loci ratio explicatur. ibid.

Prop. X. Temporum ordo recluditur. 241

Prop.

Prop. XI. <i>Rerum series expenditur.</i>	243
Prop. XII. <i>Personarum dispositio proponitur.</i>	244
Prop. XIII. <i>Donatiani Systematis fastus, progressus, ac perniciēs recensentur.</i>	245
Prop. XIV. <i>Donatistarum pertinacia incredibilis.</i>	246
Prop. XV. <i>Terribilis Donatistarum astutia, & fallaciloquentia.</i>	248
Prop. XVI. <i>Donatistæ antiqua depravant monumenta.</i>	250
Corollarium. <i>Ex XVI. adductis, probatisque propositionibus assertum Theorema concluditur.</i>	252

T H E O R E M A II

Ex vero S. Augustini adversus Donatistas Systemate Epistolæ ad Pompejum falsitatem demonstrare.

Prop. I. <i>Augustinus refugit facti quæstionem, perstat in quæstione juris.</i>	264
Prop. II. <i>Augustini systema in facti quæstionibus contra Donatistas hypotbeticum est, non absolutum.</i>	267
Prop. III. <i>Augustini sententia de mente Cypriani hypotbetica est, non absoluta.</i>	268
Prop. IV. <i>Epistola ad Pompejum utriusque systemati repugnat.</i>	270
Prop. V. <i>Augustinus de mente Cypriani agens, hypotbeticum systema proficitur.</i>	271
Prop.	

Prop. VI. *Augustinus dubitat de literis, & facto Cypriani.* 272

Prop. VII. *Antilogia Cyprianica per Augustinum demonstrata Augustini systema in hypothese affirmans transfert ad absolutum negans.* 280

Corollarium. *Ex hypothetico S. Augustini systemate Epistola ad Pompejum confecta concluditur.* 282

THEOREMA III.

Ex libris S. Optati Milevitani assertæ confictionis suspicionem confirmare.

Prop. I. *Summum, atque perpetuum S. Optati de Cypriano silentium in questione de Re-baptizatione.* 287

Prop. II. *S. Optati bistorta de rebus Donatianis in magna apud ipsos Donatistas existimatione.* 290

Prop. III. *Optatus ipse in facti, & juris questione suas habet hypotheses.* 292

Corollarium. *Ex tribus adductis, confirmatisve propositionibus S. Cypriani innocentia, in jure, atque in facto concluditur.* 293

T H E O R E M A IV.

Ex nonnullis aliis vetustissimis Scriptoribus S.
Cyprianum Rebaptismi macula liberare .

- Prop. I. *Profundum Pontii de Cypriani Rebaptismo silentium.* . 295
 Prop. II. *Anonymi Tractatus adversus Rebaptizantes sententiam de Cyprianico Rebaptismo commentitiam demonstrat.* 300
 Prop. III. *Eusebii narratio de Cyprianico Rebaptismo repugnat cum Afrorum Traditione.* 311
 Prop. IV. *Ruffinus in facto Cypriani discrepat ab Eusebio.* 318
 Prop. V. *Summum, ac diuturnum Donatistarum, & Catholicorum ante S. Augustinum de SS. Cypriano, ac Stephano silentium.* 320
 Corollarium. *Ex hac tenus adductis Scriptoribus Cyprianus Rebaptismi macula liberatur.* 322

T H E O R E M A V.

Concilii Carthaginensis III. confictionem demonstrare .

- Prop. I. *Hujusce Concilii absurditas generatim attingitur.* 323
 Prop. II. *S. Augustini vehemens de hujus Concilii veritate dubitatio.* 326
 d Prop.

- Prop. III. *Concilium Carthaginense III. non
concurrit cum Epocha Pontificatus S. Ste-
phani Papæ.* 328
- Prop. IV. *Præfationis ad Concilium Carthagi-
nense, aliis III, nobis IV. octo loca. exscri-
buntur, totidemque criticis notis singulatim
oppugnantur.* 357
- Prop. V. *Conclusio Epistolæ ad Iubajanum expen-
ditur, & confectiois arguitur.* 369

T H E O R E M A VI.

Epistolam ad Pompejum, ceterasque super ba-
ptismo hæreticorum, ex earundem con-
textu confectas probare.

- Prop. I. *Communia hujusce Epistolæ absurda
generatim attinguntur.* 383
- Prop. II. *Epistolæ ad Pompejum absurda spe-
ciatim referantur, & ad certa capita re-
diguntur.* 384
- Prop. III. *Stephani Decretum expenditur, confi-
ctumque demonstratur.* 385
- Prop. IV. *Pseudo-Cypriani secum, & cum vero
Cypriano Antilogia proponitur.* 391
- Prop. V. *Reliquæ de Hæreticis baptizandis Epi-
stolæ strictim, cursimque expenduntur, &
confectiois postulantur.* 405

THEOREMA VII.

Momentorum, quæ adversantur explosione,
sententiam nunc demonstratam confirmare,
& concludere.

Prop. Unica. *Pro Epistola ad Pompejum ceterisque Cypriano adjudicandis, septem adducuntur argumenta, & singulatim refelluntur.* 413

I. *Ex libello ad Novatianum.* ibid.

II. *Ex Canone VIII Synodi Arelatensis I.* 416

III. *Ex Tractatu Anonymi adversus Rebaptizantes.* 419

IV. *Ex illustri Exemplo S. Columbani.* 421

V. *Ex Epistola LXXVII. S. Cypriani ad Martyres in metallo.* 427

VI. *Ex lib. 5. S. Augustini cont. Donatistas cap. I.* 428

VII. *Ex præcipuo, quod per hæc literas summæ Romani Pontificis potestati in universam Christi Ecclesiam offertur præsidium.* 429

Quum Auctor consultius existimaverit, si per se ipse hæc opuscula in prælo corrigeret, id quidem præstitit gravioribus causis; verum hoc ipsum in causa fuit, cur nonnulla irrepsent errata, quæ [ut fit] illius fugeruat observationem. Horum præcipua sic.

CORRIGE.

Pag. 4 resista, *res ista*. 20 pugnanti, *pugnandi*. 22 plenu, *plenu*. 24 saltim, *saltem*. 25 quid, *quidem*. 28 ritæ, *rite*. 38 est, *est*. 48 Africa, *Africam*. 50 auxin, *auxim*. ibi pacicos, *paucos*. 51 aiebunt illis, *aiebant illi*. 69 interererat, *intererat*. 71 posteria, *posteriora*. ibid. cnmmorantem, *commorantem*. 83 gerumus geramus. 84 fueret, *fuerat*. 94 damnatas, *damnatos*. 109 fatis, *fatis*. 121 ce, ee- ibid. Luciferanis, *Luciferianis*. 129 potuisse, *posuisse*. 130 hætelis, *hæresis*. ibi *καταβήτας, καταβήτας* ibid. peiores, *peior*. 142 cium, *enim*. ibid. unitate, *unitatis*. 145 Pontifici, *Pontificis*. 152 decreto, *decretum*. 163 Dominatium, *Dominantium*. 164 abepti, *abrepti*. 167 fore, *foret*. 170 Epistolam? *Epistolam*. ibid. Conibrobata *Comprobata*. 198 tantique, *tantisque*. 199 iudicio, *iudico*. ibid. haæendum, *habendum*. 202 collequentem, *colloquentem*. 209 schismaticis, *schismatici*. 217 nequissimos, *nequissimos*. 227 Mileritanos, *Milevitanos*. 237 Virunt, *Vivunt*. ibid. pertinentiam, *pertinaciam* ibid. explicuri, *explicui*. ibid. anima, *animo*. ibid. credendam, *credendum*. ibid. exciperentur, *exciperentur*. 255 commentititiam, *commentitiam*. 257 ur, *ut*. 280 in signis, *insignis*. 292 nullam, *nullum*. 294 & facto, *est facti*. 295 & jam, *etiam*. 307 reddidisse, *reddidisse*. 308 ad Apostolis, *ab Apostolis*. 313 omnium, *omnium*. ibid. quic, *qui*. 314 reecerit, *rejecerit*. 317 syrix, *syria*. ibid. nostrum, *nostrorum*. 348 Hierononimi, *Hieronimi*. 349 Glabrioris, *Glabrionis*. ibid. injura, *injuria*. 355 habetes, *hebeter*. 357 unium, *unum*. 360 pugnanti, *pugnandi*. 366 exprobare, *exprobrare*. 367 Opinior, *opinor*. 376 patientiz, *patientia*. 380 asservarii, *asservari*. 381 frigi de, *frigide*. 384 traditas, *tarditas*. ibid. vendictæ, *vindicta*. 400 recta? *recta*. 404 in quam, *inquam*. 407 meum, *mentum*.

IN EPISTOLAM
S. FIRMILIANI
CÆSARÆ CAPPADOCUM EPISCOPI

A D

S. CYPRIANUM
EPISCOPUM CARTHAGINIENSEM
SUPER DECRETO STEPHANI PAPÆ.

De non iterando Hæreticorum Baptismo.

DISSERTATIO.



Pistolam Sancti Firmiliani ex universis, quæ extant inter Cyprianicas omnium celeberrimam, atque notissimam expendere aggredior. Hanc igitur ita expendam, ut eam & ab homine petulantissimo, Donatista sane quidem, confictam fuisse, & summa injuria sanctissimo Firmiliano tributam, solide non minus, quam aperte demonstrem. Disputationem autem eo ordine instituo, qui & ad præsentem controversiam accomodatior, & ad illius intellectum visus est expeditior. Quamobrem in tria capita dispartio, in quorum primo eas conjecturas adduco, quæ universam Firmiliani Epistolam afficiant, inficiantque. In secundo præcipua ejusdem Epistolæ loca exscribo, quibus criticas notas subi-

A

cio.

2
cio . In tertio demum omnia congero argumenta ,
quibus ex aduerso fides antiqua ipsi eidem Epistolæ
conciliari possit , quæ per me mihi objecta pro mea
virili retundo . Sit igitur .

C A P U T P R I M U M .

*Argumenta continet , quibus generatim Firmiliani
Epistola excutitur , & falsitatis arguitur .*

I. **M**Orellius omnium princeps hanc Epistolam
protulit , quam Paullus Manutius in Ro-
mana editione Latino suatore omiserat ; ait namque
Latinius : se auctorem fuisse , ne hæc epistola pro-
deretur , tum Majorum exempla sequutum , tum ho-
minis petulantiam detestatum . Pamelius post Mo-
rellium in sex antiquis Codicibus deprehensam eam
recudit , ingenue de se ipso fassus , se illam præter-
missurum fuisse , nisi Morellii diligentia editum fuisset
quod latebat . At Baluzio , & Latini prudentia ,
& Pamelii moderatio minus arrisit . Qua de re multa
concessit , quibus & illius utilitatem , & debitam
lucem vendicaret , nec diutius latere potuisse , etsi
Morellius illam non vulgasset , sibi omnino persuasit .
Verum ut multiplex , & versatile ingenium est
hominum , donemus Baluzio rem non potuisse longius
delitescere , non iccirco nobis deneget sine injuria
Baluzius tam diutinam hujus Epistolæ oblivionem
magno esse argumento , Majoribus nostris aut falsam ,
aut perniciosam visam fuisse , quorum alterutrum
ipsis in causa fuit , quod Juris publici
non

non fecerint . Quos inter , illud animadvertendum maxime : Erasmus , ut si quis alius emunctæ naris , & Criticorum omnium , qui censoriam artem in res ecclesiasticas invexerunt facile principem , in sua Frobeniana editione hanc Epistolam prætermisisset . At fortasse hæc ipsa Epistola Erasmus latuerit ? Mirum si quod Manutium , quod Morellium , quod Pamelium , quod Rigaltium , quod Baluzium , quod Fellum non latuit , Erasmus latuerit diligentissimum antiquitatis vestigatorem , tum maxime , cum ipse idem nobis affirmet : se in Cypriani editione vetustissimis Codicibus usum , in quorum nullo eam comperiisse vix credibile est , præsertim cum multa protulerit Cyprianica , quæ antea ignorabantur , veluti duas Epistolas , ad Jubajanum unam , ad Pompejum alteram , quæ in hoc ipso de quo nunc agimus , versantur argumento . Quin illud potius suspicandum , ab Erasmo repertam , eo consilio prætermisitam , quod in Epistola nuncupatoria ad Cardinalem Puccium probe adverterit . *Id fuisse Cypriano cum cæteris Scriptoribus commune , quod ipsius lucubrationibus multa sint aliorum admixta .* At enim Erasmus multa Cyprianicis lucubrationibus adjunxit , quæ vel ipso iudice notha sunt ; & Cypriani ad Pompejum literas omnium primus prodidit , tametsi nihilo minus in Stephanum amarulentæ sint , atque illæ Firmiliani . Verum facile duplex isthæc conjectura de Erasmo dilui potest , quod longe plura , ac majora occurrerent Erasmo præ adjudicanda ad Pompejum epistola Cypriano , quam ad Cyprianum Firmiliano . Ex quo ut am-

4
pior hallucinandi occasio, ita planior sese purgandi
via daretur Erasmo super Cypriano, quam super
Firmiliano. Utcunque resista se habeat, quæ non
magno certe argumento esse potest, jam ad gravio-
ra descendamus.

II. Quid autem gravius afferri potest, quam
vehemens juxta ac indigna, quæ de Firmiliani San-
ctitate inde oritur dubitatio? Ecquis contra tam ve-
cors, qui de illa dubitet? At sane planissimus re-
linquitur dubitandi locus, si vere hanc, de qua
nunc agimus, Epistolam ad Cyprianum miserit.
Tanta siquidem dicacitate Summum Pontificem Ste-
phanum impetit, tanta petulantia confectatur, tan-
ta acerbitate confcindit, tot inquinat contumeliis,
tot vexat probis, & maledictis, tot falsis crimi-
nibus cumulat, ut amarulentius nihil, nihilque
flagitiosius ab nequissimo Hæretico sit expectan-
dum. Enimvero Novatianus princeps schismatis
Artifex, alio sed longe peiori discordiæ genere in
Cornelium, & in Stephanum affectus, etsi vi, &
copia dicendi Firmiliano non minor, quod innuit
Cyprianus epist: LII. ad Antonianum, & si rem
suam, & quidem gravissimam ageret, ejusmodi
tamen conviciis abstinuit, aut certe his acerbiora
non protulit. *Nec vulnus suum miser carat* [Cypria-
nus inquit in epistola ad Cornelium modo laudata]
*Sed adhuc gravius, & se, & suos vulnerat, in per-
niciem fratrum lingua sua perstrepsens, & facundiæ
venenatæ jacula contorquens, magis durus secularis
philosophiæ pravitate, quam sapiæ dominicæ lenita-
te pacificus, desertor Ecclesiæ, misericordiæ hostis,*
in-

intersector penitentiae, doctor superbiae, veritatis corruptor, perditor caritatis. Graphice hic Cyprianus Novatianum effingit; ceterum maledictorum in Stephanum acrimoniam omnino reticuit. Quod enim illum in perniciem fratrum lingua sua perstrepere, & facundiae venenatae jacula contorquere dixerit, hoc ad illud est referendum, quod Novatianus argumentationibus in speciem validis, & fallaciloquentia circumductis incautos deciperet, suasque partes confirmaret. Dein misericordiae hostem, nominavit, ob denegatam lapsis omnem spem pacis, & misericordiae, quos nec ad penitentiam admittendos esse praesumebat ex illa Domini pronuntiatione, qua ait: Qui me negaverit coram hominibus, negabo eum coram Patre meo, qui in Calis est, uti fusc refert, refutatque Auctor libri ad Novatianum, quem Gravius, & Pamelius Cypriano adjudicant, fortasse minus vere. Eodem pertinent & duae posteriores notae *intersector penitentiae*, *perditor caritatis*. Novi, & probe novi, Novatiani legatos ad Africanam Synodum expeditos libellum famosum adversus Cornelium secum Carthaginem attulisse, quarum criminationum ea erat omnium gravissima, Cornelium Trophimo, aliisque thurificatis communicasse ex Cypriano haec ad Antonianum scribente. Caetera vero eo tendebant, ut Cornelium insuetae in lapsos conniventiae convincerent, & ecclesiasticae disciplinae remissorem inscientibus Ecclesiis pervulgarent, quo facilius Cornelij ordinatio irrita fieret. Contra Novatianus, ut odium Cornelio, sibi que misericordiam, & existimationem crearet, summam

& in lapsos severitatem , & in adversis tolerantiam adsimulavit . Quæ omnia eo tandem spectabant , ut Cornelium Apostolica Sede deiceret , ac sese intruderet ; Sed maledicum hoc ingenium , sed animum hunc contumeliosum , quantum ex Cypriano expiscatus , fateor , me deprehendere non potuisse , in quo si vere Novatianus peccasset , certius Cyprianus , qui Novatiani speciem nativis coloribus efformavit , ejusdem dicacitatem tanquam ceterorum criminum caput , & summam , & animi corruptissimi maximum argumentum , vere non minus quam opportune delineasset . Nunc ne quis me a proposito digressum existimet , hanc argumentationem conficio . Duo fuerunt sub Stephano , fortassis etiam sub Cornelio præcipua dissidia , Schisma Novatianum , & Anabaptismus . Illud Ecclesiæ unitatem , hic Apostolorum traditionem commaculabat . Illud ab homine primum schismatico , post etiam hæretico , ob negatam lapsis spem salutis , conflatum est : hic a Catholicis , & Sanctissimis Episcopis fidei , atque unitatis studiosissimis propugnatus est , qui ipsum rebaptismi nomen fugiebant ; neque enim se denuo baptizare , sed simpliciter baptizare contendebant , quippe quibus rarus non esset Baptismus ab hæreticis collatus . Una erat plerumque Afrorum Antistitum , & quorundam Orientalium mens . Hos inter Firmilianus , ut si quis alius Sanctitate , ac doctrina iis temporibus percelebris , cujus Sanctitatis , ac sapientiæ insignia extant monumenta tum in Synodo Antiochena , tum apud Basilium in epistola ad Amphilochem , tum

7

tandem in græco Menologio, hæreticorum Baptisma repudiavit. Communem causam, per me licet adversus Stephanum defenderit; At quod Vir Catholicus, Episcopus primæ Sedis, hæresum non osor modo, sed & profligator, qui Novatianum in prima Antiochena Synodo damnavit, qui Paulum Samosatenum confutavit; at quod vir sanctissimus, & integerrimus tanta temperantia, tanta mansuetudine, tanta humanitate, in quo summa erant omnia ob solam perspectam Stephani sententiam, mutato consilio, omnique antea actæ Vitæ humanitate exuta, subito, insperato, importune, addo etiam injuria ad probra, & convicia descendit, non in hominem flagitiosum, non in schismaticum, non in hæreticum, sed in virum honestissimum, innoxium, atque adeo in Sacerdotem Dei, fidei studio, disciplinæ custodia, cathedræ dignitate, satis probatum, nemini secundum, omnium principem, & quod magis mirere tanta non dicam ira, sed furore; non vi, sed rabie, quantam in sordidæ conditionis homine vix deprehendas, quantam nec in antiquioribus hæreticis invenias parem; nec in Luthero ipso, ceterisque, qui Lutherum sunt consecuti invenias majorem; Hæc qui fecerit, si probum, si sapientem, si orthodoxum, si memoria, si imitatione, si commendatione dignum, si Sanctum denique putem, amens sim. Lutherum præ cæteris nominavi, qui cum plurima, eaque immania, ac nefaria, & ante ipsum inaudita in Romanum Pontificem maledicta contulisset, illud omnium teterrimum, planeque diabolicum

au-

ausus est non tam comminisci, quam confirmare : Romanum Pontificem esse Antichristum . Quæ quidem blasphemia adeo detestabilis visa est Hugoni Grotio tametsi etherodoxo, summo, & principi juris publici Magistro, ut in Append: ad Comment. de Anti-christo libere non minus, quam aperte pronunciarit . *Unde ista virulentia, & tot conviciorum seges ? Nimirum eorum, qui schisma esse perpetuum volunt, qui ad ipsum unitatis Ecclesiæ, ac concordie nomen contremiscunt, interest Papam credi Anti-christum, ac non posse esse talem usque ad Domini adventum. Nisi schisma esset, non haberent multi, unde viverent ; & cum ipsi sine spe mercedis de Sacris literis ne cogitaturi quidem fuerint, alios de se metiuntur . Aurea quidem profecto, & digna Grotio sententia . Nec absimilis, nec minori laude digna fuisset altera Calvinii lib. 4. instit. cap. 7. §. 25. Videmur nonnullis nimis maledici, ac petulantes, cum Romanum Pontificem vocamus Anti-christum ; nisi e vestigio illam correxisset ; & jure optimo maledici, ac petulantes nedum videntur, sed sunt, atque vocantur . Si quis vero hanc ipsam virulentiam doctioribus hæreticis invisam in hac Firmiliani epistola desideret, nec difficile, nec longum est invenire si bene introspiciat . Perhibetur hic Stephanus Schismaticus, Hæreticus, hæreticis pejor, Pseudo-Christus ; Antichristi autem nomine Hæreticos designari locutio est Cypriano familiaris . En quo tandem Firmilianum conjiciunt, qui hanc epistolam Firmiliani esse confirmant, non eum improbis hominibus comparant, sed Hæreticorum ante-*

resignans simillimum judicant . Quibus gratiam, & quidem merito referre debet Novatianus , quod per illorum credulitatem , ne dicam oscitantiam , tanto lenior , ac temperantior habitus sit Firmiliano , quanto tollerabilior esse debuit is , qui Cornelio , adde etiam Stephano , est conviciatus , si tamen est conviciatus , quos legitimos Apostolicæ Sedis Episcopos esse negabat ; quam Firmilianus , qui omni-genas contumelias sciens , ac prudens evomit in Stephanum verum , atque perspectum in Petri Cathedra successorem ; nisi forte velit quis Firmilianum de schismate criminari , ut liberet impudentia . E contrario graviter queri potest Cyprianus de precipiti ista , & periculosa fide , quæ literis Firmiliani nomen præferentibus adhibetur ; propensior siquidem in Novatianum , quam in Firmilianum Cyprianus fuisset , quod melius illius famæ consuluisse , cujus libellum in Cornelium in Africana Synodo recitari vetuit , quam istius , cujus epistolam ad se missam non modo non discerpserit , non combussit , non suppressit , sed ut placet iis , qui hisce literis præter modum delectantur , & posteris consignavit , & e græcis latinas fecit ; sicque una earundem literarum probatione convellunt , & Cypriani prudentiam , & Firmiliani probitatem . Postremo , ut ad summam hæc omnia redigam , illud mihi non uno experimento omnino compertum est , si ad Sacræ Rituum Congregationis examen deferatur similis epistola , alterius cujuscumque servi Dei , ceteroquin christianis virtutibus præclari , nunquam in Beatorum fastis descriptum iri . Sentio quid No-

vatores hic reponant. Quid tu nos provocas ad tuas partes? Ad meas scilicet; quin etiam ad vestras. Quis enim vestrum hujusmodi descriptionem non ludificaretur, quandoquidem severas, legitimasque per summam injuriam ludificamini?

III. Magna proinde res est, si hæc epistola Firmiliano adimat Sanctitatem, sed majus quicquam si adimat fidem. Satis ut puto demonstravi, has de quibus agimus Literas Firmiliani nomine haud posse consistere salva illius Sanctitate; jam vero contendo nec posse consistere salva ejusdem catholica fide. Ac primum magno illud est argumento, hujusce epistolæ Auctorem Quartadecimanorum hæresi non obscure adhærescere, quam multo ante Firmilianum tum a Victore Papa, tum ab Orientalibus Conciliis prope *in finitis*, ut ait Eusebius lib. 5. Hist. Eccles. cap. 22. damnatam accepimus, quod fusi per nos præstabitur in peculiaribus animadversionibus ad hanc ipsam epistolam capite sequenti. Deinde quis in Catholicæ Ecclesiæ unitate eum hominem permanuisse censeat, qui Romani Pontificis Decreto ex Cathedra interposito tam audacter, & confidenter sit refragatus? qui certissimum ejusdem, & in fidei causis judicium, & in universa Ecclesia primatum multimodis pessunderit, tantum abest, ut sit veneratus. Quod quidem hæc Firmiliani larva tam aperte commenta est, ut nihil magis hæretici usurpent ad utrumque subvertendum. Ex Anglis Fellus in notis ad hanc epistolam inter ceteras ejusdem furfuris hanc adjecit. *Hunc certe Firmilianus minime opinatus est, fuisse universalem Ecclesiæ*
Pa-

Pastorem, & controversarum infallibilem Judicem, cujus personam, & definitionem tam incivilter traxit. Oxoniensis quidem mala mens, malus animus, sed proba conjectura, quam nos serio, & luculenter posteriore capite explanabimus. Jam nunc intelligo quantum mihi succenseant nonnulli, qui Orthodoxorum nomine gloriantur, quod ea in hujusce epistolæ Auctorem videar torquere, quæ Stephanum recta feriunt, ejusque successores. At erubescant miseri, & si sapiunt contristentur, sed contristentur ad pœnitentiam. Pudeat illos nedum Majorum suorum sapientiæ labem inferre, & exempla despiciere, sed & Christi perduellibus arma præbere. Pudeat sciolis, & ignaris tot tenebras offundere. Pudeat tandem aliquando tot cavillationes, & argumentula, aut satis convulsâ, aut facile convellenda iterum perfricare, simulque noverint, idque ex Sanctissimo Cypriano addiscant, unam hanc fuisse viam apertam, tritam, & directam, qua ad hæresim, proh dolor! tot ad Occidentem Solem regna novissimis sæculis contenderunt, contemptum videlicet Apostolicæ potestatis, & Romani Sacerdotii. Neque enim aliunde [Cyprianus ait in epistola ad Cornelium LV.] hæreses abortæ sunt, aut nata schismata, quam inde, quod Sacerdoti Dei non obtemperetur nec unus in Ecclesia ad tempus Sacerdos, & ad tempus Judex Vice Christi cogitetur, cui si secundum Magisteria Divina obtemperaret fraternitas universa, nemo adversum Sacerdotum Collegium quicquam moveret. Mihi quidem si tantum oculi esset quantum promptæ pronæque voluntatis, non

difficillimum foret [aut ego fallor] hoc zizania eradicare ; atque illud potissimum , quod nuperrime doctissimi juxta , ac integerrimi Meldensis Antistitis nomine superfeminavit inimicus homo . Id enim factu facilius , quam quisquam putet . Sed iter quo expeditius , eo magis impervium . Intelligo quid loquar . Nec vero quisquam censeat , me ad gratiam aucupandam , aut auribus indulgendum sermonem accomodare , liberi enim sumus , justique animi , ac minime ambitiosi . Quod attinet ad firmandum Romani Pontificis in Christi Ecclesia primatum a Cypriano assertum suo loco præstabimus . Pone vero cum IV. Articulo Cleri Gallicani *Summi Pontificis judicium irreformabile non esse , nisi Ecclesiæ consensus accesserit* , num iccirco impune Firmilianus refragari potuit Stephani Decreto ? quod eam sententiam vendicabat , quæ Augustino teste lib. 2. contra Cresc. cap. 3. *quingenta Episcopis Orientalium , & septuaginta Afris , vel aliquanto etiam pluribus probabatur contra tot millia Episcoporum , quibus hic error in toto Orbe displicuit* . Nunc satis illud mihi superque sit Firmilianum [ut certissimam illius præteream sanctitatem] schismaticum non fuisse , neque e Catholicis Episcopis id temporis fuisse pejorem , quominus hanc epistolam scriptam judicem a Firmiliano . Fuiſſet autem Ecclesiæ injurius , si Principi populi sui maledixisset contra Domini præceptum Deut. 22. 28. quem locum de Sacerdotibus , quin & de Summo Sacerdote exposuit Cyprianus in Epist. LV. ad Cornelium . Et Auctor Problematum , quæ vulgo Aristoteli tribuun-

buuntur sect. 11. *Qui Reſtori maledicit, in Civitate eſt injurius.* Quæ ex literis conſimilibus Cypriani ad Pompejum, & Hieronymi contra Rufinum obijci poſſunt, poſtremo capite diluentur.

IV. Inſiſtamus etiam paulum hujus epiſtolæ ſcriptioni. Summum quæro. Cur Firmilianus has literas ad Cyprianum miſit? Facilis eſt, inquiunt, & prompta reſponſio. Reſponſum reddidit Cypriano. Ubi nam extat Cypriani ad Firmilianum epiſtola? *Fortaſſe*, inquit Baluzius, *eadem retexebat, quæ ad Jubajanum.* Quid poſtea? debuit iccirco occultari? At ſane non occultavit Cyprianus Baluzio Judice epiſtolam ad Pompejum, quamvis eadem retexat, quæ in epiſtola ad Jubajanum. Eadem fere concoquit in cauſſa Novatiani, eadem perfricat in cauſſa lapſorum; ſed Vir eloquentiſſimus, ſi centies eadem retractaſſet, centies meliora, & jucundiora effeciſſet. Quod pluries ab illo factum, in hac certe controverſia maxime faciendum fuerat, quod ad Episcopum Orientalem ſcriberet ſummi nominis, ſuarumque partium ſtudioſum; quod inſperato Stephani Decreto, & acerbiffimis objurgationibus laceſſitus; quod perſpecta Stephani mente diffidendum foret prioribus a ſe allatis argumentationibus, hinc aut novæ, eæque validiores cudendæ; aut ex inſtituto traditio ſibi a Stephano objecta pluribus verbis refutanda; quæ quidem commode præſtare potuit, & opportune præſtare debuit Cyprianus, ut ſi quis alius & ad inveniendum acutiſſimus, & ad ornandum uberrimus. Potuit & Firmiliani exemplo confirmari, qui ple-

raque ab Cypriano scripta retexuit, quod crederet : *Non obesse utilitati salutari, aut eadem retexere ad confirmandam veritatem, aut quædam addere ad cumulandam probationem.* Equidem sic existimo, si vere Cyprianus has ad Firmilianum literas dedisset, tot, tantisque positis scribendi rationibus, omnium absolutissimas futuras fuisse, quæ tamen nullæ sunt; quia ut videtur Baluzius tacito innuere, indignæ, quæ ob otiosam argumentorum repetitionem ab Cypriano proderentur. At enim, inquiunt, ut mitius agant, deperditæ sunt. O factum male! Non deperduntur responsivæ [liceat mihi verbo uti minus latino, sed satis apto] deperduntur missicæ. Verum quid dixi non deperduntur? e græco in latinum vertuntur.

V. Sed priusquam ad latinam versionem accedo alterum quæro. Ubi nam extat græcum exemplar? Nullibi. Num hoc item deperditum? Quidni? Ita ne vero casus tanta ratione id efficere potuit, quod erat maxime optandum, ei qui epistolam aut confinxisset, aut confingere voluisset? Nunc illud exquiro: A quo fuit latine versæ? Vertisse, inquiunt, Cyprianum stylus arguit. Arguat plane stylus; quem quispiam alter potuit æmulari, at finis, at prudentia, at pacis, & unitatis amor non arguit. Quam apposite inverti potest illud Terentianum. Ex græcis malis fecit latinas pessimas. Quid namque causæ fuit, cur græcas Firmiliani literas latine verteret Cyprianus? cum satis abunde per se causam suam accurate, eleganterque dixisset, ac tam copiose, ut non modo Firmilianus Cyprianicis

argumentis vehementer sit delectatus, verum etiam ex abundanti paucissima addiderit ad cumulandam probationem. Hinc & Pearsonius, qui cum ceteris Adnotatoribus a Cypriano translatam coniecit, negat Cyprianum opus habuisse auctoritate Firmiliani ad conciliandos sibi Africanorum animos. At si latinam fecit, si evulgavit, certe tanto patrocinio carere noluit. Sin vero Cyprianus in sui patrocinium advocavit, quanto satius fuisset græcam, quam latinam prodere ad certam, & indubiam fidem aucupandam; aut columnis duabus distinctam græce, & latine promulgare; nam si tantum latine versam prodiderit, potuit, atque adeo debuit a nonnullis, qui ei contradicebant, in dubium vocari, & respui veluti conficta, vel ut adulterina quidem certe, eo etiam justius, quo apertius Cyprianicum stylum redolebat, quem servare fidum interpretem omnino fieri non poterat; cui ex Horatiano præcepto est verbum verbo reddendum, quod si in ceteris facultatibus sit tenendum de Religione quum agitur, inviolatum sit oportet. Nulla igitur Cypriano fuit hujus epistolæ transferendæ proposita ratio, proinde nulla vulgandæ; nam ejusmodi epistolæ promulgatio, quum novas turbas ciedere, & unitatem conscindere posset, aliena prorsus erat a prudentia, & caritate Cypriani; tum maxime cum Africana Ecclesia, & commendatissimi Cypriani doctrina, & Agrippini exemplo, & Afrorum Antistitum suffragatione, & pluribus Carthaginiensibus Conciliis celebratis, hanc de Anabaptismo sententiam alte imbibisset. Quod si innatæ suarum

rum gentium opinioni quantumvis præjudicatæ; exterorum hominum, doctissimorum præsertim, sententia accederet; Si Orientalis Ecclesiæ, ut Firmiliani epistola portendit, confirmatio; si confirmationi irrisiones, & ludibria in adversam partem accedant, jam tum serio triumphant, per famam, & populum circumfertur, & quod fieri assolet, plauditur, illustratur, fovetur, augetur. Ecquæ uberior schismatis seges? præsertim si illud sedulo animadvertas, Firmiliani contumelias recta pergere ad pacem, unitatemque scindendam, quemadmodum numero III. notavi. Quonam vero pacto cum tanto schismatis periculo, quod ex Firmiliani epistolæ promulgatione Africanæ Ecclesiæ imminabat, conciliari potest summum illud, ac pene singulare unitatis studium, quo adeo enituit, atque etiam num enitet Cyprianus? Cujus in hac ipsa rebaptismi causa insignis illa extat in epist. ad Jubajanum protestatio. *Nos quantum in nobis est propter hæreticos cum Collegis, & Coepiscopis nostris non contendimus, cum quibus divinam concordiam, & dominicam pacem tenemus, maxime cum Apostolus dicat. Si quis autem putatur contentiosus esse, nos talem consuetudinem non habemus, neque Ecclesia Dei. Servatur a nobis patienter, & firmiter caritas animi, Collegij honor, vinculum fidei, & concordia Sacerdotii.* Annon contentiosus fuisset Cyprianus, si Firmiliani literas juris publici fecisset? contra Dei præceptum. *Audisti verbum adversus fratrem tuum, commoriatur in te, fidens quod non te dirumpet.* Num patienter, & firmiter servasset animi caritatem?

quæ

quæ ex I. Cor. 3. *patiens est, benigna est, non emulatur ... non irritatur ... non gaudet super iniquitate ... omnia suffert ... omnia sustinet*. Num Collegii honorem, vinculum fidei, & concordiam Sacerdotii servasset? *qui non honore fraternitatis invicem prævenit*, ut Apostolus præcipit ad Rom. 12. 10. sed tot probra, & maledicta in principem Ecclesiæ Pastorem, Patrem, atque Magistrum conjecta, suæ fidei, ac taciturnitati commissa, cuius enuntiavit, perinde ac si plenus rimarum fuisset? Quod si Domino perhibente Matth. 5. 22. *Qui dixerit fratri suo, Raca, reus erit concilio. Qui autem dixerit fatue, reus erit gehennæ ignis*. Ad quem locum apposite Cyprianus ipse in epist. LV. ad Cornelium. *Quomodo possunt censuram Domini ultoris evadere, qui talia inferunt, non solum Fratribus, sed & Sacerdotibus, quibus honor tantus de Dei dignatione conceditur, ut quisquis Sacerdoti ejus, & ad tempus hic judicanti non obtemperaret, statim necaretur*. Quomodo potuit ipse censuram Domini ultoris evadere? qui tot, tantaque non solum in fratrem, sed & in Summum Sacerdotem Dei, convicia, a Firmiliano, ut isti perhibent, vomita, minime suppresserit, sed in lucem prodiderit, deinceps ejusdem criminis cum Firmiliano consors; eademque poena dignus effectus sit ex Apostolico oraculo. *Qui talia agunt digni sunt morte, & non solum qui hæc agunt, sed etiam qui consentiunt facientibus*. Facienti autem consentit, qui non vetans vetare cum possit, jubet. Annon eam epistolam evulgare pejus quiddam, ac

C

pe-

pestilentius fuisset, quam Anabaptismum tueri? Quid dicam latine vertere? Ibi enim de schismate, hic de disciplina agebatur. *Ibi si quid in eo fuerat emendandum* [inquit August. epist. 93. ad Vincent. Donatist.] *tanquam sarmentum fructuosissimum purgavit Pater falce passionis*. Hic schismatis reatus Martyrio non expungitur, sed mulctatur vel ipso Cypriano teste epist. LVII. ad Cornelium, in qua de Novatiano schismatis Auctore agens, ejusque Sectatoribus ita pronunciavit: *Quamquam & si aliquis ex talibus fuerit apprehensus, non est quod sibi quasi in confessione nominis blandiatur, cum constet, si occisi ejusmodi extra Ecclesiam fuerint, fidei coronam non esse, sed pœnam potius esse perfidiæ*. Ubi Chrysostomus hom. 1. ad Ephes. *Quid est hoc? Nec martyrii sanguine deleri posse hoc peccatum dividendi Ecclesiam per schismata, vel hæreses*. Et August. epist. 173. *Foris ab Ecclesia constitutus, & separatus a compage unitatis, & vinculo caritatis, æterno supplicio punieris, etiamsi pro Christi nomine vivus incendereris*. En quo tandem evadit sollicita hæc criticorum ceteroquin doctissimorum animadversio, ut stylum salvent, sanctitatem, & fidem inficiunt; sed de hoc plura, & majora in discussione Cyprianicæ ad Pompejum epistolæ.

VI. Jam vero ad id, quod est Criticis usitatus, accedamus, ad summum inquam, perpetuumque silentium eorum Scriptorum qui proxime Cypriano, ac Firmiliano res in causâ rebaptizantium gestas recensuerunt: Dionysij inquam Alexandrini,

Eu-

Eusebii Cæsariensis, Sancti Augustini, nec non Donatistarum, quin & ipsiusmet Cypriani, & omnium maxime Concilii Carthaginiensis III. Principio igitur Dionysius Alexandrinus Romanæ primum Ecclesiæ Presbyter, post Alexandrinorum Episcopus, obnixè, ac perpetuo studuit unitatem inter Occidentalem & Orientalem Ecclesiam fervare. Is literas misit ad Xistum Stephani successorem pro Græcis rebaptizantibus. Scripserat & dudum pluribus verbis Stephano superstitè ad Dionysium, & Philemonem Romanos Præsbyteros, non quod ipse Rebaptizantibus novissime adhæserit, ut turpiter conjicit Launojus, quod & Pearsonius mira licentia tanquam rem non dubiam affirmat, quibus merito Tillemontius, & Dupinus repugnant, tum literæ ipsæ Dionysij, tum res ipsa; qui enim Dionysius pro aliis intercederet, qui & ipse erat ejusdem criminis confors? sed quod id operam dabat, ut Stephanum mitiorem redderet Heleno, & Firmiliano, in quos, veluti & in reliquos Orientales Episcopos, verebatur Dionysius, ne Stephanus, qui Decreto suo causam finitam esse volebat, quid gravius statueret. Helenum quidem, ac Firmilianum nominat, quippe qui fuerint præter ceteros maximi nominis Antistites. Ceterum de hac Firmiliani epistola verbum ne quidem unum proloquitur. Quæ si tot tantasque turbas hoc tempore excitat, quanto putas majores debuisse excitare in maximo disputationis æstu? Profecto si ad Stephani manus pervenisset, Dionysius nihil profecisset, quominus a Stephano Firmilia-

nus, ceterique abstinere. At si epistola Firmiliani fuit a Cypriano vulgata, si a Cypriano latine reddita, quis non probe conjiciat ad Stephani manus, aut si mavis ad Xisti venire aliquando potuisse; quippe quod perdifficile usque fuerit ea occultare, quæ seditiosa sunt, ac tumultuosa, quæ plurimorum manibus teruntur, atque ea præcipue, de quibus maxima inter viros gravissimos exorta est dimicatio; tum maxime quum ibidem aliqui in pugnantia sententia perstiterint, quod & Concilij Carthaginensis III. indiclio, & nonnullorum Antistitum suffragatio apertissime indigitant; cum aliqui item fuerint in suos male animati, veluti Florentius Pupianus, Episcopus plane Africæ in Cyprianum, ut ceteros prætermittam, qui ab Urbe mercaturæ causa crebrius in Africam contendebant, utque eos item, qui cum Proconsule eodem mittebantur; atque illos tandem, qui militiæ nomen dederant, ex quibus magnum numerum vel in ipsis Romanis Legionibus Christianam Religionem professos fuisse perspicuum fecit Tertullianus, & Romano Pontifici, potius, ac justius quam Afris addictos fuisse, ratio ipsa suadet. In eo autem disputare, tot tantisque conjecturis Firmiliani epistolam omnino Stephanum latuisse, divinare est. Nam quemadmodum hoc tempore rerum gestarum ephemerides conscribuntur, & in longinquas, ultimasque terras eo perferuntur; quo plerique omnes curiosi homines eas perlegant, vel ad animum relaxandum, vel ad rem suam bene gerendam; ita & prioribus Ecclesiæ Sæculis gratissimum Christianis

nis erat ea rescire, quæ procul a suis finibus apud
 exterarum gentes super Religione eveniebant, hære-
 ses potissimum, ac persecutiones. Hinc illud effi-
 citur, quod est ratione consequens: non paucos
 pariter fuisse, qui quæ in dies fiebant absentibus
 Fratribus per literas opportune nunciarent. Quod
 si in tempore ad Pontum usque fieri potuit a Cy-
 priano, quidni commodius ad Urbem fieri potuit,
 quo tot negotiorum causa Carthagine potissimum
 confluebant, Romanusque Pontifex de acrius re-
 crudescuntibus Rebaptizantium dissidiis fieri cer-
 tior? Quod si Stephanum non latuerit, ut certe
 non latuisset, jam tum Dionysio Alexandrino spe-
 ciatim, ac nominatim, idque pluribus verbis ex-
 culandus erat, utcumque poterat, Firmilianus, cui
 jure meritoque iratior fuisset Xistus, quam He-
 leno, utpote ei, qui sui Decessoris decretum, ac
 Personam acerbissime fuisset infectatus, & Ro-
 manæ Cathedræ Auctoritatem minimi fecisset.
 Quo enim alio pacto Dionysius Xisto consideret,
 præsertim omnia scienti, multa suspicanti, magna
 metuenti, nulla speranti? Atqui Dionysius has
 literas tam tacitus præterivit, quam si nullæ fuif-
 sent; fuerunt igitur nullæ. Profunda hæc Dio-
 nysii Alexandrini taciturnitas intelligi potest in suis
 iisdem literis apud Eusebium lib. 7. Hist. cap. 5.
 Qui Eusebius quinque tantum numerat Dionysii
 epistolas, sed septem numerare poterat, si alte-
 ra quæ ad Dionysium Romanum, ac Philemo-
 nem, & altera, quæ Alexandrinæ Ecclesiæ no-
 mine data est, computentur.

VII. Quod vero idem Eusebius, qui optima quæque Veterum Patrum monimenta, quæ ad historiam pertinent, ac præsertim ad hanc de Re-baptismo disceptationem coegit, hoc Firmiliani ad Cyprianum responsum ne leviter quidem attigerit, plurimus relictus est dubitandi locus; confictum fuisse multo post Eusebium ab aliquo Donatista, qui obtentu hujus dissidii inter Stephanum, & Firmilianum jampridem constituti, ad suam hæresim fulciendam nedum Magni, & Sanctissimi Orientalis Episcopi exemplo est abusus, verum etiam sub ficto ejusdem nomine suffragium conflavit, quod multum verosimile feret, Cyprianum accepto Stephani decreto, continuo illius decreti exemplum ad Firmilianum per Rogatianum misisse, quod commentum, ut majorem veritatis speciem ei appingeret, multis hinc, atque illinc e Cypriano quæsitis rationibus, utcumque farsit; ac ne plagiarius proderetur, aliqua e suo plenu congelutinavit, partim frigida, partim falsa; postremo ut duplicem suspensionem removeret utramque occupavit, namque ista subtexuit. *Neque obest utilitati salutari aut eadem retexere ad confirmandam veritatem, aut quedam addere ad cumulandam probationem.*

VIII. Dixi multo post Eusebium hoc Firmiliani ad Cyprianum responsum confictum fuisse, quod nec Agustinus, qui ex instituto quamplurimis libris contra Donatistas conscriptis, ac fere cunctis rebus sub Stephano, & Cypriano gestis commemoratis, de hac Firmiliani Epistola ullum ser-

sermonem habuerit, quæ præter ceteras minoris certe ponderis, quas aut memoravit, aut expendit, omnium maxime expendenda fuerat, quippe quæ non modo asperum græci hominis ingenium, sed totum pene causæ statum patefaceret. Immo quo jure bene opinatus est Augustinus epistola superius adducta: Cyprianum sententiam suam retractasse, pari item judicio ad stabilendam Magni Episcopi Cæsariensis Sanctitatem conjicere potuerat, & hunc a pristina sententia recessisse. Quis enim istuc sibi persuadeat? Si Firmiliani literæ Augustino innotuissent, tam acerbæ, tam contentiosæ, unde sibi firmum præsidium Donatistæ adsciscere potuissent, non fuisse illas oppugnaturum, aut purgaturum quidem certe; quod censorium Augustini judicium quam sincerum fuerit, & subtile, inde potissimum argumentandum: epistolam Cypriani ad Jubajanum, etsi longe mitiorem altera ejusdem Cypriani ad Pompejum, atque etiam hac Firmiliani ad Cyprianum, nihilominus sibi Cyprianicam visam non fuisse, uti ex lib. 2. contra Cresconium cap. 33. Neutrum vero præstitit Augustinus, non igitur ei innotuerunt. At enim inquit Augustinus lib. 2. de Baptismo contra Donatistas. *Neque enim omnia, quæ in illo tempore inter Episcopos gesta sunt, memoriæ, literisque mandare potuerunt, aut omnia, quæ mandata sunt novimus.* Equidem hoc nil miror: Augustinum non omnia novisse, quæ super rebaptizatione memoriæ, literisque mandata sunt; sed in eo maxime admiror, planeque stupeo, id quod

Au-

Augustinus non novit, summus idemque accuratissimus ejus rei Scriptor, multis tandem post Sæculis nostris hominibus notum fuisse. Annon istud serio opinari idem prorsus est, ac suæ causæ desperare?

IX. At saltem Donatistis innotuerit. Nihilominus. Enim vero Donatistæ Augustino teste in celebri illa Collatione Carthaginiensi omnem lapidem verterunt in hac de rebaptismo disceptatione. Proinde multo mihi vehementior injicitur confictionis suspicio ex hoc perpetuo Donatistarum silentio, qui certissime tanto patrocinio carere noluisissent. Quid enim opportunius, quid etiam validius ad eam, quam sibi susceperant Anabaptismi instaurationem, quam epistolam hanc in rem suam adducere, quippe quæ non modo Cæsariensis Antistitis firmissimam sententiam; sed & omnis Orientalis Ecclesiæ consensionem, & Concilii Iconiensis auctoritatem portenderet. Quid? quod Donatistæ ad Synodum Carthaginiensem III. sibi repugnantes provocabant. Quid? quod Augustinus lib. 2. Retract. cap. 18. ita protestatus est. *Contra Donatistas auctoritate Beatissimi Episcopi, & Martyris Cypriani se defendere molientes, septem libros de Baptismo scripsi, in quibus docui, nihil sic valere ad resellendos Donatistas, & ad eorum prorsus ora claudenda, quomodo literas, factumque Cypriani.* Nisi id est quod ratio ipsa suadet: Donatistæ unde, & utcumque poterant sibi auxilium expetebant, & quo minus Ecclesiæ unitatem scindere viderentur, ad eos potissimum confugiebant, de quibus vel ob insignem

gnem in primis doctrinam, vel ob bene gestum Episcopatum, vel ob Sanctitatis nomen, vel etiam ob Martyrii laudem, optime Ecclesia audiebat, & loquebatur. Ad Cyprianum præcipue confugerunt, quippe in quo summa omnia fuissent. Quid ni etiam ob eam ipsam rationem ad Firmilianum confugerent? Episcopum primæ Sedis, famæ apud Græcos celebratissimæ, & quod maxime interest, Strenuum Beatissimi Cypriani, & Africanæ Ecclesiæ vindicem, ac propugnatorem. Agnoscunt ne tandem istius epistolæ assertores quibus anfractibus sibi sit decurrendum? & contra quam recta ipse pergam? Qui pseudo Firmiliani illam esse hæcenus probavi, & deinceps probabo.

X. Superest, ut quid Cyprianus ipse de Firmiliano, ac de Firmiliani literis senserit excutiamus. Multa scilicet, & præclara Cyprianus memorat tum de Firmiliano, tum de illius super hac re sententia. Quid tandem memorat? Nihil quicquam, ne nomen quid. Indignum facinus! ne quidem nominasse eum, ad quem in longissimas regiones, ut Firmilianus ait, epistolam miserit, & quidem de re gravissima, a quo literas acceperit plenas amoris, & benevolentiae, qui sibi in summo discrimine mature fuerit opitulatus. Indignum facinus! non gratiam modo, non beneficium, sed nec memoriam referre ei, qui in te talia, ac tanta contulerit beneficia. Sit plane facinus indignum, sed Cypriano indignum tamen, qui quod nunquam Firmiliani meminerit, magno argumento esse debet nullam sibi cum Cæsariensi Episcopo

necessitudinem intercessisse. Solemne quippe fuit Cypriano plerasque omnes a se missas vel acceptas literas, in posterioribus epistolis commemorare, quod non in hac solum controversia, sed & in reliquis perspicui potest. Et si maxime donemus Cypriani ad Firmilianum literas amissas fuisse, quemadmodum & græcas Firmiliani, tamen una hæc conjectura, omnino id a Cypriano fuisse prætermissum, quod erat minime prætermittendum, ita me persuasum habet, ut serio putem nullas fuisse latinas literas, græcasque nullas. Etenim Cyprianus modesto non minus, quam liberali, ingenuoque animo præditus, nunquam laudes sibi a Firmiliano tributas, suamque ab ipso eodem confirmatam sententiam reticisset, qui revelationes ipsas sibi a Deo factas non reticuit, sed in epistola ad Florentium Pupianum libere patefecit. Gratissimum item fuit Cypriano epistolas suas ab omnibus legi, atque exscribi; quam voluntatem prodidit in epistola ad Clerum suum XXXII. sin minus, vel acceptæ a Firmiliano epistolæ exemplum pro more suo ad quem Fratrum misisset; vel saltem illius meminisset; non misit autem, non meminit; ergo ne accepit quidem.

XI. Atque ut semel finiam, & novissimum; idemque maximum tanti silentii proferam argumentum, ad Concilium Carthaginense III. confugiendum est. In eo siquidem Cypriani ad Jubajanum literæ, nec non Jubajani ad Cyprianum perlectæ sunt, non item Firmiliani ad Cyprianum,

num, quæ si quidem extitissent opportunius fuerant legendæ quam illæ Jubajani, quandoquidem Jubajanus Afrorum sententiæ aut numquam adhæserit, aut sero, aut frigide. Contra Firmilianus tam alte illam animo imbiberit, ut ad Xisti usque tempora in ea opinione persisterit. Quocirca eo tota res spectat, ut inquiratur: an Papæ Stephani decretum ante, vel post hujus Synodi celebrationem sancitum fuerit, & ad Africanam Ecclesiam expeditum, quo explanato reliquum est in proclivi. Chronologus Cyprianicus, & Oxoniensis, quos secuti sunt Baluzius, & Cyprianicæ vitæ illustrator, ac fere plerique omnes, qui nec sedulo, nec per se rem expendunt, firmum illud, ratumque habent Stephanum hoc Concilio, ejusdemque pronuntiatione laceffitum decretum de non iterando hæreticorum Baptismo interposuisse, & ad Cyprianum misisse. Secus Lombertus, qui ad annum CCLVI. hanc Synodum retulit, sensit Responsum Firmiliani ad manus Cypriani sub finem ætatis pervenisse, & Cyprianum hac epistola munitum Concilium convocasse, quod Kalendis Septembribus convenisse legitur. Prioris sententiæ Auctores hanc eruunt supputationem ex epocha, quam præfert eadem Firmiliani epistola, quæ scripta fuit anno post Alexandrum Severum vicesimo secundo, qui calculus quanti sit faciendus, videant Viri docti, præsertim cum ex epistolæ textu oppositum potius sit conjiciendum, ita enim legitur. *Ante viginti, & duos fere an-*

nos, temporibus post Alexandrum Imperatorem. FERE dixit, quæ particula quinque integros Menses subtrahere potest, quo temporis intervallo potuit Cyprianus Firmiliani epistolam accipere, & ineunte Autumno Concilium celebrare. *TEMPORIBUS post Alexandrum Imperatorem.* Quis Latinorum affirmet To *Temporibus* ritæ usurpari ad designandum postridie ejus diei, quo mortem obiit Alexander? Quis vero neget tantundem dici potuisse, & quidem recte, post anni dimidium ab Alexandri morte? Quod si solum anni dimidium totam hanc epocham invertere potest, quid amplius huic Epochæ confidimus? Præsertim cum Pagius nedum postremum annum, sed & primum incompletum fuisse ita affirmet, *Annos illos viginti duos utcumque incompletos pro integris numerat Firmilianus, qui nullo modo de anno sequenti intelligi potest, quum eo anno persecutio orta sit, & Stephanus decesserit, & Cyprianus exilio multatus sit.* Ego omnino assentior Lomberto opinanti Firmiliani literas ante Concilium III. Carthaginense scriptas fuisse (si tamen fuerunt scriptæ.) Quod autem Lombertus prudenter est opinatus, Ego enim vero affirmo, & firmissimis argumentis demonstro.

XII. Primum petere libet ex epistola Synodica a Cypriano ad Stephanum missa post Concilium Carthaginense II., qua illum & de celebrato Concilio, & de duplici ejusdem Concilii Sanctione certiore facit. Primo: *Eos qui sunt foris extra Ecclesiam tincti, & apud He-*

reticos, & schismaticos profanæ aquæ labe maculati, quando ad nos, atque ad Ecclesiam quæ una est venerint; baptizari oportere. Deinde: Ut etiam si qui Præsbyteri, aut Diaconi, qui vel in Ecclesia Catholica prius ordinati fuerint, & postmodum perfidi, ac rebelles contra Ecclesiam steterint, vel apud hæreticos a pseudo episcopis, & antichristis contra Christi dispositionem profana ordinatione promoti sint, & contra Altare anum, atque divinum sacrificia foris falsa, ac sacrilega offerre conati sint, eos quoque hac conditione suscipi cum revertuntur, ut communicent laici. Quæ canones ad Carthaginienſe III. neutiquam traduci possunt, in quo unica de repudiando hæreticorum baptismo sententia, uno ore ab octoginta, & septem Episcopis confirmata est. Quo tandem fine Carthagine Synodum hanc III. coactam putamus? nisi ut Stephani decreto de non iterando hæreticorum lavacro, ampliori Episcoporum suffragatione, qui ex Numidia, & Mauritania convenerant, fortius repugnarent. Nil autem interest nullam in Stephani responsio de Præsbyteris, aut ad hæreticos dilapsis, aut ab hæreticis ordinatis, mentionem fieri, cum fieri quidem potuerit, & a Cypriano, utpote Africanæ menti conformis, merito prætermitti, nec opus erat Cypriano ea, circumferre, quæ fuerant a Stephano confirmata, & septem ad summum ante annos a Concilio Romano statuta. Viguit namque ritus ille de Præsbyteris usque ad Nicænum I., a quo Can. 8. antiqua severitas temperata fuit, ut

amplior ad salutem aditus, & facilior ad Ecclesiam reditus lapsis præberetur.

XIII. Alterum argumentum epistola Cypriani ad Jubajanum suppeditat, quam certissimum est ante Carthaginienſe III. scriptam fuisse, in quo lecta fuit una cum Jubajani responſo. In ea vero Cyprianus non modo de epistola a se ad Stephanum scripta, sed & meminit de Stephani responſo, immo conjicit Pamelius, & quidem probe, Stephani responſum non alia via ad Cyprianum perveniſſe, quam per manus Jubajani, ad quem a Stephano miſſæ fuerant. Pamelio Tillemontius adverſatur ea ductus ratione, quod & officio repugnaret, Stephanum non Cypriano, a quo literas Synodicas acceperat, sed Jubajano reſcribere, quodve non unus Stephanus Cypriani, ceterorumque Afrorum ſententiæ repugnaret. Verum ut prima illa animadverſio nimium redolet gallicam officioſitatem, ita altera hæc non multum abest a divinatione. Verosimilius enim multa concurrere potuerunt, quæ Stephano in cauſſa eſſent, cur litteras Jubajano inſcriberet potius, quam Cypriano; ſive quod Jubajanus, quandoquidem ipſius locus ac provincia ignoratur, cuiſpiam inferi maris inſulanæ Eccleſiæ præeſſet, qui propterea, aut Romanæ, & Africanæ Eccleſiæ ſequeſter eſſet, aut literas utrinque miſſas ſedulo, & commode accuraret; ſive quod vereretur Stephanus, ne ſi literas minaces, & permoleſtas una cum decreto recta ad Cyprianum mitteret, aut interire, aut aperiri, aut intercipi poſſent; quod ſi in fa-
mi-

miliaribus, & jocosis epistolis plerumque metuitur, in severis porro, & gravibus est usque ex-
 timescendum. Qua de re præstabat Stephano duplex earundem literarum exemplum conficere, alterum ad Jubajanum, ad Cyprianum alterum. Ut illud quod in proclivi est, prætermittam, quod tametsi Sanctissimo Cypriano omnino indignum sit, Afris enimvero non est indignum. Unde vulgatum illud *Pani fedi fragi*, & illud *Punica fides*. Quis enim non vereretur, ne, si in Afrorum manus Stephani epistola incideret aut suppressa, aut adulterata fuisset. Ut ut ista se habeant [namque in sola versamur conjectura] illud in tanta rerum ignoratione perspectum nobis, exploratumque est, Cyprianum post datas ad Stephanum Synodicas literas, responsum ab ipso eodem expectare, ab aliis non item. Sed jam propius ad epistolam accedamus. Sic itaque Cyprianus in epistola ad Jubajanum. *Plane quoniam inveni in epistola, cujus exemplum ad me transmisisti, scriptum esse, quod quærendum non sit quis baptizaverit, quando is, qui baptizatus sit, accipere remissam peccatorum potuerit secundum quod credit. Addo etiam quæ ibidem prope medium sequuntur. Nec quisquam dicat, quod accepimus ab Apostolis, hoc sequimur. Quam traditionem apostolicam non fuisse fuisse e vestigio probare nititur. Qui locus respondet alteri ex epistola ad Pompejum, ubi Stephani rescriptum sibi objiciens, ita inquit. Nihil innovetur, inquit, nisi quod traditum est. Unde est ista traditio: utrum ne de*
 do-

*dominica , & evangelica auctoritate descendens , an de Apostolorum mandatis , atque epistolis veniens ? Et pergit Apostolorum traditionem inficari iisdem fere argumentis , ac in superiori epistola . Addo , tandem exemplum superiorum literarum quemadmodum & ceterarum , quæ super hoc baptismo fuerunt a Cypriano conscriptæ , transmissum fuisse ad Pompejum , fatente , atque ita exordiente Cypriano . Quanquam plene ea , quæ de hæreticis baptizandis dicenda sunt , complexi sumus in epistolis , quarum ad te exempla transmisi-
mus . Ad quæ apposite Pamelius loquitur de epistolis præcedentibus ad Episcopos Numidas , ad Quintum , & ad Jubajanum , atque adeo patet post illas omnes scriptam hanc esse .* Profecto Cyprianus literis suis ad Jubajanum datis tam vehementer est delectatus , ut illas recitari jusserit , & pro suffragio attulerit in III. Concilio Carthaginensi . Hinc verisimile fit Cyprianum & literas ad Jubajanum , & Stephani decretum , veluti & reliquas , quæ ad hanc causam pertinebant , iccirco ad Pompejum misisse , quod Pompejus , aut senio confectus , aut morbo præpeditus nequivisset per se indicto Concilio Carthaginensi interesse , pro quo , sicut & pro Dioga Leptimagnensi , Natalis ab Oea est suffragatus , uti sub finem ejusdem Concilii perspicitur .

XIV. Tertium argumentum apertius quam tria priora Stephani decretum post II. Carthaginense in Africam delatum demonstrat , & ante III. celebrationem , indeque petitur , quod non pauci ex
Epi-

Episcopis suffragatoribus in suis ferendis sententiis Stephano, ejusque decreto in sequenti Carthaginensi III. succensuerint. Cyprianus ipse sic præfatus est: *Neque enim quisquam nostrum Episcopum se esse Episcoporum constituit, aut Tyrannico terrore ad obsequendi necessitatem Collegas suos adigit.* Quibus verbis tacite a Cypriano Stephanum innui, atque morderi, censuit Baronius, & post Baronium omnes qui hunc locum adnotarunt, præsertim Rigaltius, Baluzius, & Pearsonius, quos omnes hallucinatos esse inferius demonstrabimus. Interea satis sit, ostendisse: Baluzium, ac Pearsonium, nec non Fellium, qui vafro semper animo Cypriani dicta in Romanum Pontificem contorquent, secum pugnantia loqui, dum & Stephanum eo loco designatum affirmant, & Stephani decretum post III. Carthaginienſe traducunt. Nihilo secius placuit & Cypriani verba in hoc Concilio habita, adducere, ut ipsos suis iisdem armis confoderem. Quæ sequuntur ad rem magis, & clariora. Cæcilius a Bilta primus post Cyprianum suffragator post aliqua hæc subtexuit. *Ad hæc omnia accedit & illud malum, ut Antistites Diaboli audeant Eucharistiam facere, aut qui illis assistunt dicant: hæc omnia falsa esse de hæreticis. Ecce ad qualia cogitur Ecclesia, & sine Baptismo, ac venia delictorum communicare compellitur.* Potuit ne clarius ad Stephani decretum alludi? Hæc Cæcilius sententia respondet alteri Cyprianicæ contra eundem Stephanum in estipistola ad Pompejum. *Ad hoc enim malorum devoluta est Ecclesia Dei, & Sponsa Christi, ut*

hæreticorum exempla seſectetur. Item alteri. Dat bonorem Deo, qui hæreticorum amicus, & inimicus Chriſtianorum, Sacerdotes Dei veritatem Chriſti, & Eccleſiæ unitatem tuentes abſtinendos putat? Dat bonorem Deo, qui unitatem, & veritatem de divina lege venientem non tenens, hærefes contra Eccleſiam vendicat? Sed omnium clariffime Creſcens a Cirta. In tanto cætu Sanctorum Conſacerdotum lectis literis Cypriani dilectiffimi noſtri ad Jubajanum, itemque ad Stephanum. Quocirca literæ Cypriani ad Stephanum datæ fuerunt ante hoc Concilium, & Stephani reſponſum occaſionem præbuit III. Synodi convocandæ, & epiſtolæ ad Firmilianum miſſæ. Quid ad hæc Pearſonius? Non opus habuit Cyprianus autoriſtatis Firmiliani ad conciliandos ſibi Africanorum animos. At huic Pearſonii opinationi repugnat factum. Advocavit enim Jubajanum ad conciliandos ſibi Africanorum animos, ejusque literas palam in Concilio recitari voluit. Audiamus tandem Labbæum ad Concilium Carthaginienſe II. Hæc cum Epiſcoporum prædictorum LXXI ſententia conſtituta eſſent ad Stephanum Romanum epiſtola quadam Synodica perſcribuntur. Ille vero Synodica epiſtola accepta per literas redditæ Concilium hoc reprobat, & ſimul etiam ſanctiſſime mandavit, ne a traditione apoſtolica, de non iterando baptiſmate hæreticorum eorum &c. Conſentit Labbæo Tillemontius in notis ad III. Conc. Carth. Qui vero acutiores ſtimuli admoveri potuerint Cypriano ad III. hanc Synodum convocandam præter Stephani decretum plane

ne non video. Sed illud probe video, plerosque Episcopos in Synodo III. Carthaginienſi duo potiffimum conari. Primum ut objectæ conſuetudini veritatem præponant, veluti præpoſuerunt Caſtus a Sicca, Felix a Buſlacenſis, & clariuſ quam reliqui forte etiam ridiculoſius Liboſus ab Agria. *In Evangelio Dominus ego ſum inquit veritas; non dixit: ego ſum conſuetudo.* Deinde quod intelligerent quosdam hæreticis baptizantibus patrocinari, hic doleat, ille miretur, alius irascatuſ veluti Cæciliuſ a Bilita, Fauſtuſ a Timida regia, & Marcus a Baſtari. Quæ quidem duo ad unum Stephanum al-ludere non modo literæ Synodicæ ab Afris ad Stephanum miſſæ, non modo Stephani decretum, quod hæc tantum duo complectitur, nobis indigitant, ſed Zoſimuſ a Tharaſſa appoſito quidem exemplo in diſpari ſatis cauſſa declarat, ita enim inquit: *Revelatione facta veritatis, cedat error veritati, quia & Petruſ, qui priuſ circumcidebatur ceſſit Paulo veritatem prædicanti.* Hoc tamen exemplum ei ſolum objicere poterat Zoſimuſ, qui ſibi in Eccleſia Primatum non ſecus ac Petruſ obtrudere potuiſſet. Hoc ipſum argumentum a Petri, & Pauli diſceptatione ſuper Circumciſione ductum, fuſiuſ tractat Cyprianuſ in epiſtola ad Quintum in cauſſa de Baptiſmo, in qua hæc inter cætera. *Non eſt autem conſuetudine præſcribendum, ſed ratione vincendum. Nam nec Petruſ quem primuſ Dominuſ elegit, & ſuper quem ædificavit Eccleſiam ſuam, cum ſecum Paulluſ de Circumciſione poſtmodum diſceptaret, ſibi aliquid inſolen-*

ter, aut arroganter assumpsit; ut diceret se primatum tenere, & obtemperari a novellis, & posteris sibi potius oportere. Utrobique idem factum proponitur, quod singulare omnino sit ad obsistendum primatui Romani Pontificis, quem clanculum mordebant, quod consuetudini serviret, quod Collegis præscriberet, quod Hæreticis faveret. Hoc vero a me iccirco pluribus verbis præstitum est, quod in tempore intellexi, plurimum interessè Firmilianicæ epistolæ Assertorum post III. celebratum Concilium Carthaginienſe eandem reponi. Videbant utique solertes, acutique homines quæ gravissima falsitatis præsumptio inde oriretur, si hæc literæ III. hoc Concilium præcessissent, in quo tamen nulla illarum facta est mentio, ususque nullus. Verum enim vero quanto aptius, quanto congruentius, quanto etiam utilius perlectæ fuissent Firmiliani, quam Jubajani literæ? quippe quod ageretur de Episcopo primæ Sedis, maximæ inter Græcos existimationis, qui Paullum Samosatenum damnaverat, & confutaverat, qui Sanctitatis fama in primis prædicabatur, qui tot tantisque nominibus reliquos suæ gentis, atque ætatis Antistites superabat, aut æquabat quidem certe. Agere-tur insuper de explorata Orientis sententia ab Iconiensi Synodo pridem confirmata. Quæ vero causa subesse potuit Cypriano, cur tale, tantumque suffragium supprimeret? Quid amplius ex Jubajani literis sibi pollicebatur? Instet forte quis, & dicat: etiamsi Firmiliani suffragium plurimum prodesse potuerit africanæ sententiæ; jure tamen fuisset

se illud a Cypriano suppressum, quod nimia scateret acrimonia, magnisque foret contumeliis confectum. Sed qui hoc reponit jam denegat: fuisse & a Cypriano translata, & a Cypriano vulgata; præterea epistolam ad Pompejum Cypriani non esse. Cum vero satis perspectum sit Firmiliani literas non modo a Cypriano in III. Synodo proditas non fuisse, sed ne quidem nominatas, jam inde ratione consequitur, & ex hujusce Concilii silentio confictas demonstrari.

XV. Quæ hætenus adduximus argumenta ex positione hypothecica verius quam ex absoluta proficiscuntur; multa siquidem admisi, quæ nisi ex argumentationes, quas ad hominem vocitant, mihi conficiendæ fuissent, aperte, & libere denegassem. Id enim propemodum egi in præsentī dissertatione cum Firmilianicæ epistolæ Assertoribus, quod cum Donatistis plerumque egisse Augustinum deinceps demonstrabo. Nunc ut a suppositione ad positionem absolutam ratiocinationem traducam, id mihi probandum sumo: Firmiliani temporibus aut nullam fuisse inter Episcopos Asiaticos super baptisma hæreticorum disceptationem, aut longe aliam, atque ea, quæ perhibetur ab Eusebio Cæsariensi. Enimvero quis, vel mediocriter in Ecclesiastica Historia eruditus ignorat, duabus, potissimum hæresibus Orientalem Ecclesiam id temporis exagitam fuisse, nimirum Cataphrygum, & Pauli Samosatēni. Adversus illos coacta fuit Iconiensis Synodus Tillemontio fatente, cui Firmilianum per se interfuisse hæc epistola præfert, quemadmo-

dum, & adversus alterum non una Synodus Antiochena celebrata est, Firmiliano ipso contra Paulum, in priori Synodo sentiente, & disceptante. Utrique hæretici baptismi aut formam aut significationem adeo depravabant, ut nullo pacto aut hic ratur ab Orthodoxis haberi posset; aut ille omnem depellere suspicionem quod Catephrygibus non alius esset Spiritus Sanctus, quam Montanus illorum signifer; nec Paullianistæ in alterius nomine baptizarent, quam Paulli Samosatani. Quum una, est altera istiusmodi hæresis toto Oriente grassaretur, vero non absimile est nonnullos Episcopos Montani præstigiis, & Paulli Sophismatis abreptos his adhæsisse, multo item plures, eosdemque doctiores, & in fide fortiores repugnasse. Concilium Nicenum I. a quo illius baptismus uti sacrilegus proscribitur, atque iterari jubetur, non obscure indigitat, disceptationem hanc ad Nicenam usque Synodum perdurasse; quæ propterea peculiaribus canonibus litera de Paulli Samosatani baptismo jandiu jactatam dirimere debuit, quam reapse diremit. Quod si Cataphrygum baptismum certo canone non exsufflavit assignandum est honori, & quidem maximo in quo Patres Nicæni evangelicam formam continenter habuerunt verum quod reliquorum hæreticorum baptismi, veluti enchrititarum Hydroparistarum, Novatianensium, & his similium ne generatim quidem meminerit Nicæna Synodus, magno est argumento, aliarum hæresum baptismi orientalis Ecclesiæ Patribus fuisse probatum. Quod si aliquando iisdem improbatum novis-

visset Nicæna Synodus, Firmiliano præsertim, atque Heleno, ceterisque Iconiensis, & Synnadenſis Concilii Patribus, nec ſatis, nec leviter tanto huic fidei discrimini conſuluiſſet, quandoquidem tot, tantorumque hominum auctoritate, & opinionis firmitate, quæ Orientem, atque Occidentem pervaserat, tandem aliquando reviviſcere poſſet. Contra non incongruenter exiſtimandum; rebaptizantium hæreſim neutiquam fuiſſe revicturam, ſi plenario Nicænæ Synodi judicio damnata fuiſſet, veluti judicavit de Cypriano Auguſtinus. Hoc vero uſque adeo ſimile eſt, ut etiamſi id verum eſſet, quod Baronius contendit de pace Eccleſiæ reddita ab Anabaptiſmi aſſertoribus, Dionyſii ad Xiſtum literis non bene perceptis, quibuſque eruditioribus, ipſoque literarum contextu repugnantibus; nihilo minus recenti admodum, & periculoſo errori peculiari cautione occurrere debuifſet, quod quidem commode illo ipſo canone contra Paullianiſtas exceptione una pauciſſimis verbis præſtare potuiſſet; id vero non præſtitit; nulla igitur fuit id præſtandi neceſſitas.

XVI. Hoc itaque jacto fundamento, quæ demum contentio Stephano cum Firmiliano eſſe potuit? ſi controverſia, quæ de baptiſmo in Oriente Firmiliani temporibus agebatur, quæve ab œcumenica Nicænâ Synodo I. judicata eſt, non Novatianenſium, illiſque ſimilium baptiſma ſpectabat, ſed Paullianiſtarum. Qui tandem Stephanus tam dubio decreto, ac tam late patenti jubere poterat *a quacumque hæreſi revertentes non fore rebaptizandos?*

dos? Quo enim pacto Basilii Firmilianum, & Cyprianum perstringit, quod istorum baptismatum discrimen non introspexerint, quod erat maxime introspiciendum, eodem profus Stephanus perstringi posset, quod a quacunque hæresi revertentes indiscriminatum rebaptizari vetuerit. Siqui vero Stephanum de solo baptismo, qui cum invocatione SS. Trinitatis præstatur intelligendum esse contendant, ut plane contendunt, jam stolidum, & malevolum Cyprianum notant, quippe qui non hæsitans scripserit in Epistola ad Pompejum. *A quacunque hæresi venientem baptizari in Ecclesia vetuit, idest omnium hæreticorum baptismata iusta esse, & legitima judicavit. Et quum singula hæreses singula baptismata habeant, hic cum omni in baptismo communicans, universorum delicta in sinum suum Coacervata congeffit.* In tanta hac monumentorum perturbatione nil congruentius judicandum occurrit, nil etiam verosimilius, quam ut Orientalium contentionem de anabaptismo in Eusebianas fabellas rejiciamus.

XVII. Eusebius inquam Cæsariensis Episcopus, quo non antiquior alter, sed nec eruditior super hac disceptatione scriptor existit, universam de Orientalium atque Afrorum anabaptismo historiam confinxisse, atque occasione hæresis Cataphrygum, & Paullianistarum omnia miscuisse mihi non injuria videntur. Hic opportune in memoriam revocanda est magna illa, & justissima suspicio, quæ de Eusebii historia non modo nostrorum temporum doctissimis viris, sed & Sanctis Ecclesiæ Patribus, sed
&

& Conciliis œcumenicis , sed & summis Pontificibus injecta est, quæ quidem suspicio notior est, quam ut possit nostris argumentationibus comprobari. Id potius inquirendum videtur : quid sibi tandem Eusebius proposuerit in hisce commentis effingendis ? Causa enimvero , quæ Eusebium impulit , ut tot tantaque de Anabaptismo mentiretur , tam magna est quam quæ maxima , quam causam antequam aperio, illud strictim cursimque animadvertendum est : Eusebium nedum Arianum fuisse , sed & uti Hieronymus illum vocitat lib. primo Apologiæ adversus Ruffinum *Arianæ quondam signiferum factionis* , & ut Nicephorus Patriarcha C. P. in duodecim Capitulis cap. 2. *Arianæ insanie Principem* , qui plura , & pejora quam omnes Ariani in Filium Dei , e D. N. J. C. , & Deum contumeliose , & impie protulit , atque ita Principem , ut una cum altero Eusebio Nicomediensium Antistite Eusebianorum nomen Arianis dederit . Utque alia bene multa veterum Patrum testimonia de Eusebii Arianismo præteream , illud Satis mirari non possum : Hankium in lib. de Bizant. Rer. script. Græc. par. pr. cap. pr. id pronunciare potuisse : *Esse prorsus incertum an Arianis, vel Orthodoxis annumerandus sit... & via tutissima illos incedere , qui post Synodum Nicenam Eusebium Arianum fuisse neque negantibus , neque affirmantibus accedentes , iudicium suum suspendunt ; sed nec minus miror , doctissimum Pagium tam precipiti Hankii iudicio acquievisse ; nisi id est quod suspicor . Hankius plus æquo Eusebio studebat , & Pagius Hankio , sed Hankius meo*

F

qui-

quidem iudicio excusabilior quam Pagius, quippe qui falso id sibi persuaderet: hitoricos Eusebii libros ante Nicæni I. celebrationem fuisse conscriptos, a qua sententia refugit Pagius, & quidem merito; cum Arianus error in libris universis, post Nicænam Synodum ab Eusebio descriptis, quin & in sui ipsius factis nullo negocio, tametsi cetera ignorarentur, possit aut aperte deprehendi, aut tacito dignosci; quemadmodum, & aperte deprehenderunt, ut Recentiores omittam, & Hieronymus, & duo Patriarchæ C. P.ⁿⁱ Photius, & Nicephorus; & tacito Verbo, & scripto ab eodem ipso vendicatam dignoverunt Athanasius, rursusque Photius. Illud etiam minimum valet: Eusebium Nicænz fidei subscripsisse; & aliquando post Nicænum Orthodoxam fidem prætulisse; nam ut Epiphanius Diaconus in Synodo 6. œcumenica act. 6. præfatus est: *subscripsit labiis, non corde, quemadmodum, & omnes epistolæ illius, & commentaria ostendunt. Quod si alias aliquando* [pergit idem Epiphanius] *pro temporis, & rei conditione mutatus apparuit, nunc hos laudans, qui stabant a partibus Arii, nunc vero veritatem simulans, profecto ob id secundum Jacobum Fratrem Domini, homo duplicis animi, & inconstans in omnibus viis suis dicetur.* Id ipsum eadem plane sententia Magnus Athanasius prædixerat de eodem Eusebio lib. de Syn. Nic. decr.; quæ si satis Hankio non fuissent ad Eusebium arianæ hæreseos culpandum post celebratam Nicænam Synodum, & illud meminisse debuerat: Eusebium Cæsariensem Antistitem Tyrio Arianorum Concilia-

liabulo præfuisse, & contra eximium Athanasium tam indigne stantem, ut judicem sedisse.

XVIII His adnotatis, nunc illud sedulo inquirendum: quid sibi Eusebius proposuerit in ejusmodi historię confictione? Verum, & istud assequi minime poterimus, nisi alterum præmittamus, quod caput est, & summa Eusebianę versutię. Ad rem igitur mature animadvertendum est; Paulum Samosatensem fundamenta jecisse arianę impietatis, & Arium contra veluti expolitorem, & perfectorem fuisse paullianę blasphemię. Aiebat Paullus: Christum Dominum purum, putumque hominem fuisse. Affirmavit Arius: Verbum Dei meram esse Creaturam, omnium principem, tum perfectione, tum etiam tempore. Quod vero adjicitur inanimum tantum corpus hominis assumpsisse, id non Ario, sed ejus sectatoribus per Marium Mercatorem adjudicatur. Cujus tam execrandę blasphemię summam, adversus Christi Divinitatem, tametsi ab Ebione, Arthemio, ac Theodoto Arius accepisse videri possit; Paullus tamen Samosatenus perniciosissimi erroris instaurator potissimus tum Episcopatus dignitate, tum temporum vicinitate erat, & habebatur. Hinc plurimum intererat Eusebii, ut disceptationem, quę pridem apud Orientales exarserat de baptismo; [si quidem exarsit], suppresso Paulli Samosateni nomine de industria misceret, ac perturbaret. Etenim cum generatim scripsisset hæreticorum baptismum fuisse a Græcis Patribus proscriptum, & a Romanis Pontificibus vendicatum, jam illud consequeba-

tur Paulli baptisma ea injuria fuisse a Græcis oppugnatum, quo jure a Romana Sede fuit assertum. Ex quo item altera ducebatur consecutio nimirum: non magnopere curandam Paulliani baptismi damnationem per Nicænum Conventum sancitam; quandoquidem in Iconiensi, ac Synnadeni Synodo Kataphrygum ac Paulli Samosateni, tum reliquorum hæreticorum baptisma fuerat eliminatum, quod tamen Stephanus Summus Pontifex nullo hæreticorum discrimine; nulla baptismalis formæ ratione habita, strenue, ut Romanum Pontificem decebat, contra doctissimos, ac SS. Græcorum Antistitum vendicaverat. Inde etiam major suspicandi præbatur occasio, quod quum Eusebius Cæsariensis minutiora non pauca de anabaptismo tradiderit, de audacissima tamen, atque impiissima paulliana formula ne verbum quidem egerit, perinde ac si Orientalibus Patribus æque irritum fuisset quod a mitioribus hæreticis in nomine Trinitatis præstaretur lavacrum, atque illud, quod in nomine Paulli; quod nemo sibi persuadeat, nisi qui omnem prudentiam, doctrinam, & æquitatem iisdem inficietur.

XIX. Subest & altera causa, & quidem gravior modo explicata, quæ certe majorem cum argumento, de quo nunc agimus, conjunctionem habet. Nimirum Arianorum conniventia pro Donatianis, quibuscum ut fædus inirent manibus pedibusque contenderunt. Videbant siquidem Ariani quantum rebus suis consulerent, si Donatianorum rationibus inservirent. Non uno in loco quasi hujusce
fæ-

fæderis meminit Augustinus, præsertim in colloquio habito cum Fortunio; Donatista quod enarrat epist. 45. *Sane quoniam nescio quomodo audieramus Arianos cum a communione catholica discrepassent, Donatistas in Africa sibi sociare tentasse, ad aurem mihi hoc ipsum Frater Alipius suggestit.* Quando vero societatem Donatistas inter atque Arianos initam fuisse diserte tradit Augustinus Epist. ad Bonifa. 185 quæ *de correctione Donatistarum* inscribitur, in qua discrimen statuit inter sententiam Donatistarum, atque Arianorum circa Verbi naturam. De illis meminit: *eorum aliquos minorem Filium Patre esse affirmare, non item negasse ejusdem esse substantiæ. Plurimi oppositum credebant; quæ novissima verba fatis innuunt turbolentiores dumtaxat Donatistarum, eosque fortasse primarios, aliquanto arianæ hæresi adhæcisse, non quo Donato Magistro suo adhærescerent; neque enim usque eo ausus est Donatus, sed quo Arianis morem gererent, sibi que vicissim præsidium quærerent; acerbiusque catholicam conjunctis viribus divexarent.* Quid igitur mirum si Eusebius *Arianæ factionis signifer* qua re cumque potuit Donatianis vicem rependere studuerit? quod cum in multis, quæ ignorantur, tum maxime prestare potuit, atque adeo debuit in ecclesiastica, quam conscripsit, historia, in qua multa confinxit, multa permiscuit, longe plura obscuravit; & quæ maxime conscribenda erant, omnino reticuit; contra vero quæ sibi ad Donatianum Schisma confirmandum idonea visa sunt, præcipue in causa anabaptismi dolose, atque adeo perfide confinxit.

XX. Eusebii itaque Cæsariensis versutia, & Nicæni Concilii silentio de reliquorum Hæreticorum baptismo hactenus expensis; superest ut propius rem inspiciamus; quod mihi diligenter non minus præstandum est, quod nonnullos nec mediocriter notæ Auctores hallucinatos animadverterim, nimium sibi blandientes de Canonica ejusdem Concilii Sanctione contra Anabaptistas. Enim vero si de Canone XIX. agatur, tantummodo de Paullianistis sermonem habet; si autem de VIII. agit quidem de Novatianensibus, at non de Novatianensium baptismo, sed de illorum ad Catholicam reditu; immo ne de Novatianensibus quidem omnibus sed de Clericis tantum, de quibus sancivit: *ut impositionem manus accipientes in Clero permaneant*. Jam vero si Eusebium ipsum consulamus maxima, quæ pro rebaptizandis hæreticis in Oriente juxta ac in meridie mora erat contentio, ex hæresi Novatianensi occasionem habuit. Quis vero satis miretur temporibus Concilii Nicæni vigente adhuc, & insolescente hæresi Novatianensi, ne verbum quidem unum de Novatianensium baptismo a Nicænis Patribus fuisse prolatum? Nisi id est, quod sit ratione consequens: Nicænis Patribus id fuisse compertum, neminem unum inter Episcopos Orthodoxos in Oriente fuisse, qui anabaptismo favisset. Quod si secus, atque ego conjicio, res se haberet, quid necessarium magis, quid etiam expeditius, quam errorem jam vetustate firmatum, duobus Conciliis Iconiensi, & Synnadeni a suæ gentis Episcopis acriter propugnatum, ac propterea, ut si quis

quis alius, periculosissimum, ac demum per idem tempus Africanæ Ecclesiæ permolestum tandem aliquando convellere, & errandi occasionem credulis, ac simplicioribus avertere? non convulsit; autem errorem, occasionem non avertit; igitur nec fuit convellendi, nec avertendi necessitas.

XXI. Dicat quis: potuisse quidem anabaptismum a Nicænis Patribus proscribi, quin & debuisse, & proscriptum enimvero fuisse; sed hisce temporibus ignorari; quod acta Nicænæ Synodi pene omnia interciderunt. Nugæ. Quid igitur causæ fuit, cur Constantinus Imperator, ejusque Catholici successores Donatistas identidem turbas excitantes ad Nicænos Canones non provocaverint? Quid quod Catholici in tot cum Donatistis collationibus nunquam magnæ Synodi sanctionem proposuerunt, nec aliquando Donatistæ ab illius auctoritate se tuiti sunt?

Urgeat adhuc, & subdat: ante Nicæni Concilii celebrationem annos circiter viginti Donatianum schisma prodiisse, & in judicio Episcoporum Romæ primum sub Miltiade post annos septem, deinde Arelate anno posteriori fuisse damnatum, atque uno eodemque anno Donatistas ab Arelatensi Concilio ad Imperatorem provocasse, cui mens erat: dissidentium Episcoporum lites componere, pacemque Africanæ Provinciæ restituere. Constantinum vero id perficere adortum fuisse quod animo complectebatur, inde licet argumentari, quod Cæcilianus Carthaginienfis Episcopus, quem unum impetebant & Donati rabies, & Donatistarum in-

vidia, Nicæno Concilio interfuisse. Cur autem interesset, nisi ob Donatianum negotium? Probabilius itaque videtur affirmandum: sententiam de anabaptismo occasione schismatis Donatiani certo aliquo canone, tametsi temporum injuria deperdito, a magna Synodo fuisse improbatam.

Verum istiusmodi conjecturas fieri vetat Arianae causæ magnitudo. Verendum quippe fuerat piissimo Imperatori, ne dum alienis rebus consulere suas exturbaret, nimirum ut ait Tillemontius: *Animadvertit Orientem graviori morbo, quam Africa, laborare, neque tum eum esse, qui graviter egrotans, alienis posset vulneribus medelam prestare.*

Verissime dictum ab Horatio de Art. Poet.

*Segnius irritant animos demissa per aures.
Quam quæ sunt oculis subjecta fidelibus.*

Præterea: Qui fieri potuit, ut uno Cæciliano præsentē, ceteris omnibus absentibus, atque inauditis, dissidium gravissimum sedaretur? Pone vero, non Cæcilianum tantum, sed & complures Afrorum Antistites convenisse, qui tandem fieri potuit; ut latini Patres serio, fructuose, atque expedite coram, & cum Græcis disceptarent? Ecquid tandem boni sibi Constantinus pollicebatur ab hominibus pertinacissimis? qui dudum duo Concilia adversum se celebrata irrita fecerunt. Quam vero spem conciliaris expeditionis conciperet? Si Arianorum causam cum involuta, ac turbulentissima Donatistarum contentione conjunxisset?

set ? Cur autem Cæcilianus ad Nicænum confes-
sum accesserit , seu accitus , seu sponte sua , sive
religionis studio , sive sese purgandæ sive Cæsaræ
gratiæ aucupandæ causâ , omnino ignoratur. Illud
perspicuum est : de Donatiano errore nedum actum
non fuisse , sed nec agi potuisse , atque adeo non
debuisse.

XXII. Sentio quod habeant ad Augustinum con-
fugium , qui ut Cyprianum eximat ab obstinatio-
nis culpa ita de illo conjicit lib. 2. de Bapt. cap. 7.
Quum enim secutum se dicat sententiam dicti Con-
cilii , hac adtestatione satis ostendit , multo magis se
fuisse commemoraturum , si quod de hac re transma-
rinum , vel universale Concilium factum esset & sub-
dit , e vestigio : Postea vero dum inter multos ex utra-
que parte tractatur , & quæritur , non solum inven-
ta est veritas , sed etiam ad plenarii Concilii aucto-
ritatem , roburque deducta ; post Cypriani quidem pas-
sionem , sed antequam nos nati essemus . Plenarium
vero iudicium , quod Augustinus commemorat re-
ferri nequit ad Arelatense ; non enim fuit plenarium ;
non ad C. P. I. quod vicesimo septimo anno post
Augustinum natum coactum est . Igitur id unum
supereft , ut ad Nicænum I. referatur ; ergo &
baptismi hæreticorum rati habitio ad Nicænum est
referenda .

Vereor , ne meis Lectoribus audacior videar , &
confidentior quam ceteri ; si in difficillimi Augusti-
niani hujusce loci explicatione , post tot , tantasque
doctissimorum virorum disceptationes , liberius
quam par sit sensum meum aperiam . Enimvero

talía mihi , ac tanta animo obverſantur , ut quam liberrime pronunciare auxin : me ſatis mirari non poſſe , non paucos extitiſſe melioris notæ Auctores , qui Auguſtini eſſatum de Concilio Plenario , Nicæno potius quam Arelatenſi adjudicaverint . Quæ vero me adducunt ut *Concilium Plenarium* , de quo loquitur Auguſtinus vindicem Arelatenſi , hæc ſunt .

XXIII. Primum. Qui ſtant pro Nicæno , non intelligunt quantum Auguſtini auctoritatem , ejuſque Sapientiæ laudem extenuent . Quis enim credat Auguſtino provocanti ad Nicænum ? in quo nil tale ſancitum fuit . At enim ſi non directe ſancitum , ſaltem per acceſſionem ; Qui ſic reponunt lædunt , quod eſt præcipuum in Auguſtino , nimirum Dialecticam ; non enim eſt probi Dialectici perſequi conſectaria , cum poſſit principalia . Non diffiteor , ita Auguſtinum contra Donatianos argumentari potuiſſe : Nicæna Synodus Paulli tantummodo Samofateni baptiſmum abdicavit propter depravatam baptiſmi formam ; non item Novatianenſium , qui SS. Trinitatis invocationem cum Catholicis in baptizando communem habebant ; igitur Anabaptiſmus damnatus fuit a Synodo Nicæna . Sed quanto directius , quanto etiam verius urgerentur Donatiani hac altera poſitione . Cauſſa finita eſt : Concilium Arelatenſe I. can. 8. ita ſancivit . *Placuit , ut ſi ad Eccleſiam aliquis de quacunque hæreſi venerit , interrogent eum ſymbolum , & ſi perviderint eum in Patre , Filio , & Spiritu Sancto eſſe baptizatum , manus ei tantum imponantur ,*
ut

ut accipiat Spiritum Sanctum. Nec mihi reponant: potuisse Cyprianum non acquiescere Canoni Arelatensi, quemadmodum Donatistæ non acquieverunt; quandoquidem hæc responsio contumeliosa est in lenissimum Cyprianum, cui Donatianam perviciam ascribere impium esset, ac sacrilegum; præsertim cum Donatistæ ab Arelatensi judicio provocaverint ad Imperatorem potius ob absolutum Cæcilianum, quam ob suam damnatam hæresim; quam si obstinatius post Episcopale judicium propugnarunt, non eo demum obstinatio evadebat, ut hæc illis hæresis plurimum placeret; sed placebat tamen, quod viderent homines vafri, & veteratores, unum hunc errorem firmamentum esse schismatis sui, præterea nullum. Agebatur siquidem de exturbando Cæciliano a Sede Carthaginensi, quippe qui ordinatus fuisset [ajebunt illis] a Traditoribus, qui quum fidem abdicassent, contendebant Donatiani jam non posse fidem præbere eum, qui fidem amiserat. Ob eam ipsam rationem, non ordinationem tantum, sed & baptismum ab fidei experti collatum irritum judicarunt; cujus obtentu quosque fideles ad Donati partem adsciscerent, ut verum baptismum consequerentur. Hæc summa erat hæresis Donatianæ, quam antehac homines alioqui perspicaces, & eruditi minus perspexerunt. Sed de hoc fusius in dissertatione posteriori. Nunc ut ad Augustinum revertar de Cypriani docilitate prudentissime conjicientem, est & alterum expendendum, an Cyprianus acquievisset Decreto Nicæno? Equidem ipse non injurius ero mi-

tissimo Cypriano, si contendam impune Cyprianum obfistere potuisse Nicænorum Patrum Decreto, propterea quod in communi hypothefi Cyprianum existimantem, eam controversiam disciplinæ esse non juris, ita scripsisse autumant ad Stephanum Romanum Pontificem nomine Synodi Africanæ. *Qua in re nec nos cuiquam vim facimus, aut legem damus, quum habeat in Ecclesiæ administratione voluntatis suæ arbitrium liberum unusquisque Præpositus, rationem actus sui Domino redditurus.* Iccirco id ratum erat Cypriano, unumquemque gentis suæ consuetudinem servare posse, *nemini præscribens, quo minus statuatur quod putat unusquisque.* Reposuisset igitur Cyprianus: Quid mea si secus sentiant Orientales? Servent illi suæ gentis institutum; ego id custodio quod a majoribus nostris traditum est. Anne id ipsum reponere potuisset Arelatensium Antistitem, pronunciationi? Neutiquam; nam plurimi Africani Episcopi ad Synodum Arelatensem convenere, eodemque & præcipuam totius Africæ consuetudinem de non iterando hæreticorum baptismo adduxerunt, & generalem totius Occidentis comprobarunt. At ad Nicænum unus convenit Cæcilianus; Quod enim triginta sex Africæ Episcopos ab Athanasio in apologia enumeratos Nicænz adjudicat Norisius part. pr. Hist. Donat. cap. 10. merito illius dictum Ballerinii Fratres in nupera, & posthuma Norisianæ Historiæ editione, correxerunt, & Sardicensi Synodo, non Nicænz ab Athanasio assignatos adnotarunt; ex illustri monumento Concilii V. collat.

5. , in quo Benignus Heracleæ Pelagoniæ Episcopus ita effatus est . *Et hæc dicebat Augustinus de Cæciliano Episcopo Carthagini , qui solus ex tota Africa pervenit ad Nicænum Sanctum Concilium .* Proinde illud vero simillimum est , Cyprianum cessurum fuisse Arelatenſi ſententiæ , Nicænz non item , Illud etiam neceſſario conſequitur : Auguſtinum utpote acutiſſimum , & Dialecticis præceptionibus optime imbutum in ea *Concilii Plenarii* appellatione ad ſolum Arelatenſe Concilium mentem , animumque adjeciſſe . Profecto hæc ratio tanti apud me eſt , ut affirmare non dubitem , eos omnino falli , qui implexum iſtud Auguſtini dictum ad Nicænum Concilium traducere conati ſunt . Quid quod Auguſtinus Creſconio Orientalium literas objicienti Nicænos Canones non oppoſuit ? quæ promptior reſponſio ? quæ accommodatior ? quæ expeditior ? quam ſuſpectis Orientalium literis certiffima Orientalium ſtatuta objectare ? Non objectavit tamen , igitur nec potuit ; niſi velimus magnum Auguſtinum oſcitantiz inſimulare . Quid etiam quod Auguſtinus in celebri illo colloquio cum Fortunio Donatiſtarum Episcopo epist. 45. objectum ſibi Sardicenſe Concilium , [quod verius aut Philippopolitanum , aut Nicænum ex Thracia Arianorum Conventiculum dicendum erat] , hæſit , nec quo ſe verteret habebat , ac proinde & ad famæ rumorem , & ad Alipii occultum ſuggeſtum , & ad forenſes cautiones ſeſe convertit ? Quidni Canones Nicænos Sardicenſibus oppoſuit ? Quid enim factu facilius ? quid notius ?

quid in causa efficacius? Præterea Donatistæ male sibi consuluissent si Orientalis Concilii pro Anabaptismo Decretum adversus notissimum Magnæ Synodi Canonem proposuissent. Illi enim tametsi audacissimi, callidi tamen, rebusque suis sedulo prospicientes, nunquam pro se tuendis aut Romani, aut Arelatenis Concilii iudicium supposuere. Nec secus illorum causæ obfuisse Sardicenis Concilii propositio, quandoquidem perspectissimo Nicæni Decreto convinci possent. Neque tam simplices Donatistæ, qui crabrones irritarent; neque tam incautus Augustinus, qui quum sibi propositam difficultatem risu excipere posset, per tot diverticula subterfugeret.

XXIV. Nunc placet argumentum ab Laurojo petere, & retractare. Augustinus Epist. 42 al. 162. hæc ad Eleusium scribit. *Ecce putemus illos Episcopos, qui Romæ judicarunt non bonos Judices fuisse: restabat adhuc plenarium Ecclesiæ universæ Concilium, ubi etiam cum ipsis Judicibus causa posset agitari, ubi si male judicasse convicti essent, eorum sententiæ solverentur. Quod utrum fecerint probent: nos enim non factum esse facile probamus; ex eo quod totus Orbis non eis communicat: aut si factum est, etiam ibi sunt victi; quod ipsa eorum separatio manifestat, & paucis interjectis. Dedit ille aliud Arelatense iudicium &c.* Quibus recensitis Laurojus exclamat: *Potuit clarius? potuit expressius?* Addens. Quod restabat universæ Ecclesiæ iudicium, idem ipsum paucis interpositis verbis Augustinus vocat iudicium Arelatense, id est Concilium Arelatense, in quo de
non

non iterando hæreticorum baptismo Canon statuitur octavus.

Respondet Cardinalis Norisius ex Augustini verbis oppositum aperte constare ; nam si Augustinus plenarium Ecclesiæ Universæ Concilium Arelatensem Synodum fuisse docuit , non scilicet : *Nos enim non factum esse facile probamus , ex eo quod totus Orbis non eis communicat* . Si autem in plenario Concilio Melchiadis sententia confirmata fuisset , id Augustinus , non ex secuta communione Orbis , sed ex sententia plenarii Concilii ipso facto , ut ajunt , ostendisset . Nec dixisset : Si factum est etiam ibi victi sunt . Cur enim dubitasset , an factum fuerit plenarium Concilium , quod statim si Launojo credimus , Arelati celebratum fuit ? Præterea Augustinus loquitur *de plenario Ecclesiæ universæ Concilio* , ubi etiam cum ipsis Judicibus causa posset agitari . At Romani Pontificis sententia non potest judicari a Synodo ex parte tamen sui Patriarchatus coacta . Et alibi Launojus eo testimonio utitur , ut ostendat Romanum Pontificem vel invitum subdi Synodo generali . At ex Augustino ex eadem Epistola certum est Episcopos *in potestate acta Synodi non habere* , contradicente Primate . Quare cum supra omnes , qui Arelati convenere , Primas fuerit Romanus Pontifex , ipso contradicente , nulla acta Synodi fuissent . Hæc Norisius .

At meo quidem judicio Launojus ex parte probandus , ex parte rejiciendus . Probandus est , quod loco tam insigni perspicuam fecerit Augusti-

ni mentem de Concilio Arelatensi ; at rejiciendus ; quod inde argumentum ducat , quo probet Romanum Pontificem vel invitum subdi plenario Concilio . Hujus profecto erroris causam communem habuit cum Norisio , qui tametsi Augustinianæ Doctrinæ vestigator solertissimus habeatur jure meritoque , Augustini tamen contra Donatianos systema non penitus est assecutus , multo etiam minus Launojus . Neuter siquidem advertit duplex ab Augustino contra Donatianos systema perpetuo servatum : absolutum , & hypotheticum , uti vocitant ; utramque hanc agendi rationem in disquisitione Cyprianicæ ad Pompejum epistolæ Theorem. II. posterioris Dissertationis aperiemus . Quod attinet ad disputatum Augustini locum , non erat , quod Scriptor Eminentissimus parvipenderet Launoji argumentationem ; qui si non modo *ingentes clamores excitat* , *verum etiam pene triumphum sibi canit* , ut ait Norisius , enimvero ajo potuisse in eo Launorum serio triumphare , nec triumphandi causam Norisium tam frivolis responsionibus Launojo ademisse . Cardinalis namque Norisius aperte hallucinatus est in explanatione Augustinianæ sententiæ , quæ epistola ad Eleusium continetur ; quæ mihi per partes explicanda est , quo dilucidius Augustini mens introspectiatur . Sic itaque Augustinus : *Ecce putemus illos Episcopos , qui Romæ judicarunt non bonos Judices fuisse* . Loquitur hic per concessionem , consuetarie in systemate hypothetico , non in absoluto . *Restabat adhuc plenarium Ecclesiæ universæ Concilium , ubi etiam cum*
ipsis

ipsis Judicibus causa posset agitari. Agit hic quoque in hypothefi, & quidem Donatistarum, qui Schismaticorum, atque Hæreticorum more, Romani Pontificis ſententiæ non acquieverunt. Hinc illud conſequens fiebat, ad Concilium Plenarium rem perducendam, ut Donatianæ pertinaciæ fieret ſatis; quid enim aliud agendum ſuccurrebat cum hominibus Romanæ Sedi inſenſiſſimis, niſi ad plenarium Eccleſiæ Concilium provocare? Sed alteram hanc hypothefim Launojus ut ſi quis alius in Romanam Sedem acerbus, non perſpexit, ſed abreptus eſt nudo verborum ſono; & quod magis mirere, nec Noriſius poſtერიorem hypothefim animadvertit, quam ſi animadvertiſſet, proſecto non quæſiſſet diverticula, nec ad jus Romani Pontificis Primatiale confugiſſet, perinde ac ſi Romani Antiſtitis ex Cathedra pronunciata ſententia tum demum judicari nequeat, quum ad Concilium ex ſuo Patriarchatu coactum adducitur, ſecus ſi ad plenarium Eccleſiæ univerſæ, quæ eſt ſeditioſorum hominum nova prorſus, & contorta ſententia, cui nunquam Noriſius adhæſit; at ſi verba Noriſii ſpectes, eodem recidunt. Sed pace dixerim tanti Viri, præterivit ipſum peræque ac Launojum ſecunda Auguſtini hypothefis; hinc quum quid Launojo reponere non haberet ad alterum ejusdem epistolæ locum ſe convertit, quo illud Launojo oſtenderet: Epiſcopos in poteſtate acta Synodi non habere contradicente Primæ, unde illud erueret, quo Launojum urgeret; non ab Occidentalibus Epiſcopis Romani Pontificis Decretum

rescindi posse ob jus Primatiale, quod Summus Pontifex obtinet in Occidente; sed a plenario dumtaxat totius Orbis iudicio. Sed hic aperte Norisius Romani Pontificis jura permiscet. Hunc etenim Occidenti præesse affirmamus non jure Primatiali, sed jure Patriarchico; jure autem Primatiali universæ Christi Ecclesiæ, quæ sub sole est, præesse dicimus. Consultius itaque Pagius, sed non verius, Arelatense Concilium Patriarchicum totius Occidentis appellavit, ne plenarium diceret. Quid plura? Augustinus ipse per se ipso eodem ejusdem epistolæ loco apertissime indigitat, se quodcumque aliud præter Romanum Concilium supervacaneum putare pro rati habitione absolutionis Cæciliani, nam e vestigio hæc subdit: *Dedit ille aliud Arelatense Judicium, aliorum scilicet Episcoporum, non quia jam necesse erat, sed eorum perversitatibus cedens: & omni modo cupiens tantam impudentiam cohibere.* Sinat jam Norisius me hic saltem exclamare. *Potuit clarius? Potuit expressius?* Anne videt Norisius quæ fuerit Augustini mens in provocatione ad Concilium plenarium? nempe eadem atque Constantinensi Augusti: connivere voluit Donatianæ impudentiæ; ceterum Cæciliani innocentia satis superque declarata fuerat in Romano Concilio, præsidente Summo Pontifice, ac proinde *non necesse erat Arelatense judicium.* Quæ quidem sententia respondet alteri satis insigni Augustini loco cont. duas Epist. Pelag. ad Bonif. lib. 4. cap. ultimo; quem si rixosi homines accuratius ponderarent, profecto tot, tantasque turbas minime excitarent in vendican-

canda Plenarii Concilii necessitate post pronunciatam a Romano Pontifice sententiam.

Sed pergamus Augustiniani loci alteram partem expendere : *Quod utrum fecerint probent : nos enim non factum esse facile probamus : aut si factum est , etiam ibi sunt victi.* Quæ verba ita per Norisium reddenda forent . Quod Concilium plenarium utrum celebratum sit , probent Donatistæ ; nos enim non factum esse hoc plenarium Concilium facile probamus ; aut si factum est etiam in eo Concilio sunt victi . Et sane si ita interpretemur , egregie ab Norisio Launojo responsum . At instituta ab Augustino argumentatio interpretationem hanc veluti absurdam explodit : atque aliam appositioem desiderat . Quoniam illud erat Augustino propositum , ut ostenderet : si Romani Concilii sententia a Donatistis de injuria postularetur , non ab alio dignoscendam esse quam a plenario Conventu , quem penes arbitrium erat rescindendi acta Synodorum Provincialium , si comperiantur male judicasse . An autem Romanorum Judicum sententias plenarium Concilium [quodcunque tandem illud fuerit] resciderit , probent Donatistæ ; nos enim non fuisse rescissas facile probamus , ex eo quod post Romanum , & Deinceps celebratum Concilium totus Orbis Donatistis non communicat : aut si prior Concilii Romani sententia in plenario Concilio rescissa , aut retractata est ; etiam in eo Concilio , damnatione Romanæ Synodi seposita , velint nolint convicti sunt ; quod ipsa eorum separatio , quæ est post plenarium judicium

obstinatio visa est, manifestat. Quodnam autem fuerit hoc plénarium Concilium sic explicat: *Dedit ille aliud Arelatense iudicium.* Quid hic absurdi reperit Norisius? Verum enim vero magnum ipse, atque inexcusabile absurdum deprehendo in Norisiana interpretatione. Fac etenim ita prope modum interpretandum veluti Norisius interpretatur: *Probent Donatistæ plenarium hoc Concilium factum fuisse; Nos enim Catholici non factum esse facile probamus.* Num hæc digna sunt Augustino? Quid intererat Donatistarum Concilium plenarium vindicare? quid Catholicorum pernegare? Equidem si sanus sum existimo, omnino oppositum ab Augustino dicendum fuisse, nisi maximum illud absurdum probare velimus, quod est ratione consequens: Donatistas nimium suæ causæ confidere, Catholicos contra pene desperare; nam Donatistæ ad Plenarium Concilium confugiebant, a quo Catholici abhorrebant. Ingenue fateor me diu multumque in hujusce Augustiniani loci vestigatione versatum omnino percipere non potuisse, qua demum ratione adductus affirmaverit Norisius ex Augustino: Concilium hoc plenarium factum non fuisse, quum hoc ipso in capite, in quo hæc autumat, id sibi negotii det, ut ostendat plenarium illud Concilium ante Augustini ortum celebratum, non Arelatense, sed Nicænum I. fuisse; fuit igitur celebratum; sive Arelatense putes, sive Nicænum ad rem non attinet. Norisius ut negaret Arelatense, omne Concilium negavit; ut Nicænum astrueret pugnantia scripsit, Equidem sic existimo

Car-

Cardinalem Norisium ejusmodi explicationem a Summo Confarcinatore, ab Natali inquam Alexandro mutuatum fuisse; cujus pro Nicæno argumentationes in portu impingunt; propterea quod duplex Augustini contra Donatianos systema nec ipse discrevit; forte etiam ceteris miserabilis permiscuit, quemadmodum in probatione assumptionis II. argumenti ad hanc ipsam quæstionem, in qua quum id sibi demonstrandum suscepisset: Cæciliani causam Orbi Terrarum non innotuisse, ut inde Concilii Arelatensis plenitudinem inficietur, Augustini loco in lib. ad Donat. post Collat. cap. 18. intollerabiliter abusus est. Sic autem habet Augustinus: *Hæc verba per orbem Terræ universa personat Ecclesia: Testimonium Dei novi; negotium Cæciliani non novi.* Quæ verba si ad literam sumantur, & illud a vero absonum consequens fit, non Orientalem modo, sed & Occidentalem Ecclesiam Cæciliani negotium ignorasse. Sed Augustinus more suo refugit quæstionem facti pertractare, & perstat in quæstione juris. Ob id fatetur identidem, se Ecclesiam, non Personam defendere; quod ut rite præstet historias contemnit; suimet defensionem præterit; multa item apertissime falsa Donatistis concedit. Quum vero a suppositione progreditur ad positionem absolutam, secus sentit, atque profatur. Verum de hoc fufius, & opportunius in posteriori differtatione. Quod adjicit ex eodem Augustino lib. 4. Conc. Cresc. cap. 25. de tot Orientalium Provinciis, *ubi Cæciliani non dico falsum crimen, sed forte nec verum nomen auditum est*; ni-

hilo plus valet ad Arelatenſis plenitudinẽ dene-
gandam , ut infra demonſtro, ubi & poſtremum
Alexandri argumentum ex plenarii Concilii defini-
tione petitum diluitur. Ceterum non modo Cæci-
liani verum nomen, ſed & eximiam virtutem præ-
clare teſtatur Magnus Athanaſius orat.pr. in Aria-
nos, & ſatis perſpecta fuerunt Nicænæ Synodo uni-
verſæ , cui Cæcilianus unus ex omnibus Afris in-
terfuit.

XXV. Jam vero commune, utque illis placet
firmiſſimum Nicæni Aſſertorum perſugium eſt
deſiciendum. Illi vero ita ratiocinantur: enimvero
Auguſtinus non quodcunque Concilium reſpexit
tum quum appellavit *plenarii* *Judicii auctoritatem*,
& *robur*, ſed Concilium dumtaxat œcumenicum,
cujuſmodi omnium maxime Nicænum eſt, atque
vocatur. Contra Arelatenſe nunquam pro œcume-
nico Concilio ab Eccleſia habitum eſt. Tutius er-
go, ac verius, & catholicæ ſententiæ conformius
Auguſtinum de Nicæno, non de Arelatenſi loqu-
tum exiſtimandum eſt: qui hanc argumentationem
inſtituunt vident in Auguſtino, quod ipſe non vi-
deo: atque e contrario non vident in Arelatenſi,
quod mihi [niſi me valde amo] videre videor.
Vident illi in Auguſtini Concilio œcumenicitatem;
equidem ipſe video plenitudinem, œcumenicity-
tem non video [liceat mihi hac voce uti græco fon-
te cadenti, & parce detorta.] Contra non vident
in Arelatenſi Concilio œcumenicitatem quam ſi me
probe videre affirmem, jam tum me hallucinatum
dicent; at ſi etiam demonſtrem, jam non amplius
hal-

hallucinatus fuero. Num Augustinus quum conjicit de illius Concilii robore, & auctoritate statim de generali Concilio, non de plenario intelligendus erit? aut si de plenario, num etiam œcumenico? quis hoc dicat nisi verborum proprietatis, & Augustiniani loquendi moris ignarus? Nam si *Plenarium* Concilium eatenus accipias, quatenus ad *Generale* traducas, jam tum nimium mihi rigidus eris interpres; nam *Plenarium* severe acceptum neminem excludit; atque ita duo consequuntur minime consentanea, & satis inepta. Alterum: nullum Concilium in Ecclesia fuisse plenarium; alterum: Augustinum neque Arelatense, neque Nicænum Concilium respexisse, sed tantum imaginarium. Vides ergo *plenarii* notionem eam esse, quæ & Metropolitico, & Patriarchico, & Œcumenico Concilio peræque aptari possit; quod si Generali attribuas, non alia plane ratione tribuere potes quam analogiæ, seu proportionis; & *geometrice*, ut ajunt, non *arithmetice*; nam si arithmetice sumas, in idem recidis absurdum modo propositum; nimirum nullum Concilium fuisse plenarium. Quod si *plenarium* geometrice accipias, ut plane accipiendum, quid obstat cur Concilium ex universo Occidente coactum, quin & quodvis Provinciale Concilium *Plenarium* geometrice non dicatur. Quo sensu Augustinus ad magnum Donatistarum Episcoporum numerum, qui ad Bagajense Concilium convenere animum advertens, vocat illud *plenarium*. At *plenarium Donatistarum* reponit Natalis Alexander. Ita sane fuerit, ut Alexander ominatur,

tur, per me licet; ergo potiori jure Arelatense Concilium dici potuit *plenarium Catholicorum*. Dixi potiori jure, quod Arelatem non Catholici modo, sed & Schismatici cum Catholicis una convenire. Sed Augustinus, observat Alexander, Concilium dixit plenarium *Ecclesiæ universæ: Totius Orbis: cunctarum Gentium*. O lepidam animadversionem? quasi ad Nicænum, quin & ad ipsum Lateranense IV., quod fuit omnium Conciliorum frequentissimum, *ecclesia universa, Totus Orbis, cunctæque Gentes* arithmetice, non geometrice convenierint; quasi novum fuerit: amplissimam hanc nobilissimamque plagam, quæ est ad Occidentem solem, Terrarum Orbis nomine Augustini temporibus nuncupari, ut probe animadvertit Sirmondus in notis posthumis ad Concilium Arelatense I. Quis igitur vetat adducta ex Augustino ab Alexandro loca, Alexandri exemplo explicare de Concilio plenario Totius Orbis Occidentalis, Ecclesiæ universæ Occidentalis, cunctarum Gentium Occidentalium. Quis Augustinum vetare potuit ita cunctas gentes, totumque Orbem usurpare quemadmodum frequentissime Cicero eadem nomina usurpavit, quoties quidpiam cum laude, & gloria gestum commemorandum fuit, aut populi multitudo appellanda; utrobique enim universum Terrarum Orbem, cunctasque gentes exaggerando passim advocat, sed neque ob id ad Indos, & Garamantes, quin nec intra Europæ fines ad Germanos maxima ex parte id temporis ignotos, & ad populos qui sunt sub Septemtrionibus mentem appu-

pulisse arbitror. Haud aliter Augustinus Arelatensem Synodum plenarium universæ Ecclesiæ, totius Orbis, cunctarumque Gentium iudicium per excessum appellavit, in rebus enim gravissimis commemorandis non tam modus attenditur, quam finis. At finis Augustino propositus in plenarii illius Concilii mentione, non alius sane fuit, nec esse potuit, quam Donatianæ litis cessatio, ac terminus. Clarissime vero Augustinus lib. 2. in lit. Petil. cap. 92. ait Constantinum Cæsarem in Arelatensi Civitate Synodum indixisse, ut a Donatistis mota quæstio *multorum interventu finem posset accipere*. Annon mathematicè demonstravi Arelatensis Concilii plenitudinem?

XXVI. Nunc alterum aggredior, ejusdemque Synodi œcumenicitatem pene sub oculis ponere confidentius polliceor. Equidem satis mirari non possum, viros ceteroquin doctissimos, & emundatæ naris, perperam, ne dicam temere, id tutissime docere extra omnem controversiam, neminem unum Orientalium Episcoporum ad Arelatensem Synodum accessisse. Bone Deus! Quibusnam affirmantibus documentis istud conjiciunt? Porro sex extant monumenta, unde Arelatensium Patrum numerus, & Provinciæ, erui possint. I. Augustini locus lib. pr. cont. Epist. Parmen. cap. 1. II. inscriptio Epistolæ Synodicæ missa a Patribus Arelatensibus ad Silvestrum R. P. III. Subscriptiones Patrum. IV. Epistola Constantini Imperatoris ad Chrestum Syracusanum Episcopum. V. Testimonium Concilii Arelatensis Secundi can. 18. VI. De-

nique vetustissimi ejusdem Concilii Arelatensis primi Codices. Quæ breviter, & singulatim sunt expendenda.

Primum itaque Augustini textus loco citato sic habet: *Usque adeo dementes sunt homines, ut ducentos Judices, apud quos victi sunt victis litigatoribus credant postponendos?* Sed hunc numerum CC. temere ab Amanuensibus affixum observat doctissimus Valesius; siquidem ibi Augustinus agit non de Arelatensi, sed de Romano Concilio, cui Optato Milevitano Auctore quindecim dumtaxat Itali, ac tres Galli interfuerunt. Neque tanti est Pagii conjectura ex Augustini contextu pro Arelatensi, ut quod hic explicat de condemnatis Donatistis ab Hispanis & Gallis per judicii Synodici dictionem, affirmari nequeat de communione ab iisdem cum Catholicis Afris servata invisis Donatistis. Codex Vaticanus non habet *To ducentos Judices*, sed *ut contra Judices*, quam lectionem secuti sunt Editores Maurini. Præterea suspicatur Cardinalis Norisius Arelatensem hanc Synodum nomine tenus Augustino cognitam fuisse; quam suspicionem tamen confirmamus, non statim concluditur non potuisse Augustinum ad hanc Synodum mentem adjungere, etenim ob eam ipsam conjecturam nec ad Nicænum, cujus acta Augustinum latuerunt, mentem adjicere potuisset.

Secundum ac Tertium monumentum, inscriptio nimirum Synodicæ Epistolæ, & Patrum subscriptiones, non magnum plerumque momentum afferunt. In hac vero Synodo omnino nullum, se-
cum

cum enim pugnat ; quandoquidem in inscriptione Synodicae numerantur XXXIII. in subscriptionibus vero XLIV. non est itaque tribus hisce prioribus monumentis nimis confidendum. Tria posteriora mihi supersunt expendenda : quibus fides longe major habenda erit propter auctoritatem , & scientiam eorum , qui hæc tradunt .

Fides vero non dubia , & maxima tribuenda est testimonio Constantini Imperatoris in Epistola ad Chrestum Siracusanorum Episcopum , quem invitat ad Synodum Arelatensem , quo convenisse scribit *Episcopos diversis Provinciis prope infinitis* . Ecquis verius Constantino tantam hanc , & innumerabilem Episcoporum multitudinem testari potuit ? quippe qui non modo summam rerum omnium potestatem haberet , sed & Religionis studio ad hanc Synodum conficiendam stimulos Episcopis addiderit , & com meatum suppeditaverit . Quid autem magis vero consonum , & Constantini prudentiæ accommodatius ? quam aliquot saltem Orientales Episcopos Arelatem expedire , tum ut quotidianam inquietorum hominum querimoniam generali Episcoporum suffragatione tandem aliquando interciperet ; tum etiam ut de rebus in Concilio gestis certior fieret . Sentio quid huic sententiæ repugnantes mihi insurserint : Heus tu qui paullo ante tot mendaciorum Eusebium postulasti . Annon hanc Epistolam Constantini unus tradit Eusebius lib. 10. Hist. Eccl. cap. 5. ? Eusebium enim vero calumniæ postulavi , fortassis etiam convici ; at si in hac Epistola Eusebium

falsitatis arguerem injurius ipse forem & calumnians. Eusebium falsum dixi, callidum, vafum, dolosum, veteratorem, atque adeo perfidum; sed stolidum, sed sui, suorumque immemorem, sed amentem tandem dixi nunquam. Sed sane stolidus fuisset Eusebius, quin & amens, si Imperatoris literas etiam tum inter vivos agentis, aut supposuisset, aut adulterasset. Sui item, suorumque omnino immemor fuisset, si tot tantorumque Episcoporum numero foederatorum Donatistarum causam infirmasset. Quin etiam quod Eusebius Arianæ factionis Signifer, & Donatianæ Patronus tam amplum Arelatensium Patrum numerum tametsi generatim proposuerit, magno est argumento; adeo perspectum eum numerum toto Oriente fuisse, ut nulla foret aut in reticendo utilitas, aut minuendi facultas. Quid ad hæc Alexander? Reponit secus a Sirmondo verti; qui pro *infinitis compluribus* substituit. Quid mea si Sirmondus secus vertit atque Valesius celeberrimus Eusebii Interpres, græcarumque literarum peritissimus? tametsi ejus epistolæ versionem, quæ ex Apographo P. Sirmondi eruta est, Sirmondi esse non probet; Qui autem probet, cum Sirmondus stet contra Alexandrum pro Arelatensi? cui si tale ac tantum documentum defuisset, ob contortam vocis *ἀπὸ Sirmonδος* significationem, ab judicio ferendo vir prudentissimus temperasset. Neque vero hic agendum: quomodo Sirmondus verterit, sed quomodo vertendum fuerat. Fortasse vir modestus, & cautus quum eam epistolam latine redderet [si

tamen reddidit] receptissimam intuens eorum sententiam, qui Synodum Arelatensem plenariam esse inficiabantur a vera ejusdem vocis significatione abstinuit, amplissimamque temperavit, quæ jam occupatas hominum mentes turbare posset, fidemque retardare. Quod si maturius vir solertissimus rem expendisset, ut ex notis posthumis ad Arelatense Concilium videtur deinceps expendisse, non dubito quin pro *compluribus infinitis* cum Valesio reposuisset. Ceterum adjectum illud ἀπὸ πολλῶν numerum innumerabilem significare, sive *infinitum* per Valesium, sive *indicibile* per Nicolajum, [cujus plurimum intereretur, ut numerum, quam poterat, arctissimum præferret] non alio teste utar, quam Natali ipso Alexandro, qui aut sui immemor, aut re accuratius expensa, & quod ad Sæculi. III. scripserat, ad IV. expungens, Dissert. IV. Quæst. II. tres adhibet ad Nicolaji versionem responsiones. Sunt autem istæ. „ At primo cur „ reddere debuit Interpres *indicibilibus? potius* quam „ *innumerabilibus?* cum vox græca ἀπὸ πολλῶν utrum- „ que æquo jure significet, ut vel ipsa vocabula- „ ria græca evolventi perspicuum esse potest, quæ „ vocem illam utroque significato a Demosthene „ usurpatam notant? „ Secundo: qua ratione indicibilia loca illa dici „ possunt, nisi quia sunt innumera? An quia pa- „ rum nota? Id sibi fingat quisquis potest &c. Ter- „ tio. Loca illa parum nota non sunt omnes mun- „ di partes, & regiones prope infinitæ: at Conci- „ lium II. Arelatense convocatum ait istam Syno-

„ dum ex omnibus mundi partibus ; ergo non ea
 „ ratione *indicibilia* scribit Eusebius , quod essent
 „ parum nota , sed quod essent prope innumera .
 Hæc Alexander , & ad rem plane ; sed sibi ipse
 reponat , an P. Nicolajo non facile dixerim .

Quintum documentum pro Arelatenfis Læcumenicitate suggerit Arelatenſe 11. can. 18. in quo Primum recensens in eodem Arelatenſi oppido coactum ſic habet : *ad eam urbem ex omnibus Mundi partibus ſub S. Marini tempore legimus celebratum fuiſſe Concilium, atque Conventum.* Quibus in verbis non tantum admirabilem Epiſcoporum multitudinem obſervare lubet , ſed & teſtimonii firmitatem , & certitudinem ; teſtantur enim ſe *legiſſe*. Teſtificantur autem auctoritate ſynodica jure jurando devincta , nam ea teſtificatio Canoni inſerta eſt , ex conſequenti non ob unius , aut alterius lectionem , ſed ob lectionem publicam , & generalem , quæ , ut fidem Synodicam nanciſceretur , eſſe debuit firmiſſimi alicujus documenti , nec ſane alterius , quam Codicis auctographi ejusdem Concilii , quem ſimillimum vero eſt ad perpetuum ac ſummum Arelatenſis Eccleſiæ , & Civitatis ornamentum , poſt annos 131. diligentiffime , ut par erat , ab Arelatenſibus aſſervatum fuiſſe . Annon hæc Arelatenſis Synodi teſtificatio *ex omnibus Mundi partibus* reſpondet alteri Conſtantinianæ epiſtolæ *e diverſis Provinciis prope infinitis* ? Annon utrobique duo præcipua adjuncta indicantur ? mira Provinciarum diverſitas , & innumerabilis Epiſcoporum multitudo . At inquirunt : Sententia iſthæc de innumerabili Arelaten-

ten-

tensum Patrum multitudine nova est, & perpau-
corum. Risum teneam? Qui demum nova puta-
ri potest quæ vetustissimis monumentis innititur?
Quid si perpauci permultos convincerent? non an-
tiqua, non communia dicenda sunt, sed vera;
nec dicenda solum, sed & probanda. Ipsi vero
ecquam afferunt probationem numeri longe mino-
ris, & Provinciarum tantummodo Occidentalium?
Hoc ego satis imputo: viros ceteroquin oculatissimos,
Norisium præsertim, Pagium, & Nicolajum e sex
monimentis, quæ Arelatensium Patrum numerum
respiciunt, tria priora jam adducta, & expensa,
quæ nihil momenti habent, ad Cælum evehere;
tria vero posteria, quæ firmissima, & inconcussa
sunt, floccifacere.

Denique sextum, idemque novissimum monu-
mentum e pulvere, ac tenebris eruamus, codices
inquam antiquiores Concilii Arelatensis I. quorum
tres extant MS. unus Corbejensis, alter Morba-
censis Cænobii, tertius Parisiensis S. I., in quibus
sexcenti Episcopi ad Arelatensem Synodum con-
venisse dicuntur. Primus itaque sic habet in indi-
ce testimonio Petri Constantii Tom. pr. Epist. Ro-
man. Pontif. pag. 341. *Epistola sexcentorum Episco-
porum ad Silvestrum Papam de diversis ordinationi-
bus*. Et ad calcem epistolæ expliciunt *Canones*,
quos fecerunt DC. Episcopi in Civitate Arelatensi.
Deinde in altero Synodica epistola sic inscribitur:
*Domino SS. Fratri Silvestro cætus Episcoporum Sex-
centorum, qui adunati fuerunt in Oppido Arela-
tensi*. In Parisiensi vero: *Concilium Arelatense I.*
sex-

sexcentorum Episcoporum, in quo statuti sunt Canones XXII., quorum auctor maxime Silvester Urbis Romæ Papa per Legatos, & S. Marinus Arelatenfis Episcopus extiterunt. Adstipulatur huic numero Ado Viennensis in Chronico. Forsitan quispiam dixerit: Quanti faciendos putas tres tantum Codices præ tot millibus, in quibus sexcentissimus iste numerus non deprehenditur? enimvero tanti, quanti tres homines loquela præditos, & prudentia, præ infinita mutorum hominum multitudine; nec sane pluri quam tres athomi quæ sunt in hac rerum universitate præ altero Mundo qui non existit. At isti Augustinianæ mentis contortores quanti sibi faciendum putant depravatum Augustini locum obscurum & ambiguum, præ indubitatis & perspectissimis testimoniis Imperatoris piissimi, & Gallicani receptique Concilii? nempe tanti, quanti faciendus esset homo suspectæ fidei præ duobus viris ornatissimis, & probatissimis, in quibus sit eximia virtus cum summa auctoritate conjuncta. Anne sentiunt omnes sibi dialecticas, & criticas, quin & ethicas præceptiones invertendas esse, atque miscendas? ut unicum quod illis superest in Augustino perfugium non tutum, non firmum, sed collabens, seu jam collapsum, quo jure, quare injuria propugnent.

Cardinalis Norisius in Histor. Donat. mense superiori Veronæ excusa Typis Tumarmanianis part. pr. cap. 10. ægerrime tulit, Launojum Adonem secutum sexcentos Episcopos Arelatenfi Synodo adjudicasse; pluribus iccirco verbis, multa que erudi-

ditione ex Collatione Carthaginensi quaesita conatus est Arelatensis Concilii amplitudinem imminuere. In magna [inquit] collatione Carthaginensi tertiæ diei cap. 347. hæc habentur : *Offerunt Donatistæ conditum a Patribus suis de Cæciliani damnatione Decretum, & hoc iubente Iudice recitatur.* Et cap. 368. dixere Donatistæ : *Si de sententiis dictis nemo dubitat, Cæcilianus jure damnatus est.* Quid tum pro Cæciliano Catholici egere ? non Arelatense illud Launoji plenarium universæ Ecclesiæ Concilium Synodo Donatistarum opposuere, sed Synodum Romæ a Melchiade celebratam, in qua Cæciliano purgato, Synodi Donatianæ acta rescissa sunt. Et cap. 456. hæc leguntur. *Alia documenta Imperatorii judicati super absolutione Cæciliani.* Quod si Arelatensis Synodus fuisset plenarium universæ Ecclesiæ Concilium, grandi imprudentia Catholici in propria causa prævaricati fuissent, qui Synodo LXX. Episcoporum novendecim Patrum sub Melchiade conventum opposuere, non vero Concilium, cui *transmarini omnes Episcopi interfuerunt* ut ait Launojus pag. 21. cap. 3. in Appendice, nempe quæ habuit Episcopos *plures quam trecentos decem* pag. 16. ibidem. Ita Norisius. Sed hæc Scriptoris præstantissimi animadversio multimodis peccat.

Primum in eo peccat, quod latius progrediatur quam velit Auctor, cui tantum illud propositum erat, ut numerum Arelatensium Patrum longe minorem suaderet atque Launojus jactitabat. At si Norisianæ conjecturæ fidem adhibeamus, jam

inde consequitur, Concilii Romani Iudices sub Miltiade non modo suppetes, verum etiam numerosiores fuisse Arelatensibus. Repugnat autem Constantini cautioni in epistola ad Chrestum, in qua monet ex Valesii versione, Donatistas *prolate jam sententiae acquiescere noluisse, afferentes paucos admodum Episcopos sententiam tulisse*. Itaque Norisii conjectura non inficit Arelatensis Concilii numerum, sed auctoritatem, quam tamen inficere non redolet Norisianam sapientiam.

Secundo. Norisiano postulato alterum opponere quærit ille: cur Catholici in Cæciliani purgatione Concilii Arelatensis Acta non protulerint, sed Romani? Quæro & ipse. Cur Catholici in dissidio super Anabaptismo, quod erat alterum, & potissimum Collationis caput, Nicænum Canonem non produxerunt? An altum in collatione Carthaginensi de hoc Canone silentium derogat auctoritati, & existimationi Nicenæ Synodi? qui ergo deroget Arelatensi? Addo & alterum postulatum. Cur Augustinus in Collatione habita cum Fortunio Donatista, cum ipsi a Fortunio Sardicenses Canones objicerentur, Nicænum Canonem non opposuit? sinat jam Norisius me verbis suis eum referire. Quod si Nicæna Synodus omnium hæreticorum baptismata præter Paullianum ratum habuisset, grandi imprudentia Augustinus in propria causa prævaricatus fuisset, qui pseudo-Synodo Philippopolitana Nicænum plenarium, totius Orbis, universæ Ecclesiæ, cunctarum Gentium non opposuit. Norisius difficultatem non adimit, sed

au-

auget. Verum tamen si hanc spectes collationem, inter Nicenam Synodum, & Arelatensem illud interest, quod Nicæni mentionem omnino omiserit; Arelatense autem meminerit, ut ex Augustino in Breviculo Collationis diei tertiæ; neque casu, ut Norisius autumat sibi prospiciens, difficultatemque declinans, sed ad rem plane, & de industria, Augustino recensente. *Et recitatum est iudicium Constantini, quemadmodum se inter partes causam cognovisse ad Eumalium Vicarium Africae scripsisset, quod remotis omnibus Arbitris Cæcilianum innocentem, illos calumniosissimos cognovisse testatus est, commemorans etiam in Arelatenfi Oppido pro Cæciliano factum Episcopale iudicium, cui iudicio jam plurimi ex dissensione consenserant, reliquis adhuc desilientibus, & discordantibus; unde ipse de re tota coactus est judicare.* Nec multum refert in gestis collationis ampliorem non fieri mentionem, immo nullam Synodi Arelatenfis; etenim gesta majori ex parte interciderunt; in indiculo vero Capitulorum plurima indicantur capitula, in quibus opportune, & ad rem satis Arelatenfis Concilii iudicium recitari, & pertractari potuit. Recitatum vero, & pertractatum fuisse Augustinus tradit, cujus Breviculum Collationis III. diei merito pro supplemento actorum Collationis appositum est a Labbzo. Quod autem Augustinus videatur Norisio Arelatensem Synodum nomine tenuis attigisse, atque obiter, non multum habet momenti: Tum quod tamen si ita foret, ut Norisius opinatur, id non esset

præter Augustini institutum in hoc Breviculo, in quo compendio excipit ea, quæ in Collatione fuscè gesta, & pertractata sunt. Tum etiam quod si res quæpiam gesta compendio excipiantur, satis enarrari censetur, si principalia ejusdem rei adjuncta percurrantur verius quam recenseantur; quo pacto Augustinus præcipuas, tametsi summatum, Arelatenſis Concilii circumſtantias retexuit; commemorat siquidem efficientem causam, finem, locum, & effectus. Hanc porro Epistolam Constantinensi ad Eumalium tanti fecit Augustinus, ut illius meminerit in fine libri ad Donat. post Collat. & lib. 3. Cont. Cresconium cap. 71.

Instet quis cum Norisio; sed tamen casu perleſta est. Sit plene ut Norisius observat, secus semper erit ac Norisius concludit. Nam ex fortuita Imperatoris epistolæ lectione id colligit Norisius: Afris vel Catholicis Arelatenſe Concilium non magno in pretio fuisse. Profecto si de quopiam alio ab Norisio Scriptore ageretur, liberius reponerem id non esse divinare, sed mentiri: sed eximii Scriptoris amplitudo, & sapientia vetant; ne quid gravius proloquar. Profecto si Auctor dignitate, ac scientia Eminentissimus laudatum Augustini locum, a se contra Launojum, seu verius contra Arelatenſe Concilium adductum, medullitus introspexisſet, non dubito, quin vir Clarissimus omnino abſtinuiſſet tum ab eo iudicio, quod de modica apud Afros Arelatenſis Concilii existimatione pronunciavit: tum ab ea postulatione: cur Catholici Romanum potius sub Miltiade Concilium, quam Arelatenſe

in magna collatione proposuerint? nam duplius hujusce conjecturæ alteram iniquam, ineptam alteram arguit Augustinus i psis ejusdem verbis ab Norisio citatis, non recitatis. Primum namque relevat Augustinus ex Concilio Arelatenſi, quamquam obiter citato, brevissime quidem, sed tamen relevat, quicquid Catholicorum causæ emolumento esse poterat; cumque de Cæciliani purgatione ageretur maxime, ita monet: *Commemoramus etiam in Arelatenſi Oppido pro Cæciliano factum Episcopale judicium; cui judicio jam plurimi ex dissensione consenserant.* Deinde e vestigio causam innuit, cur Catholici in ea Collatione, Arelatenſi judicio non nimium confusi fuerint? quod nimirum Donatistæ ab Arelatenſium Patrum sententia ad Imperatorem impudentissime provocaverint. Quam provocationem, tametsi Constantinus exhorruerit, recipere tamen coactus est, ac remotis arbitris per se judicare. En Augustinus *Reliquis adhuc episcopali judicio facto in Arelatenſi Oppido desilientibus, & discordantibus, unde ipse de re tota coactus est judicare.* Quo demum coactus? nisi impudentia, perversa, susurrantibus, & obtreptionibus Donatistarum: prudenter itaque Catholici Acta Arelatenſia in magna Collatione non exhibuerunt, non quod exigua foret, ut Norisio placet, Synodi Arelatenſis auctoritas, & existimatio; sed quod maxima, & hæreditaria dignosceretur Donatistarum temeritas, atque audacia. Quid enim proficeret ejus Concilii propositio, a quo Majores Donatistarum impie appellaverant?

Protulerunt autem Romanum sub Miltiade, a quo Donatistas non appellasse egregie docet Norisius ipse contra Baronium cap. 9. part. 1., & quidem ex Augustino, nec Tillemontius omnino dissentit. Sin autem Catholici ad Arelatenſe judicium confuſiſſent; jam tum a ſuſcepto Conſilio deſciviſſent; id enim ſibi animo propoſuerant; ut Donatiſtarum moras, ac tergiverſationes interciperent, qui ut Collationem eluderent *queſtiones interponebant morarum pleniffimas* ut ait Aug. in Collat. III. dici cap. 17. *quia nihil aliud niſi mora querebantur.* cap. 16. iccirco factorum diſquiſitionem ſedulo, atque adeo prudentiſſime declinabant, eorum præcipue quæ contentioſa forent, cauſæque diſtinctionem remorarentur. Hinc etiam magis ac magis neceſſitas elucet duo illa ſystemata Catholicorum, Auguſtini præſertim, contra Donatiſtas diſcernendi, quæ niſi quis dividat, in re Donatiana identidem labatur oportet.

XXVII. Pagius ad An. Ch. 314. id habet cum Noriſio commune quod Episcopos CC. ex Auguſtini loco, nondum a PP. Benedictinis correcto, Arelatenſi assignat; id vero præcipuum, quod Concilium hoc non plenarium, non provinciale, velut in collectione Conciliorum inſcribitur, ſed Patriarchale Concilium Occidentis appellat. At Pagii judicium ſpecioſius eſt Noriſiano, non firmius. Nam pace tanti viri dixerim, eum neque Auguſti mentem aſſecutum, neque tam ſedulo ut ſolet, Concilii Arelatenſis finem perpendiſſe. Mens quippe Auguſtini eo in loco non alia fuit, quam tale
Conſ.

Concilium proponere; cui placidissimus Cyprianus facile acquievisset: *Quum enim secutum se dicat sententiam dicti Concilii, hac adtestatione satis ostendit, multo magis se fuisse commemoraturum, si quod de hac re Transmarinum, vel universale Concilium factum esset.* Sane si dixisset *vel transmarinum, vel universale* sub ea duplici disjunctione dubio procul *Transmarinum*, seu *Occidentale* ab *universali* secrevisset; quum vero sub unica disjunctione pronunciaverit: *Transmarinum, vel Universale*, quis vetat ita Augustinum interpretari, ut ea particula *vel* semel posita sit potius explicans quam disjungens? Neque illud obest, quominus universale Arelatense Concilium vocitetur, non ex omnibus Terrarum plagis, ab Oriente præsertim Episcopos eo convenisse; [et si hoc maxime donemus Pagio]; nam iis demum conveniendum fuerat, qui ad præcipuum ejusdem Conventus finem conducere possent. Potissima autem Arelatensis Synodi convocandæ ratio, retractatio certe fuit causæ Cæciliani, ac propterea quæstio facti primario loco agebatur, secundo vero fidei causâ. Quid, proinde causæ subesse poterat Orientalibus Patribus, ut ad Arelatense Concilium accederent? Qui enim eam facti causam judicarent, quam omnino ignorabant? Ac proinde quis jure inficietur Arelatense Concilium fuisse *totius Orbis judicium*, quum ex universo Terrarum Orbe ii demum Episcopi convenerint, qui juridice causam cognoscere poterant, quam sibi compertam habebant. Quin si Orientales Episcopi convenissent una cum Occiden-

dentalibus, jam tum Silvester R. P. & Constantinus Imperator operam lussent; agendum quippe erat cum Donatistis hominibus callidissimis, ac turbulentissimis, qui non re, sed verbo ad Episcoporum judicium provocabant, qui si damnerentur ab altero Episcopali judicio, jam tum parati erant ad causandum in Judicibus vel partium studium, vel facti nescientiam, vel judiciarias formulas; ita namque Romani Concilii sententiam causati sunt. Quid enim optatius contingere poterat Donatistis, qui nodum in scirpo quærebant, quam ut Orientales Episcopi Arelatem ad ipsos judicandos accederent, quo confidentius ab Arelatensium judicio provocarent? Fuiſſet igitur non modo prudentis œconomix, sed & necessitatis, ne nova frustrandæ operæ occasio Donatistis præberetur, Orientales Ecclesiæ Patres Arelatenſi Concilio prohibere.

XXVIII. Itaque si nominationem Arelatenſi Concilio a Pagio attributam confirmemus, consequens est; neminem unum Orientalium Patrum ei Synodo interfuisse. Sit ita sane. Quid postea? Annon amplius plenaria sit? Voces illam quam libet Patriarchalem, per me licet, ego plenariam, & generalem vocitare non cesso: quod ut faciam Auctorem habeo Cardinalem Jacobatum de Conciliis lib. 2. quæst. 11. in apparatu ad Concilia Labbæi. Profecto qui ad plenarii œcumenicæ appellationem omnium Episcoporum ex Univerſo Terrarum Orbe convectionem desiderant, non animadvertunt, quorsum hæc evadat illorum seve-

ritas; nimirum ut nova nominatio Concilio ipsi Nicæno adscribenda sit, nec amplius Plenarium, & Œcumenicum, sed Patriarchale totius Orientis sit vocitandum. Quin & si illius denominatio a præcipuo jure, quod obtinet Summus Pontifex super Orientalem Ecclesiam sumenda sit, non amplius Patriarchale, sed Archiepiscopale totius Orientis sit plane dicendum; has enim peculiare denominationes Episcopo Universali, omnium primo, ac summo tribui video; quam apposite, & prudenter non video. Neque est quod Pagius, & Pagio affines Nicolajus & Norisius; Nicænorum Patrum numerum mihi obtrudant, & ex Orbe universo convocationem, & congregationem; nemo siquidem mortalium hoc mihi persuadebit ad Nicænam Synodum ex toto Terrarum Orbe fuisse Episcopos convocatos, multo etiam minus congregatos, ad quam vix dimidium Græcorum Patrum, & Orientalis ipsius Ecclesiæ convenit. Ex Occidentalibus vero, tametsi Patrum subscriptionibus fidem accomodemus, demptis Apostolicæ Sedis Legatis, unum Nicasium ex Gallia Episcopum reperio, fortasse ob peculiaria suæ Ecclesiæ negotia ad Imperatorem profectum, vel Constantinum ex Gallia in Orientem reducis Comitem, eaque de causa tum, quum indictum Concilium est in Oriente commemorantem. Unumque ex Afris Cæcilianum, fortasse & ipsum ob Donatistarum injurias vitandas, ac sese five apud Cæsarem, five apud magnam Synodum magis magisque purgandum in Orientem profectum, Egregie pronun-

ciavit Cicero de Pythagoreis lib.pr. de Nat. Deor. *Tantum* apud Pythagoreos opinio prejudicata poterat, ut etiam sine ratione valeret auctoritas. Enimvero, ut cetera prætermittam, quæ ad rem non pertinent, video notiones tam præjudicatas a Vulgo Theologorum de Concilio Generali efformari, ut homines ceteroquin Doctissimi, quos ego honoris causa reticeo, hac præventionē abrepti, cito, ne dicam oscitanter, eas receperint; & quod magis mirere, si factū opus fuerit, secus judicarunt, sibi que contraria sunt prolocuti. Audi Pagium ad An. 381. de Synodo Constantinopolitana I. hæc exarantem: *Porro hæc Synodus a Theodosio Magno convocata. Quam* convocationem multis probat, dein subdit: *Denique si Theodosius Damasum consulisset, is procul dubio Legatos ad hanc Synodum misisset, & ad eam Episcopos Occidentis convocasset. Quare vi convocationis solius Orientis Synodus fuit, & tantum ex postfacto œcumenica Synodus extitit, Damaso, totaque Occidentali Ecclesia hanc illi suo consensu dignitatem, & auctoritatem tribuentibus.*

XXIX. Nunc ad hominem, ut ajunt, libet contra Pagium argumentari. Concilium Constantinopolitanum I. celebratum fuit a CL. Orientalibus, insciente S. Damaso Papa, ac propterea nec ipsius Legatis pro eo ibidem præsidentibus; sed aliquo Orientali Patriarcha, seu Meletio Patriarcha Antiocheno, seu Timotheo Patriarcha Alexandrino, seu tandem Nestario Episcopo C. P.^{no} Nemo unus Occidentaliū Episcoporum ei Synodo interfuit, attamen ex postfacto Œcumenica

extitit Damaso, totaque Occidentali Ecclesia consentientibus [largiamur Pagio hanc Damasi & Occidentalis Ecclesiae consensionem, quam ipse ingenio suo divinavit, repugnantibus duobus Romanis Pontificibus, iisdemque Magnis, ac Sanctissimis] Atqui Synodus Arelatenfis celebrata fuit ab innumeris Episcopis, [Occidentalibus omnibus an etiam Orientalibus, habeo ipse quo affirmem, non habet Pagius quo neget] sive a CC. tantum Episcopis [ut morem Pagio omnino geramus] consensu Summi Pontificis [ut ex literis Synodicis.] Presidentibus ejusdem Legatis [ut ex Actis Conciliaribus.] Ab ipso eodem Pontifice confirmata, & ab universa Orientali Ecclesia recepta fuit. Ergo tametsi nemo unus Orientalium Episcoporum interfuisset, nihil vetat quo minus & Arelatenfis Synodus generalis, & œcumenica nuncupetur. Thesis est Pagii, omniumque Criticorum, qui verius Baronio de C. P. I. Synodo conjiciunt. Difficultas cubat in postrema assumpti particula, videlicet, an Synodus Arelatenfis ab universa Orientali Ecclesia recepta fuerit? Hoc vero tam proclivum est probare quam duo meminisse. Alterum: Arelatensem Synodum primario loco convocata fuisse pro dijudicanda Cœciliani ordinatione, secundo vero pro Anabaptismo damnando. Alterum: Cœcilianum, de quo liserat in Arelatenfi, quive ab ejusdem Patribus innocens, & rite ordinatus pronunciatus est, Nicæno Concilio interfuisse. Concilium igitur Nicænum primum confirmavit Cœciliani ordinationem, quem ad sus-

fragandum in Concilio recepit. Cavendum quippe fuit, & quidem diligentissime tum Episcopis Orthodoxis, tum etiam Constantino Augusto, ne obtentu illegitimæ suffragationis ansa daretur Ariani captiosissimis criminandi Concilii statuta, ab eoque ad aliud provocandi. Secundo ratum habuit [Pagio cæterisque fatentibus] omnium hæreticorum baptismum, præter Paullianum, quæ altera fuere Arelatenfis Synodi controversia. Recepit itaque Nicæna Synodus tum quoad jus, tum quoad factum Concilium Arelatense: ergo potiori jure quam Synodus Constantinopolitana I. Concilium Arelatense I. Plenarium, Generale, & Œcumenicum esse, ac dici potuit.

XXX. Dixi potiori jure, non modo quoad majorem Episcoporum numerum, & quoad formulas convocationis, & celebrationis; verum etiam quoad promptiorem, amplioremque acceptionem, quam videre est apud Magnum Leonem in Epistola ad Anatholium Ecclesiæ C. P.^{næ} jura ex eadem Synodo, & ex nova Chalcedonenfi vendicantem, adversum quam C. P.^{nam} ita se exerit Pontifex eximius: *Persuasioni enim tuæ in nullo penitus suffragatur quorundam Episcoporum ante septuaginta, ut jactas annos, facta subscriptio.* Et apud Magnum item Gregorium lib. 6. epist. 31. *Romana Ecclesia eosdem Canones, vel gesta Synodi illius [subde C. P.^{næ} I.] hætenus non habet, nec accipit. In hoc autem eandem Synodum accipit, quod est per eam contra Macedonium definitum.* Satis denique perspectum est C. P.^{nos} Canones non nisi

nisi post sæcula fere octo in Lateranensi IV. sub Innocentio III. ab Occidentali Ecclesia recepta fuisset. Hinc duo consequuntur. Primum: si rem circumstantia consideres, potiori jure quam C.P.^{no} I. Concilii Plenarii, & Œcumenici notionem Arelatensi I. congruere. Alterum: verum Concilii Generalis, & Œcumenici ideam ex duobus potissimum efformandam esse: ex numero Episcoporum congruenti, qui ex variis nationibus acciti sunt; & ex Romani Pontificis confirmatione. Quæ ab nuperimo Defensore declarationis Gallicanæ de Synodo Nicæna I. a Romano Pontifice non confirmata jactantur, frivola sunt, cavillosa, & falsa, quæ non est hic refutandi locus. Nunc illud attigisse sufficiat: Gallicanum Apologistam, quicumque tandem ille sit, muscas omnino venari, quandoquidem non erubescit ad novam, atque ipsis Gallicis ante turbulentissimum sæculum XIV. inauditam sententiam firmandam, locum ex Eusebio lib. 3. de Vita Constantini, atque alium ex ejusdem Constantini Epistola ad Alexandrinam Ecclesiam in rem suam adducere, in quibus recensetur Constantini testimonium de ineluctabili Trecentorum Episcoporum judicio, quod Dei sententiam vocitat; perinde ac si tanti esset Neophyti hominis pronuntiatio, quæ robustissimam sententiam de necessaria per Romanum Pontificem Concilii Œcumenici confirmatione, confringere posset; equidem non improbo Constantini judicium, quod verissimum usquequaque fuisse enimvero ajo, sed ineptam Gallicani scriptoris argumentationem. Fortas-

se non desit , qui me pluribus verbis quam par
esset in Augustini mente explananda immoratum
existimet . At si propositæ quæstionis gravitatem ,
ejusque solvendæ necessitatem sagaciter pervestiga-
verint , me sibi purgatum fore confido . Multum
quippe intererat ad susceptæ disceptationis institu-
tum rem plane novam , sed veram tamen resera-
re : nimirum nullam in sensu Donatiano super bap-
tismo hæreticorum controversiam a Græcis Patri-
bus ante Nicænum fuisse constitutam , nullamque
per Nicænum in ipso eodem sensu diremtam . Mul-
tum etiam oberat ad novam assertionem confir-
mandam notissimus Augustini locus , quem utpo-
te generalibus verbis conceptum , ac proinde ex-
plicatu difficilem , magis etiam implexum , & ir-
volutum crebræ , & eruditæ Doctissimorum Ho-
minum concertationes effecerant , Launoji præser-
tim , qui pro Arelatenfi , & Nicolai , qui pro
Nicæno disceptavit .

XXXI. Antequam hoc caput absolvo novissi-
mum argumentum subjicio , quo ex Concilia-
rium sanctionum ordine , contentionum Epochas de
Anabaptismo , numerumque constituo . Quod ut
clarius , præstem , multiplices de baptismo contro-
versias post Nicænum subortas breviter attingam . S.
Athanasius paullo post Nicænum celebratum de
Arianorum baptismo dubitavit , quod rescisset ,
Arianos baptismum ministrare : *In nomine Patris
majoris , & Filii minoris* : occasionem nactus ex
damnato per Nicænum Paullianistarum baptismo ,
a quorum signifero Paulo Samosatensi suæ hære-
seos

seos summam Ariani mutuati fuerant . Exemplo S. Athanasii, ipso e vivis sublato dubitari ceptum est de Novatienensium Baptismo, quod illius nec expressa rejectio, nec confirmatio expressa in Nicæno deprehenderetur, sed per necessariam dumtaxat consecutionem, quapropter complures Asiæ Episcopos Laodicæam convenisse oportuit, quibus ratum fuit Novatianensium baptisma. Hinc non pauci Orientalium Patrum, ac præcipue Magnus Basilius, animadvertentes, Novatianensium Lavacrum acceptius feliciusque fuisse pauliano, de baptismo reliquarum sectarum, quæ fidem de Trinitate commaculabant, ambigere ceperunt. Hæc item dubitatio a Concilio C. P. I. paullo post Basili mortem sublata est; ab eo siquidem Eunomianorum, Sabellianorum, & Cataphrygum baptimus repudiatus est; normaue recipiendi Novatianenses, reliquosque Hæreticos Evangelicam formulam custodientes definita.

Nunc ordine præpostero ex Conciliaribus damnationibus contentionum ordinem ita conjicio. Synodus C. P.^{na} I. ejuravit Eunomianorum, ac Sabellianorum baptismum; quod hic in quæstionem a Magno Basilio vocatus fuisset. Concilium Laodicænum abdicavit Cataphrygum, ac Photinianorum baptismum, de quo lis mota erat post Nicænum. Ac demum Nicænum irritum fecit Paulianistarum baptismum, quod ante illius celebrationem in Oriente in contentionem venerat. Ex hac gradatione perspicue satis colligitur, Novatianensium, aliorumque his affinium hæreticorum baptismum

ptissimum ante Concilii Nicæni tempora non fuisse a Catholicis Episcopis oppugnatum; neque prius de eo dubitatum, quam Nicæni Patres de cuiuspiam baptismi virtute dubitassent.

XXXII. Sed obistere videtur Magnus Basilius Epist. pr. ad Amphilochoium cap. i., in quo sic scribit. *Verum enimvero Antiquis visum est Cypriano dico, & nostro Firmiliano eos omnes uno calculo subicere.*

Respondeo multa deprehendi apud Basilium de baptismo hæreticorum minus idonea, & secum pugnantia, quæ depravationem aliquam textus non obscure indigitant. Utcumque res se habeat, dico S. Basilium abreptum, deceptumque fuisse Eusebii Cæsariensis historia, cujus auctoritas plurima erat apud Orientales, idque ex supposita tum Eusebii, tum Donatistarum traditione sibi persuasum habuisse, inde potissimum conjicere licet, quod æqualem Cypriani, ac Firmiliani mentionem fecerit, quam tamen Græcus homo de Latino Scriptore, perinde ac de Græco sibi in Cæsariensi Sede Decessore, haud facere potuit. Deinde quod ibi affirmet S. Dionysium Alexandrinum Firmiliano, atque Heleno nunquam non repugnasse, fraterne tamen, & veluti Firmiliani, atque Heleni apud Romanam Sedem sequestrum fuisse; id aperte ex Eusebio exscripsit. Quis autem serio credat Paulianistarum; & Cataphrygum baptismum ab eximio Dionysio fuisse receptum? adeo ut si fides Basilio habenda sit, omnino sit credendum, Stephanum Papam, & Xistum Stephani successorem

rem Montanistarum, & Paullianistarum baptismum approbasse; Firmilianum contra, atque Helenum Novatianensium baptismum juxta ac Montani, & Paulli Samosatani respuisse; quod ne ipsi quidem Basilio eadem epistola probatur.



M

CA-

CAPUT II.
FIRMILIANI
EPISTOLA SIGILLATIM,

Et per suas partes discutitur, variisque conjecturis
confictionis arguitur.

EXEMPLUM EPISTOLÆ
S. FIRMILIANI
A D
S. CYPRIANUM.

*Firmilianus Cypriano Fratri in Domino
salutem.*



Accipimus per Rogatianum carissimum nostrum Diaconum a vobis missum, literas, quas ad nos fecisti frater dilectissime, & gratias propter hoc domino maximas egimus: quod contigerit, ut qui corpore ab invicem separamur, sic spiritu adunemur; quasi non unam tantum regionem tenentes,

res, sed in ipsa atque in eadem domo simul inhabitantes. Quod & decet dicere, quia & spiritalis domus Dei una est. Erit enim in novissimis, ait propheta, diebus, manifestus mons domini, & domus dei super vertices montium. In quam convenientes cum jucunditate adunantur, secundum quod & in psalmo hoc postulatur a domino inhabitare in domo Dei per omnes dies vitæ. Unde & in alio loco manifestatum est, esse apud Sanctos magnam voluntatis caritatem, in unum convenire. Ecce, inquit, quam bonum, & voluptabile est, ut habitent fratres in unum. Adunatio enim, & pax, & concordia, non solum hominibus fidelibus, & cognoscentibus veritatem, sed & Angelis ipsis cælestibus voluptatem maximam præstat: quibus dicit sermo divinus, esse gaudium in uno peccatore poenitentiam agente, & ad unitatis vinculum revertente. Quod utique non diceretur de Angelis, conversationem in cælis habentibus, nisi ipsi quoque essent nobis adunati, qui nostra adunatione lætantur: sicut e contrario utique contristantur, quando vident diversas quorundam mentes, & scissas voluntates, quasi non tantum unum, & eundem Dominum simul invocent, sed separatis, & divisus ab invicem nec confabulatio jam possit esse, aut sermo communis. Nisi quod nos gratiam referre Stephano in isto possumus: quod per illius inhumanitatem nunc effectum sit, ut fidei, & sapientiæ vestræ experimentum caperemus. Sed non, si nos propter Stephanum hanc beneficii gratiam cœpimus, statim Stephanus bene-

M 2

ficio,

ficio, & gratia digna commisit. Neque enim & Judas perfidia sua, & prodicione, qua scelerate circa Salvatorem operatus est, dignus videri potest, quasi causam bonorum tantorum ipse præstiterit, ut per illum mundus, & gentium populus liberaretur. Sed hæc interim quæ ab Stephano gesta sunt, prætereantur, nedum audaciæ & insolentiæ ejus meminimus, de rebus ab eo improbe gestis longiorem mæstitiam nobis inferamus. De vobis autem cognoscentes, quod secundum regulam veritatis, & sapientiam Christi, hoc de quo nunc quæritur disposueritis? cum magna lætitia exultavimus, & Deo gratias egimus, quia invenimus in fratribus tam longe positis tantam nobiscum fidei, & veritatis unanimi-
tatem. Potens est enim gratia Dei copulare, & conjungere caritatis, atque unitatis vinculo, etiam ea, quæ videntur longiore terrarum spacio esse divisa. Secundum quod & olim intervallo temporum separatos ab Job & Noe qui in primis fuerant, Ezechielem, & Daniele, posteriores ætate ad unanimi-
tatis vinculum virtus divina conjunxit; ut quamvis temporibus longis discreti essent, eadem tamen divina inspiratione sentirent. Quod & nunc in vobis animadvertimus, ut qui longissimis regionibus a nobis separati estis, sensu tamen, & spiritu copulatos vos esse nobiscum probaretis. Quod totum hoc fit divina unitate. Nam cum Dominus unus atque idem sit qui habitat in nobis, conjungit ubique, & copulat suos vinculo unitatis. Unde in universam terram exivit sonus eorum,
qui

qui a Domino missi sunt unitatis spiritu velociter
currentes. Sicut e contrario nihil prodest, aliquos
proximos & junctos sibi esse corporibus, si animo,
& mente dissideant; quando adunari animarum omni-
no non possint, quæ se a Dei unitate diviserint :
Ecce enim, inquit, qui longinquant se abs te,
peribunt : sed tales judicium Domini pro merito
suo subibunt, recedentes a verbis ejus qui Patrem
pro unitate deprecatur, & dicit : Pater da ut quo-
modo ego & Tu unum sumus, sic & hi in nobis
unum sint, Nos vero ea, quæ a vobis scripta
sunt, quasi nostra propria suscipimus, nec in tran-
scursu legimus, sed sæpe repetita memoriarum man-
davimus: neque obest utilitati salutari aut eadem
retexere ad confirmandam veritatem, aut & quæ-
dam addere ad cumulandam probationem. Si quid
autem a nobis additum fuerit, non sic additur,
quasi a vobis aliquid minus dictum sit; sed quoniam
sermo divinus humanam naturam supergreditur,
nec potest totum, & perfectum anima concipere.
Idcirco & tantus est numerus prophetarum, ut
multiplex divina sapientia per multos distribuatur.
Unde & tacere præcipitur, primo in prophetia lo-
quenti, si secundo fuerit revelatum. Qua ex cau-
sa necessario apud nos fit, ut per singulos annos
seniores, & præpositi in unum conveniamus ad
disponenda ea, quæ curæ nostræ commissa sunt :
Ut si qua graviora sunt, communi consilio diri-
gantur; lapsis quoque fratribus, & post lavacrum
salutare a diabolo vulneratis per pœnitentiam me-
dela quæzatur; non quasi a nobis remissionem pec-
cato.

catorum consequantur, sed ut per nos ad intelligentiam delictorum suorum convertantur, & Domino plenius satisfacere cogantur. Quoniam vero legatus iste a vobis missus regredi ad vos festinabat, & hibernum tempus urgebat; quantum potuimus ad scripta vestra rescripsimus. Et quidem quantum ad id pertineat quod Stephanus dixit, quasi Apostolicos, qui ab hæresi veniant baptizari prohibuerint, & hoc custodiendum posteris tradiderint, plenissime vos respondistis; neminem tam stultum esse qui hoc credat Apostolos tradidisse, quando etiam ipsas hæreses constet execrabiles, ac detestandas postea exitisse. Cum & Marcion Cerdonis discipulus inveniatur sero post Apostolos, & post longa ab eis tempora, sacrilegam adversus Deum traditionem induxisse. Apelles quoque blasphemiarum ejus consentiens, multa alia nova, & graviora fidei, ac veritati inimica addiderit. Sed & Valentini, & Basilidis tempus manifestum est, quod & ipsi post Apostolos, & post longam ætatem, adversus Ecclesiam Dei sceleratis mendaciis suis rebellaverint. Cæteros quoque hæreticos constat pravas suas sectas, & inventiones perversas, prout quisque errore ductus est, postea induxisse; quos omnes manifestum est a semetipsis damnatas esse, & ante diem judicii inexcusabilem sententiam adversus semetipsos dixisse: quorum baptisma qui confirmat, quid aliud quam cum ipsis se adjudicat, & se ipse participem talibus faciendo condemnat? Eos autem qui Romæ sunt non ea in omnibus observare quæ sint ab origine tradita, & frustra Apostolorum auctoritatem præten-

de-

dere : scire quis etiam inde potest , quod circa celebrandos dies paschæ , & circa multa alia divinæ rei sacramenta, videat esse apud illas aliquas diversitates, nec observari illic omnia æqualiter, quæ Hierosolymis observantur. Secundum quod in ceteris quoque plurimis provinciis, multa pro locorum, & hominum diversitate variantur ; nec tamen propter hoc ab Ecclesiæ Catholicæ pace atque unitate aliquando diceffum est . Quod nunc Stephanus ausus est facere, rumpens adversum vos pacem, quam semper antecessores ejus vobiscum amore, & honore mutuo custodierunt : adhuc etiam infamans Petrum, & Paullum beatos Apostolos, quasi hoc ipsi tradiderint ; qui in epistolis suis hæreticos execrati sunt, & ut eos evitemus, monuerunt . Unde apparet traditionem hanc humanam esse, quæ hæreticos asserit, & baptisma quod non nisi solius Ecclesiæ est, eos habere defendit . Sed & ad illam partem bene a vobis responsum est, ubi Stephanus in epistola sua dixit [*Hæreticos quoque ipsos in Baptismo convenire, & quod ad alterutrum ad se venientes non baptizent, sed communicent tantum*] quasi & nos hoc facere debeamus. Quo in loco, & si vos jam probastis: satis ridiculum esse, ut quis sequatur errantes, illud tamen ex abundanti addimus : non esse mirum si sic hæretici agant, qui, & si in quibusdam minoribus discrepant, in eo tamen quod est maximum, unum & eundem consensum tenent, ut blasphement creatorem, quædam somnia sibi, & phantasmata ignoti Dei confingentes: quos utique consequens est, sic consentire in baptis-

mi

mi sui vanitate , ut consentiunt in repudianda divinitatis veritate . De quibus quoniam longum est ad singula eorum vel scelestā , vel supervacua respondere ; satis est breviter illud in compendio dicere , eos qui non teneant verum Dominum Patrem , tenere non posse , nec Filii , nec Spiritus Sancti veritatem . Secundum etiam illi qui *καταφρυγας* appellantur , & novas prophetias usurpare conantur , nec Patrem possunt habere , nec Filium , nec Spiritum Sanctum ; a quibus si quæramus : quem Christum prædicent , respondebunt : eum se prædicare qui miserit Spiritum , per Montanum , & Priscam locutum . In quibus cum animadvertamus non veritatis Spiritum , sed erroris fuisse ; cognoscimus eos qui falsam illorum prophetiam contra Christi fidem vindicant , Christum habere non posse . Sed & ceteri quique hæretici , si se ab Ecclesia Dei sciderint , nihil habere potestatis , aut gratiæ possunt ; quando omnis potestas , & gratia in Ecclesia constituta sit , ubi præsident majores natu , qui & baptizandi , & manum imponendi , & ordinandi possident potestatem . Hæretico enim sicut ordinare non licet , nec manum imponere , ita nec baptizare , nec quicquam sancte , nec spiritaliter gerere , quando alienus sit a spiritali & deifica Sanctitate . Quod totum nos jam pridem in Iconio , qui Phrygiæ locus est , collecti in unum , convenientibus ex Galatia , & Cilicia , & cæteris proximis regionibus confirmavimus , tenendum contra hæreticos firmiter , & vindicandum ; cum a quibusdam de ista re dubitare-

taretur . Et quoniam Stephanus & qui illi consentiunt , contendunt dimissionem peccatorum , & secundam nativitatem in hæreticorum baptisma posse procedere , apud quos etiam ipsi confitentur Spiritum Sanctum non esse ; considerent , & intelligant , spiritalem nativitatem sine spiritu esse non posse : secundum quod & beatus Paullus Apostolus , eos qui ab Joanne baptizati fuerant , priusquam missus esset a Domino Spiritus Sanctus , baptizavit denuo spiritali baptismo , & sic eis manum imposuit , ut acciperent Spiritum Sanctum . Quale est autem , ut cum Paullum post Johannis baptisma iterato discipulos suos baptizasse videamus ; nos eos qui ab hæresi ad Ecclesiam veniunt , post illicitam , & prophanam eorum tinctionem baptizare dubitemus ? Nisi si his Episcopis , de quibus nunc , minor fuit Paulus ; ut hi quidem possint per solam manus impositionem venientibus hæreticis dare Spiritum Sanctum . Paullus autem idoneus non fuerit , qui ab Johanne baptizatis Spiritum Sanctum per manus impositionem daret , nisi eos prius etiam Ecclesiæ baptismo baptizasset . Illud quoque absurdum , quod non putant querendum esse , quis sit ille qui baptizaverit , eo quod qui baptizatus sit , gratiam consequi potuerit invocata Trinitate nominum Patris & Filii & Spiritus Sancti . Deinde hæc erit sapientia quam scribit Paullus esse in his qui perfecti sunt . At quis est in Ecclesia perfectus & sapiens , qui hoc aut defendat , aut credat , quod invocatio hæc nominum nuda sufficiat ad remissionem peccatorum ,

N

&

& baptismi sanctificationem! cum hæc tunc utique proficiant, quando & qui baptizat habet Spiritum Sanctum, & baptismus quoque ipsum non sit sine Spiritu constitutum. Sed dicunt, eum qui quomodo-
 docunque foris baptizatur, mente, & fide sua, baptismi gratiam consequi posse: quod & ipsum sine dubio ridiculum est, quasi de cælo adducere ad se possit, aut mens prava iustorum sanctificationem, aut fides falsa credentium veritatem. Non omnes autem qui nomen Christi invocant, audiri, & invocationem suam consequi aliquid gratiæ posse, Dominus ipse manifestat dicens: Multi venient in nomine meo dicentes: Ego sum Christus, & multos fallent. Nulla quippe differentia est inter pseudo, prophetam, & hæreticum. Nam ut ille in nomine Dei, aut Christi, ita iste in Sacramento baptismi fallit. Mendacio uterque nititur, ad decipiendas hominum voluntates. Volo autem vobis & de historia quæ apud nos facta est, exponere ad hoc ipsum pertinente. Ante viginti enim & duos fere annos, temporibus post Alexandrum Imperatorem, multæ istic conflictationes, & prefuræ acciderunt, vel in commune omnibus hominibus, vel privatim Christianis; terræ etiam motus plurimi, & frequentes extiterunt, ut per Capadociam, & per Pontum multa subruerent, quædam etiam civitates in profundum receptæ disrupti soli hiatu devorarentur, ut ex hoc persecutio quoque gravis adversum nos Christiani nominis fieret: Quæ post longam retro ætatis pacem repente oborta, de inopinato & insueto malo ad-
 tur-

turbandum populum nostrum terribilior effecta est. Serenianus tunc fuit in nostra provincia Præses, acerbus & dirus persecutor. In hac autem perturbatione constitutis fidelibus, & huc atque illuc persecutionis metu fugientibus, & patrias suas relinquentibus, atque in alias partes regionum transeuntibus (erat enim transeundi facultas, eo quod persecutio illa, non per totum mundum, sed localis fuisset) emerfit istic subito quædam mulier, quæ in extasi constituta, prophetem se præferret, & quasi Sancto Spiritu plenâ sic ageret. Ita autem principalium dæmoniorum impetu ferebatur, ut per longum tempus sollicitaret, & deciperet fraternitatem, ac mirabilia quædam, & portentosa perficiens, & facere se terram moveri polliceretur. Non quod dæmoni tanta esset potestas, ut terram movere, aut elementum iussu valeret; sed quod nonnunquam Spiritus nequam præsciens, & intelligens terræ motum futurum, id se facturum esse simularet, quod futurum videret. Quibus mendaciis, & jactationibus subegerat mentes singulorum, ut sibi obedi-
rent, & quocunque preciperet, & duceret sequerentur: faceret quoque mulierem illam cruda hyeme nudis pedibus per asperas nives ire, nec vexari in aliquo, aut lædi illa discursione: diceret etiam se in Judæam, & Hierosolymam festinare fingens tanquam inde venisset. Hic & unum de præbyteris Rusticum; item & alium Diaconum fefellit, ut eidem mulieri commiscerentur, quod paullo post detectum est. Nam subito apparuit

illis unus de exorcistis vir probatus, & circa religiosam disciplinam bene semper conversatus, qui exhortatione quoque fratrum plurimorum, qui & ipsi fortes, ac laudabiles in fide aderant excitatus, crexit se contra illum spiritum nequam revincendum: qui subtili fallacia etiam hoc Paulo ante prædixerat, venturum quendam aversum, & tentatorem infidelem. Tamen ille exorcista inspiratus Dei gratia fortiter restitit, & esse illum nequissimum Spiritum, qui prius Sanctus putabatur ostendit. Atqui illa mulier; quæ prius per præstigiâs, & fallacias dæmonis, multa ad deceptionem fidelium moliebatur, inter cetera quibus plurimos deceperat, etiam hoc frequenter ausa est; ut & invocatione non contemptibili sanctificare se panem, & eucharistiam facere simularet, & sacrificium Domino sine Sacramento solitæ prædicationis offerret; baptizaret quoque multos usitata, & legitima verba interrogationis usurpans, ut nil discrepare ab ecclesiastica regula videretur. Quid igitur de hujus baptismo dicemus, quo nequissimus dæmon per mulierem baptizavit? Nunquid & hoc Stephanus, & qui illi consentiunt comprobant? maxime cui nec Symbolum Trinitatis, nec interrogatio legitima, & Ecclesiastica defuit? Potest credi aut remissio peccatorum data, aut lavacri salutaris regeneratio rite perfecta, ubi omnia quamvis ad imaginem veritatis tamen per dæmonem gesta sunt? Nisi si & dæmonem in nomine Patris, & Filii, & Spiritus Sancti gratiam baptismi dedisse contendunt, qui

qui hæreticorum baptisma defendunt . Apud quos
 sine dubio idem error est, dæmonum fallacia ipsa
 est; quando apud illos omnino Spiritus Sanctus
 non est. Illud etiam quale est; quod vult Stepha-
 nus, his qui apud hæreticos baptizantur, adesse
 præsentiam, & Sanctimoniam Christi? Nam si
 non mentitur Apostolus dicens. Quotquot in Chri-
 sto tincti estis, Christum induistis: utique qui il-
 lic in Christo baptizatus est, induit Christum:
 si autem induit Christum, accipere potuit &
 Spiritum Sanctum, qui a Christo missus, est, &
 frustra illi venienti ad accipiendum Spiritum ma-
 nus imponitur: nisi si a Christo Spiritum induit,
 ut apud hæreticos sit quidem Christus, non sit
 autem illic Spiritus Sanctus. Decurramus vero
 breviter, & cetera, quæ a vobis copiose, & ple-
 nissime dicta sunt, festinante vel maxime ad vos
 Rogatiano Diacono charissimo nostro. Sequitur
 enim illud, quod interrogandi sunt a nobis qui
 hæreticos defendunt, utrum carnale sit eorum ba-
 ptisma, an Spirituale. Si enim carnale est, nihil
 differunt a Judæorum Baptismo, quo sic illi utun-
 tur, ut eo tanquam communi, & vulgari lava-
 cro tantum sordes laventur. Sin autem Spiritale
 est: quomodo apud illos esse baptisma Spiritale po-
 test, apud quos Spiritus Sanctus non est? Ac per
 hoc aqua qua tinguntur, lavacrum est illis carna-
 le tantum, non baptismi Sacramentum. Quod si
 baptisma hæreticorum habere potest regeneratio-
 nem secundæ nativitatis; non hæretici, sed Filii
 Dei computandi sunt, qui apud illos baptizan-

tur. Secunda enim nativitas, quæ est in baptismo, Filios Dei generat. Si autem sponsa Christi una est, quæ est Ecclesia Catholica; ipsa est quæ sola generat Dei filios. Neque enim multæ sponsæ Christi; cum dicat Apostolus: Despondi vos uni viro virginem castam assignare Christo, & : Audi filia & vide, & inclina aurem tuam, & obliviscere populi tui: quia desideravit rex speciem tuam, & Veni sponsa de Libano, advenies, & pertransibis a principio fidei, & : Ingressus sum in hortum meum soror mea, sponsa: videmus unam personam ubique proponi, quia & sponsa est una. Non est autem una nobiscum hæreticorum synagoga, quia nec sponsa est adultera & fornicaria; unde nec potest filios Dei parere. Nisi si secundum quod Stephano videtur, hæresis quidem parit, & exponit: expositos autem Ecclesia suscipit: & quos non ipsa pepererit pro suis nutrit, cum filiorum alienorum mater esse non possit. Et ideo Christus Dominus noster unam esse manifestans sponsam suam, & unitatis ejus Sacramentum declarans, ait: Qui non est mecum, adversus me est, & qui non mecum colligit, spargit. Si enim nobiscum est Christus, hæretici autem non sunt nobiscum; pro certo adversus Christum sunt hæretici. Et si non colligimus cum Christo, non colligunt autem nobiscum hæretici, sine dubio spargunt. Sed nec illud præterendum est a nobis, quod a vobis necessario dictum est, quod Ecclesia secundum Canticum Canticorum, hortus sit conclusus, & fons signatus,

tus, paradísus cum fructu pomorum. Qui autem nunquam in hunc hortum introjerunt, neque paradísus a Deo plantatum viderunt, quo modo de fonte qui intus inclusus est, & divino sigillo signatus est, aquam vivam lavacri salutaris præbere alicui poterunt? Cum vero & archa Noe nihil aliud fuerit quam Sacramentum Ecclesiæ Christi, quæ tunc omnibus foris pereuntibus eos solos servavit, qui intra archam fuerunt; manifeste instruimur ad Ecclesiæ unitatem perspiciendam, quemadmodum & Apostolus Petrus posuit dicens: Sic & vos similiter salvos faciet baptisma, ostendens, quoniam quomodo qui cum Noe in archa non fuerunt, non tantum purgati & salvati per aquam non sunt, sed statim diluvio illo perierunt: sic & nunc quicumque in Ecclesia cum Christo non sunt, foris peribunt, nisi ad unicum & salutare Ecclesiæ lavacrum per pœnitentiam convertantur. Qualis vero error sit, & quanta sit cœcitas ejus, qui remissionem peccatorum dicit apud Synagogas hæreticorum dari posse, nec permanet in fundamento unius Ecclesiæ, quæ semel a Christo supra petram solidata est; hinc intelligi potest, quod soli Petro Christus dixerit. Quæcumque ligaveris super terram, erunt ligata & in cœlis: & quæcumque solveris super terram, erunt soluta & in cœlis: & iterum in Evangelio quando in solos Apostolos insufflavit Christus dicens: Accipite Spiritum Sanctum: si cujus remiseritis peccata remittentur illi: & si cujus tenueritis, tenebuntur. Potestas ergo peccatorum remittendo.

dorum Apostolis data est, & Ecclesiis quas illi a Christo missi constituerunt, & Episcopis, qui eis ordinatione vicaria successerunt. Hostes autem unius Catholicæ Ecclesiæ in qua nos sumus, & adversarii nostri qui Apostolis successimus, sacerdotia sibi illicita contra nos vindicantes, & altaria prophana ponentes; quid aliud sunt, quam Chore, & Dathan, & Abiron, pari scelere sacrilegi, & easdem quas & illi pœnas daturi cum his qui sibi consentiunt; secundum quod etiam tunc illorum participes, & fautores pariter, cum eis perierunt. Atque ego in hac parte juste indignor ad hanc tam apertam, & manifestam Stephani stultitiam, quod qui sic de Episcopatus sui loco gloriatur, & se successionem Petri tenere contendit, super quem fundamenta Ecclesiæ collocata sunt, multas alias petras inducat, & Ecclesiarum multarum nova ædificia constituat, dum esse illic baptisma sua auctoritate defendit. Nam qui baptizantur, complent sine dubio Ecclesiæ numerum. Qui autem baptisma eorum probat de baptizatis, & Ecclesiam illic esse confirmat. Nec intelligit obfuscarî a se, & quodammodo aboleri Christianæ petræ veritatem, qui sic prodit, & deserit unitatem. Judæos tamen quamvis ignorantia cæcos, & gravissimo facinore constrictos, zelum Dei Apostolus habere proficitur; Stephanus qui per successionem cathedram Petri habere se predicat, nullo adversus hæreticos zelo excitatur: concipiens illis non modicam, sed maximam gratiæ potestatem, ut dicat eos & asse-

asseveret per baptismi Sacramentum sordes veteris hominis abluere, antiqua mortis peccata donare, regeneratione cœlesti filios Dei facere, ad æternam vitam divini lavacri sanctificatione reparare. Qui sic magna, & cœlestia Ecclesiæ munera hæreticis concedit, & tribuit; quid aliud quam communicat eis, quibus tantum gratiæ defendit, ac vindicat? Et frustra jam dubitat in ceteris quoque consentire eis, & particeps esse, ut & simul cum eis conveniat, & orationes pariter cum eisdem misceat, & altare, ac sacrificium commune constituat. Sed in multum, inquit, proficit nomen Christi ad fidem, & baptismi sanctificationem, ut quicumque, & ubicunque in nomine Christi baptizatus fuerit consequatur statim gratiam Christi; quando huic loco breviter occurrere possit, & dici, quoniam si in nomine Christi valuit foris baptisma ad hominem purgandum, in ejusdem Christi nomine valere illic potuit, & manus impositio ad accipiendum Spiritum Sanctum. Et incipient cetera quoque quæ apud hæreticos aguntur, justa, & legitima videri, quando in nomine Christi gerantur; secundum quod vos in Epistola vestra exsecuti estis: non nisi in Ecclesia sola valere posse nomen Christi, cui uni concesserit Christus cœlestis gratiæ potestatem. Quod autem pertinet ad consuetudinem refutandam, quam videntur opponere veritati; quis tam vanus sit ut veritati consuetudinem præferat? aut qui perspecta luce tenebras non derelinquat? Nisi si, & Judæos Christo adventante, idest, veri-

O

tate,

tate , adjuvat in aliquo antiquissima consuetudo ; quod relicta nova veritatis via in vetustate permanerint . Quod quidem adversus Stephanum vos dicere Afri potestis , cognita veritate errorem vos reliquisse . Ceterum nos veritati , & consuetudinem jungimus , & consuetudini Romanorum , consuetudinem , sed veritatis opponimus ; ab initio hoc tenentes , quod a Christo , & ab Apostolo traditum est . Nec meminimus , hoc apud nos aliquando cœpisse , cum semper istic observatum sit , ut non nisi unam Dei Ecclesiam nossamus , & sanctum baptisma non nisi sanctæ Ecclesiæ computaremus . Plane quoniam quidam de eorum baptismo dubitabant , qui etsi novos prophetas recipiunt , eosdem tamen Patrem , & Filium nosse nobiscum videntur ; plurimi simul convenientes in Iconio diligentissime tractavimus , & confirmavimus repudiandum esse omne omnino baptisma , quod sit extra Ecclesiam constitutum . Ad Illud autem quod pro hæreticis ponunt , & ajunt Apostolum dixisse . Sive per occasionem , sive per veritatem Christus annuncietur , ut respondeamus , ineptum est ; quando manifestum sit , Apostolum in Epistola sua qua hoc dixit , neque hæreticorum , neque baptismi eorum mentionem fecisse , sed locutum esse de fratribus tantum , sive perfide secum loquentibus , sive in fide sincera perseverantibus : nec oporteat hoc longo tractatu excutere , sed ipsam satis sit Epistolam legere , & quid Apostolus dixerit , de ipso Apostolo recognoscere . Quid ergo inquiunt , fiet de his qui ab hæ-

re-

reticis venientes sine Ecclesiæ baptismo admissi sunt? Si de sæculo exceſſerunt, in eorum numero qui apud nos catechisati quidem sunt, sed priusquam baptizarentur obierunt, habentur. Non modo dicunt emolumentum veritatis, & fidei, ad quam relicto errore pervenerant, & si consummationem gratiæ consecuti non sunt, morte præventi. Qui autem adhuc in sæculo permanent, baptizentur Ecclesiæ baptismo, ut remissionem peccatorum consequi possint; ne per alienam præsumptionem in pristino errore manentes, sine gratiæ consummatione moriantur. Ceterum quale delictum est, vel illorum qui admittuntur, vel illorum qui admittunt; ut non ablutis per Ecclesiæ lavacrum sordibus, nec peccatis expositis, usurpata temere communicatione contingant Corpus, & Sanguinem Domini: cum scriptum sit; quicumque ederit panem, aut biberit calicem Domini indigne, reus erit Corporis, & Sanguinis Domini? Nos etiam illos quos hi qui prius in Ecclesia Catholica Episcopi fuerant, & post modum sibi potestatem clericæ ordinationis assumentes baptizaverant, pro non baptizatis habendos iudicavimus. Et hoc apud nos observatur, ut quicumque ab illis tincti ad nos veniunt, tanquam alieni, & nihil consecuti, unico, & vero Ecclesiæ Catholicæ baptismo apud nos baptizentur, & lavacri vitalis regenerationem consequantur. Et tamen multum interest inter eum, qui invitus, & necessitate persecutionis coactus succubuit, & illum qui sacrilega voluntate audax contra Ecclesiam rebellat, vel in patrem, & Deum

Christi, & totius mundi conditorem impia voce blasphemat. Et non pudet Stephanum hoc asserere, ut per eos qui ipsi in omnibus peccatis sunt constituti, dicat posse remissionem peccatorum dari? Quasi possit esse in domo mortis lavacrum salutis. Ubi, ergo erit quod scriptum est: Ab aqua aliena abstine te, & a fonte alieno ne biberis? Si relicto Ecclesiae fonte signato, alienam aquam pro tua suscipis, & prophanis fontibus Ecclesiam polluis? Quando enim baptismo hæreticorum communicas; quid aliud quam de voragine, & cæno illorum bibis, & ipse Ecclesiae sanctificatione purgatus, alienarum sordium contactibus inquinaris? Nec metuis iudicium Dei, hæreticis testimonium contra Ecclesiam perhibens, cum scriptum sit: Falsus testis, non erit impunitus. Quinimmo tu hæreticis omnibus peior es. Nam cum inde multi cognito errore suo ad te veniant, ut Ecclesiae verum lumen accipiant; tu venientium errores adjuvas, & obscurato lumine Ecclesiasticae veritatis, tenebras hæreticae noctis accumulas. Cumque se illi in peccatis esse, & nil gratiae habere se, ac propterea ad Ecclesiam venire fateantur; tu eis remissionem peccatorum subtrahis quæ in baptismo datur, dum dicis, eos jam baptizatos, & extra Ecclesiam, Ecclesiae gratiam consecutos. Nec intelligis animas eorum de manu tua exquiri, cum iudicii dies advenerit; qui sitientibus Ecclesiae potum negasti: & volentibus vivere, causa mortis fuisti. Et insuper indignaris. Vide qua imperitia repre-

hen.

hendere audeas eos, qui contra mendacium pro veritate nituntur: Quis enim iustius indignari contra alterum debuit? Utrumne qui hostes Dei asserit, an vero qui adversus eum qui hostes Dei asserit, pro Ecclesiae veritate consentit? Nisi quod imperitos etiam animosos atque iracundos esse manifestum est, dum per inopiam consilii, & sermonis ad iracundiam facile vertuntur, ut de nullo alio magis quam de te dicat scriptura divina; Homo animosus parit lites, & vir iracundus exaggerat peccata. Lites enim, & dissensiones quantas parasti per Ecclesias totius mundi? Peccatum vero quam magnum tibi exaggerasti, quando te a tot gregibus scidisti? Excidisti enim te ipsum: noli te fallere. Siquidem ille est vere schismaticus, qui se a communione Ecclesiasticae unitatis apostatam fecerit. Dum enim putas omnes a te abstinere posse; solum te ab omnibus abstinuisti. Nec te informare ad regulam veritatis, & pacis vel Apostoli praecepta potuerunt, monentis, & dicentis; Obsecro ergo vos ego vinctus in Domino digne ambulare vocatione qua vocati estis, cum omni humilitate sensus, & lenitate, cum patientia, sustinentes invicem in dilectione, fatis agentes servare unitatem Spiritus in conjunctione pacis. Unum Corpus, & unus Spiritus, sicut vocati estis in una spe vocationis vestrae. Unus dominus, una fides, unum baptisma: unus Deus, & pater omnium, qui super omnes, & per omnia, & in omnibus nobis. Haec Apostoli mandata, & monita salutaria, quam diligenter. Ste-

phanus implevit, humilitatem sensus primo in loco servans. Quid enim humiliter aut lenius quam cum tot Episcopis per totum mundum dissensisse, pacem cum singulis vario discordiæ genere rumpentem, modo cum orientalibus (quod nec vos latere confidimus) modo vobiscum, qui in meridie estis? A quibus legatos Episcopos patienter facitis, & leniter suscipit; ut eos nec ad sermonem saltem colloqui communis admitteret: adhuc insuper dilectionis, & caritatis memor, præciperet fraternitati universæ, ne quis eos in domum suam reciperet; ut venientibus non solum pax, & communio, sed & tectum, & hospitium negaretur. Hoc est servasse unitatem Spiritus in conjunctione pacis; abscindere se a charitatis unitate, & alienum se per omnia fratribus facere, & contra Sacramentum, & fidem, contumacis furore discordiæ rebellare. Apud talem potest esse unum corpus, & unus Spiritus, apud quem fortasse ipsa anima una non est, sic lubrica, & mobilis, & incerta. Sed quantum ad illum pertinet, relinquamus: excutiamus potius id, de quo maxima quaestio est. Qui contendunt ab hæreticis baptizatos sic recipi oportere, tanquam legitimi baptismi gratiam consecutos; unum nobis atque illis baptismum dicunt esse, & in nullo discrepare. Sed quid ait Apostolus Paulus? Unus dominus, una fides, unum baptismum, unus Deus. Si unum atque idem est cum nostro baptismum hæreticorum; sine dubio, & fides una est: si autem fides una est utique, & Dominus unus: si Do-
mi-

minus unus est , consequens est dicere , quia unus est . Si autem hæc unitas , quæ separari omnino , & dividi non potest , etiam apud hæreticos ipsa est ; quid ultra contendimus ? Ut quid illos hæreticos , & non Christianos vocamus ? Porro cum nobis , & hæreticis nec Deus unus sit , nec Dominus unus , nec una Ecclesia , nec fides una , sed nec unus Spiritus , nec corpus unum ; manifestum est , nec baptisma nobis , & hæreticis commune esse posse , quibus nihil est omnino commune . Et tamen non pudet , Stephanum talibus adversus Ecclesiam patrociniū præstare , & propter hæreticos asserendos , fraternitatem scindere : insuper , & Cyprianum , pseudo-Christum , & pseudo-Apostolum , & dolosum operarium dicere ? Qui omnia in se esse conscius prævenit ; ut alteri ea per mendacium adjiceret , quæ ipse ex merito audire deberet . Bene te valere omnibus nobis , cum universis qui in Africa sunt Episcopis , & cunctis Clericis , & omni fraternitate universi optamus ; ut perpetuo unanimes , & unum sentientes , habeamus nobiscum etiam de longinquo adunatos .



NOTÆ

IN HANC EPISTOLAM

CRITICÆ.

I.

EPIST. *Nisi quod gratiam referre Stephano possumus, quod per illius inhumanitatem nunc effectum sit, ut fidei, & sapientiæ vestræ experimentum caperemus.*

Nos quoque gratiam hujus Epistolæ Auctori referre possumus, quod per illius inhumanitatem nunc effectum sit, ut fidei, sapientiæ, & patientiæ tum Cypriani, tum Firmiliani, de quibus tanta olim erat dubitandi occasio, experimentum caperemus ex tot mendaciorum detectione. Bone Deus, quæ hæc est Episcopi Catholici, & Sanctitatis percelebris præfatio, ut quum primum Stephanum nominare contingit, *inhumanum* vocet? Uno verbo acrius in Stephanum, quam in Serenianum Cappadociæ, & Ponti Præsidem, de quo infra nota XVI. inventus est, quem utpote christianæ fidei persecutorem vocat *acerbum*, & *dirum*. At Stephanum inhumanum dixit, quod sane idem fuit ac dixisse omnis humanitatis expertem, certe quiddam amplius, quam *acerbum*, & *dirum*. Mirum quantum

tum Rigaltius, & Fellus hoc loco abutantur, & quam temere torqueant in Stephanum, quem vere inhumanum fuisse contendunt, secus Firmilianum æquanimem, & quidem fuit; non fuisset vero, si ita scripisset.

II.

Neque enim, & Judas perfidia sua, & prodizione, qua scelerate circa Salvatorem operatus est, dignus videri potest, quasi causam bonorum tantorum ipse præstiterit, ut per illum Mundus, & gentium populus liberaretur.

Proh superum, atque hominum fidem! usque adeo ne debacchatur, ut Stephanus in Petri Cathedra Successor, fidei satis probatz, Christianæ Religionis studiosissimus, cum Juda Christi proditore conferatur? Quæ item comparatio compertæ fidei, & sapientiæ Africanorum Antistitum cum Mundi redemptione? Annon est ex furfure Donatiano? En Augustinus lib. 2. Cont. lit. Petil. cap. 8. *Invidiosissimis verbis, velut captiosus inventor, Judæ nos proditori comparasti.*

III.

Secundum quod, & olim intervallo temporis separatos ab Job, & Noe, qui in primis fuerant Ezechielem, & Daniele posteriores ætate ad unanimatis vinculum virtus divina conjunxit.

Ad Rem Pamelius. *Qua in re idem senserint Noe, & Daniel non potui invenire. Job autem,*

P.

tem,

tem, & Ezechiel de resurrectione carnis idem prophetarunt, ille cap. 10. hic vero 37.

IV.

Nos vero ea, quæ a vobis scripta sunt, quasi nostra propria suscipimus, nec in transcurso legimus, sed sæpe repetita memoriæ mandavimus.

Si non in transcurso legit Cypriani literas, si sæpius lectionem repetiit, si memoriæ mandavit, quomodo subtexit? *Quoniam vero Legatus iste a vobis missus regredi ad vos festinabat, & bi-bernum tempus urgebat, quantum potuimus ad scripta vestra, rescripsimus.* Nisi tantum temporis ei vacabat, ut commode ad Cyprianum rescribere posset, cur non distulit a Cypriano scripta memoriæ mandare post Rogatiani discessum? Ea siquidem utpote latina, nec tam cito, nec tam facile memoriter addisci potuerunt ab homine græco, senè præsertim; proinde nonnihil temporis in eo insumendum fuit, qui labor si non plane irritus, certe non necessarius.

V.

Neque obest utilitati salutari aut eadem retexere ad confirmandam veritatem, aut & quædam addere ad cumulandam probationem.

Neque obest, neque prodest eadem argumenta, quæ quis ad te miserit, illi remittere. *Labor irritus, & nullus effectus*, inquit Cyprianus

nus ad Demetrianum. Quædam vero addere ad cumulandam probationem, quæ minora sint, vel æqualia, nec probare possum, nec improbare aulam.

VI.

Quoniam vero Legatus iste a vobis missus, regredi ad vos festinabat, & hibernum tempus urgebat, quantum potuimus ad scripta vestra rescripsimus.

Quid si Legatus non festinasset? quid si hibernum tempus non urgeret? Quid si quantum vellet rescribere potuisset? Profecto haberemus egregium Luciani imitorem. Quis dubitet ita factum fuisse? Partiatur Lector Epistolam in duas partes, in altera inanem deprehendet argumentorum Cypriani repetitionem: in altera reprehensionem, ut si qua alia, in Stephanum amarulentissimam.

VII.

Et quidem quantum ad id pertineat, quod Stephanus dixit, quasi Apostoli eos, qui ab hæresi veniunt baptizari prohibuerint, & hoc custodiendum posteris tradiderint, plenissime vos respondistis, neminem tam stultum esse, qui hoc credat Apostolos tradidisse, quando etiam ipsas hæreses constet execrabiles, ac detestandas postea extitisse.

Nec plene, nec bene, si ita responsum sit, quod quidem non est eruditissimo Cypria-

no affingendum . Nemo enim tam imperitus est , qui ignoret Apostolorum tempore Simonem Magum, ejusque discipulos Menandrum, Saturninum, & Basilidem extitisse, de quibus Irenæus lib. pr. cap. 20. Nemo item tam stolidus , qui diffiteatur potuisse ab his Ethnicos , aut Judæos baptizari , quibus Spiritus Sanctus pretio promittebatur . Quanquam ab his baptizatos rebaptizandos fuisse existimo , quod baptismi forma , tametsi cum invocatione Trinitatis , nulla videretur ; propterea quod Simon Magus sese totam Trinitatem locis , ac temporibus diversis , esse predicaret . Erant & Nicolaitæ , de quibus Apoc. cap. 2. Erant Phigelus , & Hermogenes , quos meminit Apostolus 2. ad Timot. cap. 1. Erant Hymenæus , & Philetus ib. 2. Erat & Alexander ib. 4. Erant Cherintus , & Ebion , de quibus Irenæus lib. pr. cap. 23. & 26. & lib. 3. cap. 3. contra quos perhibetur Johannes Evangelium suum scripsisse . Qui omnes , qui mos est Hæreticorum , vecordes , suarumque partium propagatores , quis dubitet , quin plurimos in illorum sectam concedentes , baptizarent ? quæ tamen Apostolis inscientibus facta fuisse non est verisimile . Quapropter si ab Apostolis hanc traditionem profectam Stephanus cum Romanis affirmabat , non utique inspiebat , ut petulanter satis innuit Epistolæ locus . Annon hæreses istæ execrabiles sunt , ac detestandæ ? Fateor me nullo pacto percipere potuisse , quo consilio hujus Epistolæ Auctori hæc verba tanta cum licentia exciderint . Miror tamen , Pamelium meo quidem
ju.

judicio adnotatorem omnium accuratissimum , tam supinum errorem non animadvertisse. Contra, sum plane stomachatus, Rigaltium nil prætermittere, quo hujus Epistolæ sententias indetereorem partem utcumque potest, invertat; veluti hanc, de qua agimus, ad traditionem debilitandam clanculum detorquet.

VIII

Cum & Marcion Cerdonis Discipulus inveniatur se-ro post Apostolos, & post longa ab eis tempora sacrilegam adversus Deum traditionem induxisse. Appelles quoque blasphemie ejus consentiens multa alia nova, & graviora fidei, ac veritati inimica addiderit. Sed & Valentini, & Basilidis tempus manifestum est, quod & ipsi post Apostolos, & post longam ætatem, adversus Ecclesiam Dei sceleratis mendaciis suis rebellaverint. Ceteros quoque hæreticos constat, pravas suas Sectas, & inventiones perversas, prout quisque errore ductus est, postea induxisse.

Quorsum hæc tanta eruditio cum tanta novi testamenti ignoratione? Qui negant ignoratum, dicant cur prætermissum. Ex animo iterum fateor, me diu multumque vestigasse, cur Apostoli, qui hujus Scriptoris judicio suorum temporum hæresibus baptismum concesserunt, posterioribus vetassent, nec introspicere potuisse.

Quod ad Basilidem spectat, quem post longam

ætatem ab Apostolorum tempore vixisse tradit ; merito Baronius Auctorem hunc mendacii infimulat . Basilidem quippe Ignatii testimonio epist. 5. ad Tral. , & epist. 10. ad Smyrnen. constat eodem cum Apostolis tempore vixisse .

IX.

Eos autem , qui Romæ sunt , non ea in omnibus observare , quæ sint ab origine tradita , & frustra Apostolorum auctoritatem prætere , scire quis etiam inde potest , quod circa celebrandos dies Paschæ , & circa alia multa divinæ rei Sacramenta , videant esse apud illos aliquas diversitates , nec observari illic omnia equaliter , quæ Hierosolymis observantur .

Vere frustra hic Auctor præterdit Romæ non observari , quæ sint ab origine tradita , scribente ante ipsum Irenæo . *In qua semper conservata est ea , quæ ab Apostolis est traditio .* Et ante hoc ipsum jurgium Clerus Romanus ab Cypriano consultus ita respondit . *Sed antiqua fides disciplina legitur antiqua , quoniam nec tantas de nobis laudes Apostolus protulisset dicendo : Quia fides vestra prædicatur in toto Mundo , nisi jam exinde vigor iste radices fidei de temporibus illis mutuatus fuisset , quarum laudum , & gloriæ degenerem fuisse maximum crimen est .* Sed neque tum , neque antea , neque post , neque tandem in posterum degeneres deprehensi sunt , aut deprehendentur ob severitatem di-

disciplinæ. *Quid enim, antedixerat, aut in pace tam aptum, aut in bello persecutionis tam necessarium, quam debitam severitatem divini rigoris tenere?* Exemplum de Paschæ celebratione, quod subdit, detrahit fidei, & sapientiæ Firmiliani, probat namque, ne dicam præfert Romano mori hæresim Quartadecimanorum jam pridem ante Nicænum Concilium a duobus Romanis, ab uno Gallo, a quatuor Orientalibus damnatam; unico dempto Asiatico Concilio, seu verius Ephesino secundum Baluzium per Episcopum Polycratem coacto. Verum, quid dixi a quatuor? *fere ab infinitis*, teste Eusebio lib. 1. cap. 22. ubi agens de Conciliis pro recta Paschæ celebratione convocatis hæc scripsit. *Aliud porro Ecclesiarum [subde Concilium] Osthoenum, & reliquas in eo loco civitates incolebant. Aliud separatim Baccbilli Ecclesiæ Corinthiorum Episcopi, & alia denique aliorum prope infinitorum, qui uno consensu, judicioque uno eandem de illius Festi observatione tulere sententiam.* Nil etiam huic Artifici suffragatur, quominus vel erroris, vel mendacii insimuletur, quod tempore Firmiliani Paschaitarum error non fuisset plenario Ecclesiæ judicio proscriptus, quandoquidem quod fuerit postmodum a I. Nicæna, & celeberrima Synodo damnatus, magno est argumento jam tum disputatione de anabaptismo æstuante, per totum Orientem repudiatum fuisse morem illum celebrandi Pascha quartadecima Luna mensis primi.

Quod aperte designatur in epistola Constantini
Ma-

Magni ad Ecclesias, de iis, quæ in Concilio Niceno gesta erant ex Euseb. lib. 3. cap. 16. 17. 18., in qua hæc quarto loco adducitur ratio. Consensio omnium Ecclesiarum. *Ipse etiam [scribit.] in me recepi vestram sapientiam facile assensuram, & quod in Urbe Roma, in Italia, in tota Africa, in Ægypto, Hispania, Gallia, & Britannia, in Lybia, & universa Græcia, in Diœcesi Asiatica, & Pontica, in Cilicia denique una, & consentiente sententia conservatur, hoc a Vobis quoque lubentibus animis approbaretur.*

Nemo unus Græcorum Patrum id ausus est affirmare, paschalem Hierosolymorum ritum alium fuisse, atque Romanorum, ne Polycrates quidem ipse in Asiatica illa Synodo, tametsi obtruderet Hieropolitanae, & Ephesinae Ecclesiae morem SS. Philippi, & Johannis Apostolorum institutis conformatum. Quin Narcisus Hierosolymorum Episcopus in Synodo Hierosolymitana. *Super mystico Pascha secundum S. Anicetum, & Victorem pronuntiavit*, ex libello Synodico. Tillemontius excusationem affert, sed minus idoneam. Ait namque hanc rituum varietatem, quam Firmilianus opponit, non quidem de Paschate, sed de multis aliis divinæ rei Sacramentis ad Epistolæ textum esse intelligendum. Equidem nihil miror Scriptorem oculatissimum, quæ offendit hujusce Epistolæ errata, utcunque potest, excusare. Abreptus est Vir Cl. ea opinione, quæ jandiu Doctorum omnium mentibus penitus infederat: Firmilianum scilicet, non quem Sycophantam auctorem fuisse.

se. Ceterum si verborum sensum introspeciamus, id primo objecit, quod gravissimum iudicavit, nimirum. *Quod circa celebrandos dies Paschæ, & circa multa alia videant esse apud illos aliquas diversitates, nec observari illic omnia equaliter, quæ Hierosolymis observantur.* En in quo demum sita est Hierosolymitanæ, & Romanæ Ecclesiæ dissimilitudo. Primum in Paschatis celebratione; dein in multis aliis. Non enim ait, *quod circa celebrandos dies Paschæ videat esse apud nos, sive Orientales aliquas diversitates, nec observari omnia equaliter in Occidente, quæ Hierosolymis observantur.* Ita enim fuerat dicendum, ut locus daretur Tillermontii interpretationi, sed quæ sequuntur apertius innuunt Romanam Ecclesiam conferri eo loco cum Hierosolymitana, quemadmodum in sequenti Hierosolymitana cum aliis ab Romana confertur. *Secundum quod in ceteris quoque plurimis Provinciis multa pro locorum, & hominum diversitate variantur.*

X.

Nec tamen propter hoc ab Ecclesiæ Catholicæ pace, atque unitate discessum est.

Si non est discessum, parum absuit, quin discederetur. Nihil enim magis iratus fuit Stephanus Rebaptizantibus in Oriente, quam Quartadecimani Victor Papa. Ille minitatus est se non amplius iis communicaturum ex Euseb. lib. 7. cap. 3.

Q

Hunc

Hunc item minas non præterveſtum Critici melioris notæ affirmant, merito obſervantes: eundem fuiſſe Dionyſium Alexandrinum cum Stephano pro Rebaptizantibus, atque olim fuerat Irenæus pro Quartadecimanis cum Papa Victore. Quamquam literæ S. Irenæi verius Concilio Lugdunenſi, cui Irenæus præerat, ſint tribuendæ, ut optime advertit V. C. Henricus Valeſius ad lib. 5. Hiſt. Eccl. Eufebii cap. 24. Quam Synodicam ad Victorem epiſtolam in eodem Eufebii libro, & capite videre eſt.

An vero plerique omnes Gallicani Scriptores Victorem inter atque Aſiaticos iccirco pacem ſervatam fuiſſe ominentur, quo Eccleſiæ tranquillitatem Gallicano ſive Epifcopo, ſive Concilio adjudicent, non eſt hic inquirendi locus. Certe nil apertius tradere poterat Eufebius lib. 5. cap. 24. Tamen Vir Cl. Henricus Valeſius Eufebium corrigit, cui etiam Eufebio repugnant Tillemontius, & Alexander, quorum poſterior eo potiſſimum adductus fuit, quod in hac Firmiliani epiſtola ſecus tradatur, & ſane non erat, quod ſibi in Eufebio tantopere blandiretur, vel ipſo Valeſio Auctore, præſertim quum ea, quæ contra facit, facile uſurpari poſſint pro pace non ſervata, ſed reſtituta. Conſultius ergo, & verius pronuncia- vit Pagius: Aſiaticos a Victore fuiſſe communione privatos. Idipſum prædixerat Epiphanius Hæref. 70. cap. 9.

Quod nunc Stephanus ausus est facere, rumpens adversum vos pacem, quam semper Antecessores ejus vobiscum amore, & honore mutuo custodierunt.

Id quidem Stephanus non ausus est facere, sed ipse omnium primus ausus est dicere. Jure namque Baronius negat Stephanum aliquando pacem cum Cypriano, & Afris fregisse. Et sane quamvis ægre tulerit Decretum secundum Concilii Carthaginienſis, graviterque commotus fuerit, ex Eusebio lib. 7. cap. 3., quamvis ut ait Augustinus lib. 5. cont. Donat. cap. 23. *præceperit* ne nihil innovaretur, & anathema illis minatus fuerit; attamen nil quicquam seu a Cypriano, seu a Patribus Concilii III. Carthaginienſis scriptum reperio, judicari unde possit, ipsos a Stephano abstentos fuisse. Idcirco Hieronymus adversus Luciferianos hæc ait de Cypriano: *Sciens illum [subde Stephanum] hæc non cum anathemate eorum, qui se sequi noluerant edidisse, siquidem in communione eorum permansit, qui sententiæ suæ contrairent.* Quid ad hæc Pearsonius? Hieronymum adhuc juvenem eum Tractatum scripsisse. Equidem sic existimo. Si in eo ipso Tractatu, quem Pearsonius ob minus firmam eximii Doctoris ætatem parvipendit, pacem a Stephano fractam fuisse, scriberet Hieronymus, pari ingenio longe aliud fuisse dicturum, quo Hieronymi tametsi junioris dictum magis, magis-

Q 2

que

que stabiliret. Diceret fortasse præproperam ætatem præpropero studio compensari : Res gestas, quas quis junior ennaret, eo credibiliores esse, quo recentiores : Hieronymum eo loco ad hominem, ut ajunt, argumentari contra Luciferianos, qui Luciferi Calaritani Episcopi exemplo confirmati eos Episcopos Sede orbandos existimabant, qui in Ariminensi Concilio Ario consensissent, quamvis errore detecto resipuissent; nec sane potius, neque accomodatius exemplum succurrere potuisse, quam pax a Stephano cum Cypriano, ceterisque Afris custodita. Diceret tandem non cum fuisse id ætatis Hieronymum, qui non animadverteret, nil se profecturum, si factum minime exploratum, neque, ab Ecclesia receptum Luciferanis objiceret. Quid nunc obstat, cur non eadem prorsus ego Pearsonio reponam? Hieronymo juniore consensit aliquanto post Augustinus jam senex rerum illarum Scriptor diligens juxta, ac veridicus, qui lib. 5. de Bapt. contra Donat. cap. 25. de Stephano, & Cypriano hæc diserte perhibuit. *Ita quamvis commotius, fraterne tamen indignarentur, vicit tamen pax Christi in cordibus eorum, ut nullum inter eos schismatis malum oriretur.* Quod Hieronymi, & Augustini dictum ita me persuasum habet, ut verear, ne in duo maxima Ecclesiæ lumina injuriosus sim, si quidpiam addam aliud ad tam magnum atque impudens mendacium refellendum. Qui rationum momenta exquirat adeat Natalem Alexandrum Hist. Eccles. Secul. 3. Dissert. 2 art. pr. Maurinum in Vita Cypriani cap. 32. Pagium, Ba-

ronium, Pamelium, & Schelestratum. Nec probare possum Tillemontii conjecturam opinantis Augustinum secus fuisse dicturum, si Firmiliani Epistolam novisset. Nam quod eximius Doctor ignoraverit, non Augustinum inscientiæ, sed Epistolam confictionis accusat. Præterea Augustinus pluribi docet: iccirco a Deo permissum, ut Cyprianus in eum laberetur errorem; quo facilius tanto exemplo ceteros erudiret ad disceptandum in quæstionibus, quæ ad fidem pertinent, non in contentione, & æmulatione, sed in caritate, & in vinculo pacis, ita lib. 4. de Bapt. cap. 6. lib. 6. cap. 2. lib. 2. cap. 8. Quæ tamen nec toties, nec tam constanter, nec ad rem Christianorum dixisset, nisi de pace utrinque servata certior fuisset. Nec tam patiens fuisset Cyprianus [ut placet iis, qui Epistolam ad Pompejum Cyprianicam faciunt] ut excommunicationis pœnam fusque, deque egisset, egisset autem in tot Epistolis, ni semel saltem sese purgasset; non autem se purgavit; igitur nec subiit.

XII.

Adbuc etiam infamans Petrum, & Paullum Beatos Apostolos, quasi hoc ipsi tradiderint:

Petrum, & Paullum Beatissimos Apostolos nunquam a Stephano infamatos fuisse post annos LXV. Arelatenfis, aut si mavis post LXXVI. Nicæna Synodus I. declaravit. At te insignem, atrocemque labem Firmiliani sapientiæ, & sanctitati

asperfisse, post XV. Sæcula Viri docti sunt suspicati, atque ego omnium primus a te illum sacri lege infamatum fuisse demonstravi; atque adeo infamatum, ut multo laboriosius sit iis, qui a te conficta non animadvertunt, Firmilianum a furore, & schismate, quam ab hæresi Rebaptizantium tueri.

XIII.

Quod totum nos in Iconio, qui Phrygiæ locus est, collecti in unum, convenientibus ex Galatia, & Cilicia, & ceteris proximis Regionibus confirmavimus, tenendum contra Hereticos firmiter, & judicandum, cum a quibusdam de ista re dubitaretur. Et multo post; Plurimi simul convenientes in Iconio diligentissime tractavimus, & confirmavimus: repudiandum esse omnino baptismum, quod sit extra Ecclesiam constitutum.

Jam vero ad anachronismum ventum est. Qui tandem fieri potuit, ut Firmilianus Iconiensi Concilio interfuerit, cum Dionysius Alexandrinus Firmiliano coævus de hac ipsa Baptismi controversia ad Philemonem scribens, sub initium Pontificatus Xisti clarissime indiget, Synodum Iconiensem: *longe tempore ante Episcoporum memoria, qui antegressi sunt celebratam fuisse?* apud Eusebium lib. 7. cap. 6. Nec Pagio acquiesco ad annum Christi 255. num. 15. & 16. existimanti, pro *nomen illud* Nos non de ipsius Firmiliani persona, sed

po-

potius de ejus Deceſſoribus accipiendum. Quamvis enim aliter non ſit accipiendum, aperte ſemel, atque iterum prædicat ſe conveniſſe; Neque cum ad turpem errorem devenitur, ſtatim benigne eſt interpretandum, id namque tum demum temperate uſque eſt agendum, quum alia nulla ſuboritur erroris ſuſpicio, quamvis ne tum quidem a Noſtratibus Criticis, a Pagio præſertim factum comperio, ſi de anachroniſmo agatur. Meminerit itaque Pagius pluralem numerum primæ perſonæ pro ſingulari frequenter, & quidem latine uſurpari, quin & in hac ipſa Epistoſa, de qua diſputamus, uſitatum iterum, ac tertio. Non eſt igitur remiſſius agendum, quum major errandi præbetur occaſio, velut hic perſpicue præbetur; Nam ſi plurali numero pronomen illud *ſe* explicetur, pene ſit judicandum, non modo Firmilianum, ſed & pleroſque Aſiæ Episcopos etiam tum ſuperſtites Iconium conveniſſe, quod tamen latere Dionyſium non potuit. Quodvero non de ejus Deceſſoribus, ſed de ipſius Firmiliani perſona ſit accipiendum, nullum arbitror relictum eſſe ambigendi locum, ſi duo hujusce Epistoſæ contextus, alter qui præit, alter qui ſequitur cum hoc textu conferantur. *De vobis autem cognoscentes* (ſuperius dixerat) *quod ſecundum regulam veritatis, & ſapientiam Chriſti, hoc, de quo nunc queritur, diſpoſueritis, cum magna letitia exultavimus, & Deo gratias egimus, quia invenimus in Fratribus tam longe poſitis tantam nobiſcum fidei, & veritatis unitatem*. Sin vero res ita eveniſſet, uti Pagius con-

con-

conjecit dicendum sane fuerat. *Quia invenimus in Fratribus tam longe positis tantam cum Majoribus nostris fidei, & veritatis unanimitatem.* Deinceps subdidit. *Plurimi simul convenientes in Iconio diligentissime tractavimus, & confirmavimus &c.* Vide quale adjunctum enumeret: *diligentissimam tractationem*, quæ tamen ab eo solum narrari poterat, qui, aut vere per se ei Concilio interfuisset, aut alteri imponere voluisset; atqui illud factò repugnat, hoc Firmiliano. Tollerabilius quam Pagius censuit doctissimus Valesius in notis Eusebianis ad cap.7. lib.7. hanc Synodum celebratam fuisse sub extrema Alexandri Severi tempora, quibus Firmilianus ad Cæsariensem Ecclesiam recens promotus fuerat, ut docet Eusebius lib.6. Subscribit Valesio Tillemontius, qui Concilium istud refert ad tempora Alexandri, & Firmilianum ipsum illi interfuisse ex hac Epistola affirmat. At non vidit Valesius se, cum noxium defendere conetur, innoxium accusare; Dionysium, inquam, Alexandrinum libere scribentem: *longo tempore ante Episcoporum memoria qui antegressi sunt Iconiense, ac Synnadenſe Concilium fuisse coactum.* Quid vero illi opus fuerat Episcoporum memoriam, qui jam pridem vivere desierant, appellare? cum Cæsariensem Episcopum, qui adhuc in vivis erat, in rem suam adducere potuisset; quin adducendus fuerat, ut ejus errorem Xisto Romano Pontifici, ad quem pro Firmiliano, & Heleno præsertim deprecatus, literas dedit, opportune verbis extenuaret. Diceret: Firmilianum præ-

ceteris venia dignum esse, quippe qui eam tuentur sententiam, quæ ab Iconiensi Conventu jam pridem statuta fuerat; cui ipse interfuerat, cui subscripserat. Equidem existimo, si Pagius, si Valesius naso magis adunco, quo adeo pollebant, hanc Epistolam olfecissent, non fuisse tam levis conjecturis locum hunc anachronismi culpa exempturos.

Postremo nihil difficile est, Pagium, ceterosque in angustum redigere si res ad complexionem adducatur; scilicet aut vera sunt, quæ de Iconiensi Concilio prædicat hæc Epistola, aut falsa. Si vera jam corruunt, & Epistolæ Dionysii Alexandrini, & Stephani Papæ decretum; si falsa, jam ipsa corrui Epistola, quæ falsitatis convincitur.

Nunc quod ad rem chronologicam maxime pertinet, Concilii Iconiensis tempus propius est inspicendum. Miror Labbæum, ac Petavium, ceteroquin oculatissimos, Concilium istud potuisse ad An. CCLVIII; uno scilicet, eodemque anno, ad quem referunt, & Carthaginense III. sub Sancto Cypriano. Fortassis adverbium illud *jampri-dem* aut nonprehenderunt in aliquibus M.S. aut adjectum censuerunt. Contra Harduinus ad ann. CCXXXI. Iconiense Concilium amandat, quod & ipse cum Valesio Epocham illam respexerit, quæ est apud Eusebium de initio Sacerdotii Firmiliani in Ecclesia Cæsariensi sub imperium Alexandri Severi. Verum quod Labbæum, Petaviumque permovit, ut in eo anno Synodum Iconiensem collocarent, quo rebaptizantium hæresim

R

recru-

recruduisse existimarunt, me propemodum move-
 vet, ut ad Pontificatum Sancti Soteris Papæ, &
 ad Imperium Marci Aurelii, & Commodi; vel
 aliquanto post Iconienſis Concilii convocationem
 traducam, quo tempore emerſit Montani hæteſis,
 cujus aſſectæ *Karabnyas*, quod Phrygius Monta-
 nus foret, appellati ſunt; & non ſerpere modo,
 ſed, & graſſari tota Aſia cepiſſe, jam inde conje-
 ctare licet, quod tenebrarum poteſtas novo, &
 inaudito fraudis genere, multos utriuſque ſexus
 pervaſerit, tum virilis, ut Montanum ipſum,
 Alcibiadem, ac Theodotum ex Euseb. lib. 5. cap.
 3. tum muliebris, ut Priscillam, & Maximillam,
 de quibus idem Eusebius lib. 5. cap. 16, quos omnes
 tanto ciebat furore, ut prophetico, quin & ipſo
 Sancto Spiritu plenos, & afflatos incautis, & in-
 ſipientibus obtruderet. Quæ quidem Secta eo pe-
 riculoſior fuit, quo austeriorem, gravioremque
 vitam præſeſerebat. Quam vero longe, lateque
 Montani hæteſis pervagata ſit perſpicere eſt in Epi-
 ſtola Synodica Sancti Serapionis Antiocheni apud
 Eusebium lib. 5. cap. 19. in qua teſtatur univerſum
 pene Terrarum Orbem pervaiſiſſe. Quid plura?
 Idem S. Victor Papæ eorum verbis abreptus, at-
 que illorum teſtimonijs, qui Montaniſtarum par-
 tibus ſtudebant, deceptus, pacem Montaniſtis
 conceſſit, quam mox ademit ſuaſore S. Martyre
 Praxeæ, qui ejuſmodi Sectæ fraudes, dolosque
 reſeravit. Quod quidem ægre tulit Tertullianus,
 qui ſe Montaniſtam factum ex ſola [ſed, obrepti-
 tia] Papæ Victoris approbatione teſtatur. Nunc
 ve-

vero quis credat talem, tantamque hæresim, quæ non Orientem modo, sed Meridiem, atque Occidentem pervaserat, non fuisse a SS. illis Orientalibus Episcopis publico Ecclesiarum judicio damnandam? aut illius damnationem ad Alexandrum usque Severum protrahendam? & quidem plura Concilia Asiatica, & Græca in Montanistas habita fuisse, quorum acta, & nomina ignorantur, perhibet Eusebius lib. 5. c. 16. quibus cur Iconiense annuumerari non possit, nulla me abstrahit ratio; quin contra urget Dionysii Alexandrini dictum. *Longo tempore ante Episcoporum memoria, qui antegressi sunt; quin, & ipsa, quæ Firmiliano adscribitur Epistola, in qua priusquam agit de Concilio Iconiensi hæc proxime prædixerat. Plane quoniam quidam de eorum baptismo dubitabant, qui & si novos prophetas recipiunt, eosdem tamen Patrem, & Filium nosse nobiscum videntur, plurimi simul convenientes in Iconio &c.* qui locus de Cataphrygibus aperte differit, qui novas prophetias ostentabant, eundemque Patrem, & Filium cum Catholicis noscebant, sed non eundem Spiritum Sanctum, quippe qui crederent: Montanum esse Paracletum a Christo promissum. Deinde quæ de Femina præstigiatrice præmittuntur, satis commode ad Maximillam atque Priscillam referri possunt, quarum utram sub Alexandro vixisse, & pene octuagenariam Præbyterum Rusticum, & alium Diaconum fallere potuisse, iisdemque commisceri, paralogismum sapit. Tum quod Blondellus de Sibyl. lib. 2. sibyllinos libros

Montano adjudicavit , confectarie multo ante annum CCLI. Tum tandem quod Apollonius , qui omnium elegantissime , ac solidissime Eusebio , ac Hieronymo testibus , Montanistarum commenta refutavit , scripserit apud Eusebium lib. 5. cap. 18. Montanum adhuc in vivis fuisse , cum Maximilla dum de illis , ac in illos scriberet , quod evenit anno circiter CCXI. qui fuit Caracallæ primus. De Priscilla vero ita loquitur ac si jam obiisset. Ceterum alia fuisse sequentibus temporibus , & sub Alexandro Mulier , quæ eadem ipsa præstiterit , quæ hæc Epistola perhibet , nullo alio testimonio probatur. Hinc Tillemontius fatetur , magnum quiddam esse tam insignem historiam fuisse ab Augustino ignoratam . Denique Firmilianus ipse consuetudini Romanorum consuetudinem Orientalium opponit , & e vestigio subdit Concilium Iconiense , ex quo initium fumsit ritus rebaptizandi Cataphrygas , quum aliud nullum exemplum prius suppetat , unde hæc processerit consuetudo. Quod autem subtexuit: *Nec meminimus hoc apud nos aliquando cepisse , cum semper istuc observatum sit* , meum non est explicare , sed ejus , cujus mentita est iniquitas sibi . Nam si rebaptismi consuetudo ea erat , cujus memoria non extabat , quorsum Concilii Iconiensis convocatio ? Quorsum diligentissima tractatio ? Si quarumcunque vel levium , longeque minorum hæresum baptisma ex immemorabili consuetudine repudiabatur , qui tandem fieri potuit , ut talis ac tanta oriretur quæstio de eo baptismo qui forma corrupta , & Spiritui Sancto

esto inimica ministrabatur? Annon res eodem recidit, si undique cribretur, anachronismum committi? quo hunc pseudo-Firmilianum nemo purget, qui antiquitatis consulat monumenta.

XIV.

Quale est autem, ut cum Paullus post Johannis baptismi iterato discipulos suos baptizasse videamus, nos eos, qui ab hæresi ad Ecclesiam veniunt, post illicitam, & profanam illorum tinctionem baptizare dubitemus.

Ista ex numero eorum sunt quæ addidit ad cumulandam probationem. Egregia sane argumentatio. Baptizavit Paullus a Johanne baptizatos, qui neque si Spiritus Sanctus est audierant; igitur & rebaptizandi ii sunt, qui cum invocatione SS. Trinitatis ab hæreticis sunt baptizati. Multum quidem interest Iohannem inter atque Hæreticos si Sanctitatem spectes; multo etiam magis si baptismi formam. Illam non probamus modo, sed colimus, hanc post Christi baptismum in figuras, & umbras rejicimus. Argumentum istuc ex Johannis exemplo mutuatus est ex Epistola Cypriani ad Jubajanum prope finem, quod exemplum Cyprianico stilo expolitur. Sed an hæc Epistola ad Jubajanum Cyprianica sit, dubitavit Augustinus lib. 2. Con. Crescon. cap. 33. Videat prudens Lector, an ejusmodi argumentatio digna sit sapien-

tia, & doctrina, cum Firmisiani, tum Cypriani? & an respondeat sententiæ Tertulliani lib. de Bapt. quin, & Concilii Trid. sess. 7. can. 1. sancito contra Lutherum, ejusque asseclas Bucerum, ac Melancthonem, nec non contra Calvinum, & Zuinglium.

XV.

Ut ex hoc persecutio quoque gravis adversum nos Christiani nominis fieret.

Videtur hoc ex eodem argumento Cypriani sumtum contra Demetrianum contendentem, ærumnas omnes quibus id temporis Terrarum Orbis divexabatur Christianis esse imputandas.

XVI.

Serenianus tunc fuit in nostra Provincia Præses.

Provinciam Ponticam reperio in laterculo Provinciarum Proconsularium, ad quas non Præsides, sed Proconsules legabantur, quemadmodum & Proprætores ad Prætorias.

XVII.

In hac autem perturbatione constitutis Fidelibus, & buc, atque illuc persecutionis metu fugientibus, & Patrias suas relinquentibus, atque in alias partes Regionum transeuntibus, erat enim transeundi facultas, eo quod persecutio illa non per totum Mundum, sed localis fuisset.

Narrat quidem Severus Sulpicius lib. 2. Hist. Sacrae fuisse & Maximini tempore aliquam persecutionem, quam tamen inter septem numerandam non putat, quod triennium dumtaxat perduraverit, teste Eusebio lib. 6. cap. 20.. qui tamen sextam illam facit. Sed ita narrat Sulpitius, ut tantum quorundam Ecclesiarum Clericos scribat a Maximino vexatos. Verum si Sulpicii testimonio tres annos duravit, Maximini vitam æquavit. Ex quo plurimus est opinandi locus, persecutionem illam veram, & generalem fuisse; quod ut credam, eo maxime adducor, quod tum temporis extiterit hæresis Helcheseitarum, docentium, licitum esse fidem ore negare, modo in corde retineretur ex Euseb. lib. 6. Hist. cap. 28. Hinc alterutrum sit oportet. Aut enim ea persecutio generalis fuit, sicque mentitur Epistola, quæ illam localem tantum fuisse tradit; aut vere ita evenit, ut Sulpicius enarrat, neque tum fuit tam acerba, & dira. Pamelius merito de hac persecutione dubitasse videtur, quod dispares de illa sententias retulerit, ac dein modum innuerit mendacii recludendi,

di, nimirum; ut reperiatur alicubi in Martyrologiis Sereniani mentio, sed in re tam ancipiti nobis non præstat labore improbo rem non magnam inquirere, quam Pamelius non inquisivit; neque enim ad id prestandum tantum mihi otii suppetit, ut valeam, neque tantum patientiæ, ut velim.

XVIII.

Emersit istic subito quædam mulier, quæ &c. mirabilia quædam, & portentosa perficiens, & facere se Terram movere polliceretur. Non quod Dæmoni tanta esset potestas, ut Terram movere, aut elementum concutere jussu valeret, sed quod nonnunquam spiritus nequam præsciens, & intelligens terræmotum futurum, id se facturum esse simularet, quod futurum videret.

Perdifficilis, & per obscura quæstio: an Dæmones ex causarum naturalium coitione Terræmotum prospicere possit? quod si donetur, jam altera suboritur: an possit ipse per se Terræmotus causas ciere, atque conjungere. Quæ de Astorum tactibus prædicantur, si qua vis Astorum tactibus inest, aut si quis Astris tactus, neutiquam posse humanæ mentis acie præsentiri, ex desperato conjunctionum calculo V.Cl. Montanarius apertissime collegit. Idipsum porro non ausim de Dæmone affirmare. Sed si quæstio in Terræmotum recidat, potius erat Christiani Philosophi id inficiari, & quidem sanctis literis perhibentibus.

XIX.

Hæc , & unum de Præbyteris Rusticum :

Nomen latinum homini græco , si non novum, certe suspectum, tum maxime, cum plures subsunt suspicandi causæ.

XX.

Sine Sacramento solitæ prædicationis offerret.

Risus abstineam? Perdita, venefica, & sacrilega femina exprobratur inde magis, quod Eucharistiam conficeret sine Sacramento solitæ prædicationis. Qui prædicationis legunt cum Gauchio omnino falluntur, tum quod prædicationis legant MS. omnes Codices, tum quod Verbi Dei prædicationis fieri olim consueverit in Sacrificio Missæ. Addo etiam, non posse prædicationis substitui, quod jam superius præmiserit: invocatione non contemptibili sanctificare se panem, & Eucharistiam facere simularet, iccirco si e vestigio subdidisset: sine Sacramento solitæ prædicationis, jam sibi contrarius esset. Exprobari autem quempiam, quod crimen crimini non adjecerit ineptissimum est. Crimen vero crimini adjecisset Femina præstigiatrix, quæ ausa esset & Verbum Dei ministrare contra Apostoli præceptum. *Mulieres in Ecclesiis taceant.* Tillemontius legit non sine, sed nullo Codice suffragante.

Atque ego in hac parte julte indignor ad hanc tam apertam, & manifestam Stephani stultitiam.

Tu quidem injuste, fortassis etiam sicte. At ego julte, & serio indignor ad hanc tuam tam apertam, & manifestam audaciam, & nequitiam. *Qui dixerit Fratri suo Raca* (inquit Dominus Matt. 1.22) *reus erit gehennæ ignis.* Ad quem locum apposite Cyprianus ipse in Epist. ad Cornel. LV. *Quomodo possunt censuram Domini ultoris evadere, qui talia ingerunt non solum Fratribus, sed & Sacerdotibus, quibus honor tantus de Dei dignatione conceditur, ut quisquis Sacerdoti ejus, & ad tempus hic judicanti non obtemperaret, statim necaretur.* Quam caussam nisi ineptam, falsam, iniquam adducent qui huic Epistolæ patrocinantur ad ejus Auctorem concilio, & gehenna liberandum? At enim concitator scripsit, nec minus asperis Stephani literis incensus. Nugæ: manibus, pedibusque quam volunt conentur, nisi ad furorem confugiunt, laterem lavant. Quas a Majoribus nostris immo, & a Christo Jesu de patientia exercenda accepimus præceptiones, efficiunt, ne Auctor tam contumeliosus, ob quamvis obrectatorum irritationem, purgatus Deo esse queat. Sed ad posterioris capitis institutum hæc magis pertinent.

Qui sic de Episcopatus sui loco gloriatur, & se successionem Petri tenere contendit Qui per successionem, Cathedram Petri habere se prædicat.

Quid est hoc monstri? gloriatur, contendit, prædicat. Ego ne tam demens, ut hæc a Firmiliano scripta existimem, & a Cypriano translata? Mihi hercle non fit verisimile, Episcopum Catholicum, & summi nominis hæc scribere potuisse. Ad quem tandem ista scribuntur? Ad Cyprianum scilicet, qui in Epistola ad Cornelium de Felicissimo agens Fortunati partes fovente, ac ejusdem legatione Romam navigante hæc ait. *Post ista adhuc insuper pseudo-Episcopo sibi ab hæreticis constituto, navigare audent, & ad Petri Cathedram atque Ecclesiam principalem, unde unitas Sacerdotalis exorta est, a Schismaticis, & profanis literas ferre, nec cogitare eos esse Romanos, quorum fides Apostolo prædicante laudata est.* A quo scriptæ perhibentur? Nimirum a Firmiliano, pro quo non minus quam pro Heleno, ceterisque Orientis Episcopis S. Dionysius Alexandrinus Xistum Stephani Successorem obtestatus est, ne quid gravius in eos statueret, quod rebaptizari putarent. Videntur ne & Cypriani verba, & Firmiliani formido, Stephani in Petri Cathedra successionem in contentionem, & vanam prædicationem adducere? Adducunt autem verba illa livida, & subdola: *prædicat, gloriatur, contendit.* Qui ad oppositum con-

firmandum hæc dicta traducunt , nec falsum scribentis animum , nec verum verborum sensum percipiunt .

XXIII.

Et non pudet Stephanum hæc asserere ? &c.

Quin te potius pudeat tot dira , tamque atrocitas in Sanctissimum ac Summum Dei Sacerdotem effutire . Me sane pudet acerbissimam quam hic subdis in Stephanum actionem exscribere , adeo amarulenta est , ut nec impune recitari queat . Et quisquam erit , qui Beatissimo Cæsariensi Episcopo hanc adjudicet , quam ne referre quidem quis audeat sine injuria Christianæ humilitatis , & Catholicæ communionis ?

XXIV.

Quando enim baptismo hæreticorum communicas . &c. tu hæreticis ipsis peiores .

Ecquis tam ferreus , ut teneat se ? Parum illi fuit stultum , imperitum , jactatorem , animosum , schismaticum , hæreticum appellasse Stephanum , ni hæreticis etiam pejorem prædicasset . Annon quæstio de baptismo Cypriani quidem judicio erat de disciplina ? Annon præfatus est Cyprianus in Carthaginienſi III. ? *Neminem condemnantes , aut a jure communionis aliquem , si diversum sensu-*

serit, amoventes. Cur hūc Stephanum Firmilianus condemnat? Cur a communione amovet? Quid dixi amovet a communione? Hæreticis pejo-rem vociferat.

XXV.

Ab aqua aliena abstine te, & de fonte alieno ne biberis.

Oxonienſis, quo facilius hæc Epistola ex græco translata ducatur, observat, frustra hunc textum alibi requiri, quam in versione græca, & abesse a codicibus Hebræis, & vulgato latino. Quod etsi lubenter permittimus, jam conjecturam græcæ translationis elidimus, quod non solum a Tertulliano lib. pr. adversus Marcionem afferatur; verum etiam Nemesianus a Thubunis hunc inter ceteros textum attulerit in Carthaginienſi III. *Ab aqua aliena abstine te, & de fonte alieno ne biberis.*

XXVI.

Nisi quod imperitos, & animosos &c.

Pergit debacchari, sed multo verbiora efficiunt, ut hæc prætermittamus; quæ hoc tempore satis essent ad aliquam Catholici, & modesti Scriptoris Epistolam confictionis insinulandam.

Lites enim, & diffensiones quantas parasti per Ecclesias totius Mundi?

An Ecclesiæ Africanæ, quarum non omnes Cypriano consentiebant; an Ecclesiæ Orientales, quarum fere omnes Firmiliano repugnabant, tot Synodis contra Anabaptismum celebratis, afficiant Ecclesias totius Mundi, norint qui sapiunt. Præstat audire Augustinum lib. 2. contra Donatistas cap. 8. hæc de Cypriano tradentem. *Ubique intuens universalem, robustamque consuetudinem, & cap. 7. saluberrimam consuetudinem tenebat Ecclesia* Sic iterum cap. 9. *Consuetudinis robore tenebatur Orbis Terrarum, & lib. 4. c. 6. affirmat Cyprianum egisse adversus totius Orbis morem. Sed clarissime, & plane ad rem lib. 3. cont. Cresconium cap. 3. Jam si omnino credendum sit quinquaginta Episcopis Orientalium id esse visum, quod septuaginta Afris, vel aliquanto etiam pluribus contra tot millia Episcoporum, quibus hic error in toto Orbe displicuit.*

XXVIII.

Peccatum vero quam magnum tibi exaggerasti quando te a tot Gregibus scidisti. Excidisti eam teipsum, noli fallere. Siquidem ille vere Schismaticus, qui se a communione Ecclesiastica unitate apostatam fecerit.

Hic schismaticum, & apostatam Stephanum appellat, quo jure, quave injuria, ipse viderit.

XXIX.

XXIX.

*Quid enim humilior, aut lenius, quam cum tot
Episcopis per totum Mundum dissensisse?*

Hoc unum deerat ad lenitatem, ac temperantiam pacifici Scriptoris, ut pro ira evomenda ad exquisitiores objurgandi formulas abiret, nimirum ad Ironiam. Post in idem recidit, quod modo imposuerat: Stephanum per totum Mundum cum tot Episcopis dissensisse. Scilicet si vere hæc Epistola est Firmiliani, conficta sunt omnia Concilia in Oriente adversus Rebaptizantes celebrata.

XXX.

Pacem cum singulis ...: rumpentem.

Is, quem cum nemine pacem fregisse liquet, qua fronte affirmatur fregisse cum singulis?

XXXI.

Vario discordiæ genere.

Ignoravit sane Cyprianus, ignoravit Eusebius; ignoravit Augustinus, & nos etiamnum ignoramus, quæ contentio præter hanc de Baptismo, Stephano fuerit cum singulis Episcopis, ob quam pacem semper cum illis fregerit, quin etiam vario discordiæ genere.

Lom.

Lombertus in vita Cyprianica varium hoc discordiæ genus explicat de Novatianismo, cui subscribere videtur Tillemontius, qui talibus tricis sese minime expedit. Quonam vero pacto se expediat, qui probe sciat, Novatianismum sub Cornelio initium cœpisse, & a Sanctissimis Episcopis Cypriano, & Firmiliano fuisse damnatum, ab uno quidem, & compluribus literis, & Synodo Carthaginiensi. Ab altero vero in Synodo Antiochena, uti ex Eusebio lib.6.cap.46: Quid vero iniquum magis, quam si alteri id objicias, in quo primus pecces. Quid etiam absurdus, quam si quempiam Schismaticum ideo appelles, quod Schisma detestetur? atque illud præsertim, quod tu prior es detestatus? Quod non sui causa sed alterius, qui jam objerit, tibi que amicissimus fuerit, conflatum sit?

XXXII.

Modo cum Orientalibus, quod nec vos latere confidimus.

ΣΥΝΟΨΙΣ. Si quæ predixit vera sunt, quonam tandem modo Cyprianum laterent? Cur Cyprianus ad eum Rogatianum in longissimas Regionem expediret, de cujus sententia dubitaret? Quod si non dubitavit; quod si per Clerum Romanum, qui cum maxima illi intercedebat necessitudo, tam commodè rescire potuit, quonam aptior, atque expeditior insinuationis via? quam id dicere,
se

se iccirco ad eum scribere , quod sciret illum in eadem esse sententia . Quis sibi persuadeat rem secus evenisse atque ego conjicio , ut rei fert natura .

XXXIII.

A quibus Legatos Episcopos patienter satis , & leniter suscepit , ut eos nec ad sermonem saltem colloquii communis admitteret. &c.

Baronius contendit Legatos istos non fuisse Africanæ , sed Orientalis Ecclesiæ , quod ægre tulit Pearsonius , veritus ; ne Baronius hac explicatione innuere voluerit primatum Romani Pontifici ob Legatos ab Oriente missos , & a Stephano non receptos , quos ex dictionis structura Africanos fuisse autumat . Et certe si de Orientalibus non explicetur , non est locus huic legationi . Quare alterutrum sit oportet , aut fuisse Orientales , aut nullos omnino Legatos fuisse . De Africanis namque Legatis sic a Stephano male acceptis , uti perhibet hæc Epistola , ne verbum quidem sit in literis Cyprianicis , quod maxime faciendum fuerat in Epistola ad Pompejum , in qua nihil prætermisit , quod Stephano odium conflare posset . Quæ illiberalis , seu verius inhumana , Legatorum exceptio erat sane omnium minime prætermittenda .

Insuper, & Cyprianum pseudo-Christum, & pseudo-Apostolum, & dolosum operarium dicere.

Baronius libere pronunciavit : Firmilianum mentitum esse. Pearsonius detestatus est miram hanc Baronii licentiam. Quibus tandem conjecturis Baronius mendacii Firmilianum evicit? quia Cyprianus de his ne leviter quidem conquestus est. Dein, & argumento ab Augustino petito, qui cuncta, quæ eodem tempore contigerunt ab eodem scripta exacte pervidit. Pearsonius contra. *Non erat certe Firmilianus in hunc modum tractandus, qui Dionysio Alexandrino, & Nicephoro, Baronio teste, Doctrina, & Sanctitate morum nulli propemodum illorum temporum credebatur secundus.* Ego vero media via incedens, nec Baronii conjecturas improbo, nec Pearsonii reprehensionem vitupero. Incredibile siquidem prorsus videtur, Stephanum potuisse hæc in Sanctissimum Cyprianum in mera disciplinæ controversia effutire, tum quod Cypriani nomen maximi in Ecclesia Romana fieret, tum quod Cyprianus in Epistola ad Pompejum ab ejusmodi Stephani delationibus se se purgare debuisset, tum quod nil tale penes Augustinum harum contentionum Scriptorem accuratissimum deprehendatur. Alia ex parte non erat tam aperte mendacii arguendus Episcopus Sanctimonia percelebris. Consultius dicendum erat cum Christiano Lupo loco superius citato. *Propter hæc sola*

sola verba dubitandum esse, an hæc Epistola Firmiliani sit vera. Quid reponit Pearsonius ad Cypriani silentium? *Hæc* (inquit) *quæ Firmilianus prodidit, scripta sunt ad Orientales Episcopos, nec ea novit Cyprianus antequam a Firmiliano accepit, post cujus literas acceptas ipse de Stephano nil scripsit.* At Pearsonius Hydram secat. Unde enim conjicit: Stephanum prius ad Orientales, quam ad Afros Episcopos, hæc de Cypriano scripsisse? Quis hæc paralogismo absolvat? cum nullo documento a Pearsonio affirmantur. Quis non videt, Pearsonium merum esse contortorem? quo satius hanc Epistolam vendicet, quam vendicare multum certe illius intererat, ut negotium crearet in Summum Pontificatum, quippe cui ipse infensissimus esset.

XXXV.

Quæ ipse ex merito deberet audire.

Si injurius fuit, & contumeliosus Stephanus, quod hæc scripserit de Cypriano; quidni injurius, & contumeliosus haberetur Firmilianus si par pari retulisset? contra Apostoli præceptum: *non reddentes malum pro malo, nec maledictum pro maledicto.*

CAPUT III.

Argumenta adducuntur, quibus Firmiliani auctoritas huic Epistolæ vindicari possit, & singillatim confutantur.

QUam ingenue non minus quam libere Epistolam hanc de confictione postulaverim, noverit quicumque legerit; an etiam evicerim, doctorum hominum iudicium esto. Jam vero quo magis nostra ingenuitas perspicua fiat, argumenta profero, non quæ afferuntur, nemo siquidem etiam nunc attulit, sed quæ possent afferri. Certe nullum eorum reticebimus, quod nostra nobis suggererit investigatio, simulque ita diluemus, ut clarissime perspiciatur, nullo argumento hanc Epistolam Firmiliano adjudicari posse; propterea alicui potius Donatistæ esse tribuendam.

Primum itaque argumentum iis, qui Epistolam Firmilianicam putant, suppeditat Augustinus lib. 3. cont. Crescon. cap. pr. in quo sic præfatur. *Quidquid de Cypriani Venerabilis Martyris, & de quorundam Orientalium literis inferendum putasti, quod eis placuerit apud Hereticos, & Schismaticos datum improbare Baptismi Sacramentum, nihil impedit causam nostram.* Ex quo Augustini loco non obscure conjicitur, inter quorundam Orientalium literas Augustino a Cresconio pro-

fi-

fitas, & hanc Firmiliani adductam fuisse, quippe quæ Donatistis maximopere obsecundaret. Locum hunc ita adnotant Maurini. *De literis forte Firmiliani Cæsareæ Cappadociæ Episcopi Cypriano inscriptis, & inter Cyprianicas vulgaris.*

Sed hanc opinionem ex instituto diluit Tillemontius cujus sensum lubet hic referre, & verba transferre. *Innuunt (inquit) verba isthæc Augustinum quidpiam aliud a Firmiliani Epistola intelligere, quæ quidem Epistola unius tantum Episcopi nomine inscripta est. Videtur præterea hæc Epistola præterisse Augustinum; nunquam enim reponit Augustinus immemorabili consuetudini, quam hæc Epistola portendit, quod quidem ab Augustini ingenuitate. Ille siquidem si hoc rescisset, nullo modo dissimulasset. Nec aliud rescivit Fæminæ præstigiatrix exemplum, quod fuisse persequitur Firmilianus in Epistola. Hæc Tillemontius. Enim vero nemo unus est, qui Donatistarum audaciam, & Augustini indisceptando institutum pernoverit, & id sibi persuadeat, & illos tantum patrocinium prætermitturos fuisse, & hunc tantam difficultatem declinaturum. Qua vero conjectura Maurini Adnotatores suspicati fuerint ejusmodi Orientalium literas ad Firmiliani Epistolam referri posse, plane non video. Repugnat siquidem Augustini responsum adductum cap. 3. ejusdem libri ad eam ipsam Cresconii objectionem. Proinde, (inquit), si omnino jam credendum sit L. Episcopis Orientalium id esse visum, quod LXX. Afris, vel aliquanto etiam pluribus, contra tot millia Episcoporum, qui-*

bus hic error in toto Orbe displicuit. Hic aperte Augustinus differit de aliquo Orientali Concilio ex L. Episcopis conflato, ut probe advertit doctissimus Valesius, fortasse de Iconiensi, aut Synnadeni. De quocunque demum sit explicandus, certe Augustinus de veritate hujus Concilii dubitavit, quod tantummodo in Donatistarum hypothesis recepit, non absolute, uti liquet ex iis verbis: *si omnino credendum sit L. Episcopis Orientalium id esse visum; quod LXX. Afris*.

Alterum porro argumentum, quo fides Firmiliani literis videtur statui posse, eo vergit, ut Firmilianum maledici labe absolvat. Quis enim non absolveret hominem vel Sanctissimum a Stephano laceffitum, de quo Pamelius suspicatur: Ea potissimum de causa, quod ad Firmilianum, Helenum, & ceteros illarum partium Episcopos Stephanus aliam quoque Epistolam scripserat, se illis non communicaturum, quandiu in ea sententia de baptizandis hæreticis persisterent, uti ex Epistola Dionysii Alexandrini ad Xistum Stephani successorem docet Eusebius Hist. Eccles. lib. 7. cap. 4.

Ne quis objiciat Christianam patientiam, qua Firmiliano perferenda erant quæcunque a Stephano sibi illata fuissent convicia; est namque patientia quædam minime laudanda ex Augustino Epist. 185. al. 50. ad Bonifacium, in qua exempla affert Paulli suam vitam tuentis, & Cæsarem appellantis; item Absalom interfecti contra Davidis jussu præter voluntatem, ad purgandum Maximianum Episcopum Bagajensem, qui auxilium pe-

ti-

tioit ab Imperatore Christiano, non tam sui ulciscendi causa, quam tuenda Ecclesie sibi credita; quod si prætermisisset, non ejus fuisset laudanda patientia, sed negligentia merito culpanda. Id ipsum de Firmiliano Hæreticis infenso affirmandum est, qui si paullo commotior, ac vehementior in Stephanum scripsit, in causa fuit, quod fidei dogma sese tueri arbitrabatur. Adde ex Sancto Prospero lib. 3. de Vita contemplat. plurimum referre *non quid, sed propter quid patiamur*, & paullo post: *patientiam veram non facit poena, sed causa*. Quæ vero causa dissimulandi, vel mitius agendi suberat Firmiliano? qui bona fide Religionis asserendæ gratia agebat. At enim parcendum erat tum, quum ageretur de Petri successore. Quid postea? Annon cum ipso Petro agebat Paullus ad Gal. 2. C. 14., tum cum illi exprobrans, & in faciem resistens, inquit: *Quomodo gentes cogis judaizare?* Succurrit & Hieronymi juxta sanctissimi, ac sapientissimi exemplum, qui a Clericis ob nimiam carpendi mores, maxime Ecclesiasticorum, libertatem, vociferatus fuit *Omniium lacerator*. Demum & ipsius Cypriani in Epist. ad Pompejum, in qua non secus ac Firmilianus acerbè Stephano insultat ob eam ipsam causam baptismi hæreticorum.

Ad istud objectum puto satis, superque responsum fuisse superius num. 2. cap. 1. Verum, quo magis, magisque per singula fiat satis, reponere juvat: nos quidem longe plus, quam reliquis Cypriani Adnotatoribus Pamelio deferre, quippe homi-

mini iusto æque ac sapienti. Sed Pamelius tantummodo suspicatus est, remita evenisse, non serio affirmavit. Et plane fuerat suspicandum de Stephani literis ad Orientales ei, qui de Firmiliani Epistola ne leviter quidem fuerat suspicatus; quod si fuisset, confidimus, Pamelium non secus atque nos fuisse illam rejecturum. Quæ extant apud Eusebium Dionysii Alexandrini ad Xistum literæ, nil tale continent, quo Orientales Episcopi a Stephano abstenti, & Stephanus Firmiliano speciatim iratior fuisse dicantur. Sed minas tantum habent, quas Dionysius avertit, intercessoribus Philemone, & Dionysio Romanis præbyteris. Ceterum Firmilianus adeo excanduit ob solum ad se transmissum a Cypriano Stephani decreto; at de acrioribus Stephani literis ad Orientales Episcopos ne verbum quidem. Firmilianus quidem Pamelio teste vehementius, & acerbius quam Episcopum deceat, ad Cyprianum rescripsit, quo in rescripto Christiana patientia plurimum desideratur, quod si aliquando necessaria sit, tum maxime cum agendum sit cum Romano Pontifice, ex Cathedra præsertim universam Ecclesiam docente. Nec refert: Firmilianum non acquievisse Stephani iudicio; primo enim contendo fuisse omnino acquiescendum; deinde, si non acquieverit, mitius, ac temperatius agendum usque esse cum Summo Pontifice, exemplo Christi, & Pauli; quæ Cyprianus assertit in rem suam contra Florentium Pupianum in Epist. 69. ita epim inquit.

Et Dominus in Evangelio cum ei dictum esset: sic

re-

respondes Pontifici ? custodiens , & docens Sacerdotalem honorem servari oportere , contra Pontificem nihil dixit , sed innocentiam suam tantummodo purgans responderit , dicens : si male locutus sum , exprobra de malo ; si autem bene , quid me cedis ? Item Beatus Apostolus , cum ei dictum esset : Sic insilis in Sacerdotem Dei maledicendo ? nihil contumeliose locutus sit adversus Sacerdotem : quando , & potuerit se constanter referere adversus eos qui Dominum crucifixissent , & qui jam Deum , & Christum , & Templum , & Sacerdotium perdidissent . Sed quamvis in falsis , & spoliatis Sacerdotibus , umbram tamen ipsam inanem Sacerdotalis nominis cogitans , dixerit : Nesciebam Fratres , quia Pontifex est , scriptum est enim Principem Populi tui non maledices . Ex qua Cypriani doctrina illud in primis , sed obiter , atque iterum intelligitur , nunquam Cyprianum Firmiliani Epistolam fuisse vulgaturum , multo etiam minus in latinum translaturum : tum alterum , quod nostra omnino interest , inexcusabilem utique fuisse Firmilianum , si tam dira vomisset in Summum Dei Sacerdotem . Quæ de Episcopo Bagajensi ex Augustino adducta sunt , non improbamus ; potuisse enim , & posse etiamnum Christianos apertam injustamque vim utcunque propulsare , fuisse , diserte , ac solide Grotius demonstrat de Jure Belli , ac pacis lib. pr. cap. 3. , & id quidem non gentium modo , sed & divino , & naturali jure permitti . Ceterum quod Augustinus ad publicas Ecclesiæ illatas injurias vendicandas Maximiano concessit , ad privatas tamen ulciscen-

das Christianis quibuslibet apertissime denegavit, atque adeo, ut ne vitæ quidem tuendæ reliquerit facultatem. Namque ita præcepit Doctor eximius lib. pr. de lib. arbit. cap. 5. *Legem quidem non reprehendo, quæ tales (subde Latrones, & alios inuafores violentos) permittit interfici, sed quomodo istos, qui interficiunt, defendam non invenio, & Epist. 47. al. 154. ad Publicolam. De occidendis hominibus, ne ab eis quisquam occidatur, non mihi placet consilium, nisi forte sit miles, aut publica functione teneatur, ut non pro se hoc faciat, sed pro aliis, accepta legitima potestate.* Cohæret Ambrosius lib. 3. de offic. cap. 3. *Christianus etiamsi in latronem armatum incidat, ferientem referire non potest; ne dum salutem defendit, pietatem contaminet.* Jam porro dicant qui sapiunt, an hæc Firmiliani iracundia Ambrosio, atque Augustino probari potuisset? Verum non idem forte fuerit græcis Patribus de Christiana patientia iudicium, quod Latinis fuit. Enim vero nihilo minus quam Latinis; ut etiamsi ad vitam tuendam quæstio referatur, non difficile sit quempiam ex Orientalibus reperire, qui longe ante Ambrosium, & Augustinum idem prorsus præceperit. Nec procul a Firmiliani sede tota Asia vagari opus est, ut unum aliquem deprehendam. Quin, & in ipsa Cæsariensi Ecclesia, cui Firmilianus præerat, & in qua nunc sum, lubenter confisto. Existat igitur Magnus Basilius, Firmiliani Summus Admirator, ac Firmiliani in Cæsariensi Archiepiscopatu Successor in secunda ad Amphilochoium Epistola can.

can. 43. & 55. & quisquam dubitabit an vetemur maledicentibus maledicere? quibus ne vitam quidem nostram defendere permiffum est. Ut ut sententia ista se habeat, quam ego nec laudo, nec vitupero, tamen reapse aptissima, & expedita ab iis, quæ majora sunt ad minora inde oritur argumentatio.

Quæ auctoritate S. Prosperi de patientia non semper laudanda afferuntur Firmiliano non suffragantur, fugo Religionis vendicandæ; cogitandum namque illi fuerat, in hoc fidei studio Stephanum sibi nihil prorsus concedere, & Religionem ipsam vendicandam usque esse incolumi caritate, cujus patrocinium præferre contra Romani Pontificis decretum mos est & credulitas Hæreticorum. Incirco patientiam insigniter labefactasset Firmilianus, in quo cum Prospero loco citato, *non patientia laudanda esset, sed miranda duritia*. Quid vero si Stephanus ad Firmilianum acerbius scripserit? quid si Hæreticum appellaverit? per me licet; magis, ac magis contendo, nunquam sibi licuisse præter modum irasci, ac plane furere.

Nec movet me quod proclive est objectu nimium excarescentia, qua si quis correptus alteri injuriam inferat, injustus tamen non dicitur, propterea scriptum est, *Irascimini, & nolite peccare*, quandoquidem Paullus ipse verba hæc Psalmi 4. expendens ita præceperit Ephes. 4. *Sol non occidat super iracundiam vestram*. Ecquis serio affirmet, super Firmiliani iracundiam Solem non occidisse? Nempe is, qui illud sibi persuadeat, Rogatianum

sub lucem *Cæsaræam* pervenisse; Episcopo vigilant, nec opinanti, diluculo, veluti solent *comœdiarum*, & *tragœdiarum* Scriptores, literas reddidisse, quibus non in *trascursu* lectis, sed *sæpius* repetitis, immo & *memoriæ* mandatis, *Rogatiano* ad suos redire festinante, responso longiori, & ex tempore dato, nihil prorsus præpediente, aut *senectæ* imbecillitate, aut *Legati* interpellatione, aut *quæstionis* magnitudine, demum *Rogatianum* sub *vesperas* profectum fuisse, hinc *Firmiliano*, ira jam remissa, non amplius retractandi quæ scripserat fuisse facultatem. Annon qui sic conjiceret apologum magis ageret quam apologiam? Ita plane conjiciat oportet, qui solem super *Firmiliani* iracundiam occidisse inficiari velit. Qui secus conjicit cicatricem refricat, atque alia diverticula sibi quærenda sunt, aliaque flexiones. Quid tandem invenire possint, quo *Pauli* auctoritatem defugiant, & *Firmiliani* perfectionem sanctam, tectamque custodiant, plane non video. Sed quid ego *græcos*, *latinosque* *Patres* appello? Quid expendo rationum momenta? Quid docilibus, prudentibusque *Lectoribus* molestus sum? Sat mihi superque fuerat *Dominica*, & *Apostolica* tum præcepta, tum exempla indicasse, quibus & maxillam percutienti alteram præbere; & honorem nostrum salvo alieno, & maxime *Sacerdotali*, tueri jubemur, & maledictum pro maledicto reddere prohibemur. Quod de *Paullo* *Petrum* increpante subtexitur, assentior *Harduino* docenti: non *Petrum* *Apostolorum* Principem a *Paullo*

reprehensum, sed Cephiam unum ex LXXII.
Christi Discipulis.

Jam ad Magnum Basilium properemus vere dignum S. Firmiliani in Cæsariensi Pontificio Successorem. Qui Epist. 10. hæc de Occidentalibus Episcopis scribit ad Eusebium Samosatenum. *Mibi quidem illud Diomedis subit dicere. Ne preceris quoniam est Vir superbus, nam procul dubio cum lenius tractantur elati animi, solito insolentiores plerumque fieri solent. Etenim, si Dominus sit nobis propitius, quonam alio adminiculo indigemus? Sin autem ira Dei permanserit, quale nobis auxilium ab Occidentalium supercilio, & fastu aderit? qui veritatem neque norunt, neque discere sustinent, verum falsis opinionibus præpediti illa nunc faciunt, quæ prius in Marcello patrarant, nempe cum iis, qui veritatem ipsis annunciant, contendentes, hæresim autem per se ipsos stabilientes. Ego sane ipse absque communi literarum figura volebam ad eorum Antesignanum scribere. Nunc dicat quis: Quid Firmilianum damnas, qui Basilium laudas? Mihi vero tam facile est utrumque absolvere, quam literas utrasque proscribere. Cur enim dubitem unius, & alterius nomine vulgatas epistolas pari censura vexare, cum pari vitio laborent? Sed ut mitius agam, epistolam recipio, & Magnum Basilium excuso; enim vero ajo, opportune, sed non acerbe Occidentales Episcopos ab eo perstringi. Quid enim Basilio lenius, aut tollerantius? quippe qui vehementer, ac perpetuo, & quidem injuria ab Adversariis fuerit exagitatus. Nihil enim*

prætermiserunt, quo infantem Pontificem, & de Ecclesia optime meritum in summam invidiam adducerent, nunc novæ illum cum Eustathio collusionis, nunc veteris cum Apollinari necessitudinis, nunc apertæ cum Catholicis similitudinis arguentes. Creditus nunc Tritheita, quod Tres Deos admittere, nunc Pneumatomachus quod Spiritus Sancti Divinitatem inficere videretur. Ad hæc mala hoc illi etiam accedebat: A Neocæsariensibus popularibus suis uti hæreticus vitabatur, parumque abfuit, quin a suis ipsius Monachis vitaretur. Quæ omnia Sanctissimus Antistes ægerrime quidem, sed patienter ferens ad Occidentalium fidem, atque opem confugit; sed perperam; nam Damasus Papa, ceterique omnes Occidentales Episcopi, tot criminationum, quæ in Basilium ab Orientalibus offerebantur, fama permoti, omnino ab illo abstinebant, etiam a literarum officiis. Ecquis tam ferreus ut teneat se? Ecquid reliquum erat Basilio? nisi ut amice cum Samosateno Episcopo conquereretur de Occidentalium fastu, ac supercilio, de crudelitate, qua calumniatoribus suis fidem adhibebant; de animo inofficioso, quod nedum sibi non opitularentur, nedum ad visitandam Orientalem Ecclesiam neminem legarent, sed ne reperitis quidem literis suis responsum darent. Etenim nil quicquam amplius Epistola isthæc ad Eusebium designat. Sed malo, Arianorum præsertim perfidia, ingravescente Epistolam dedit LXXIV. ad Damasum, & Occidentis Episcopos petens, ut visitaretur Orientalis Ecclesia; id si tum

tum fieri non possit, saltem ut consolatoriz literæ mittantur. Sed nihilo felicius tum fuit Basilius, quam antea. Quare aliam conscripsit Epistolam, quæ est Num. LXXVII. & Petrum Præbyterum Legatum mittit ad Damasum, & Occidentales, qua impediri se varie dicit, quo minus, quod adeo optaret, ad eos adiret: deplorat calamitates, conqueritur de obsequiis non exhibitis, deprecatur calumnias, paratum se exhibet admonitionibus, & correptionibus, fraternam caritatem in mentem revocat, denique obsecrat, ut visitatione, & consolatione Ecclesias Orientales dignetur. Damasum, & ceteros Occidentales, ne tum quidem rescripisse ingeminatæ querelæ anno posteriori factis indicant, uti ex litteris, quæ sunt primæ in additis, in quibus solos Occidentales puriores remansisse prædicat Orthodoxos, tantum abest, ut hæresis suspectos habuerit.

Sed hæc de Græco, Sanctissimoque Scriptore; nunc quæ de Latinis. Quod opponitur ex Hieronymo petitum exemplum est in speciem difficillimæ solutionis. Extat siquidem primum egregium illud Hieronymi dictum in Epist. ad Pamach. LXI. usu, & ratione probatum. *Nolo in suspitione hæresis quemquam esse patientem.* Dein, si perinde ut est reapse Hieronymi in scribendo acrimoniam diligenter inspiciamus, facile comperiemus unum fuisse veterum omnium Patrum dicacissimum, in quo nec Plauti sales, nec Horatii lepores, nec Juvenalis aculeos, nec Persii iram desideres. Neve rem actam agam, Lectorem ad Theophili Raynaud
di

di Tom. xi. de iusta, & iniusta librorum confectio-
 ne remitto; in eo siquidem Vir multo omnium
 eruditissimus præcipua Hieronymi loca congeffit,
 quibus Ruffinum belle quidem, sed asperius vel-
 licat. Et vere non diffiteor Hieronymi scommata
 ea esse, quæ si cum Firmiliani conviciis conferan-
 tur, facile hæc exæquent, siue etiam superent.
 Hinc alterutrum fiat oportet, seu utrique parce-
 re, seu utrumque damnare. Attamen plurimis
 nomini bus Hieronymus est absolvendus; plurimis
 item suppositus Firmilianus damnandus. Quippe
 multum interest, apertum, acerbumque inimi-
 cum remordeas, an Patrem tibi ex caritate ex-
 probrantem. Tum etiam multum laceffitus, an
 laceffens. Multum deinde a privato quodam ho-
 mine, an ab habente publicam tibi obfistendi po-
 testatem. Post, non paullum a simplici Præby-
 tero, an a Petri successore. Tum longe plus per
 calumniam provocatus, an quoquo nomine, sal-
 tem in speciem reus. Ad extremum plurimum
 interest in fidei, an in disciplinæ controversia.
 Quibus sedulo perpensis, facile dignoscet eruditus,
 æquusque Lector, quantum sit Hieronymi causæ
 fidendum, quantum sit contra Firmiliani causæ
 desperandum.

Sed propius Firmiliano accedere videtur Bernar-
 dus, tum in libris de consideratione ad Eugenium
 Papam, tum in Apologia ad Guillelmum Sancti
 Theodoric Abbatem. Ac primum in libris de
 Consideratione in Romani Pontificis incuriam, &
 Prælatorum malefacta acerbius invehitur, & in-
 se-

sectatur vehementius . Deinde in Apologia , Monachorum Cluniacensium mores , acrius quam Monachum deceat , exagitat ; nimirum intemperantiam in conviviis , cultum in vestimentis , luxum in Ecclesiis , atque Oratoriis , ut non immerito hæc Apologia summam Bernardo invidiam conflaverit , atque etiamnum nonnulli contendat , vere mellifluum Doctorem Christiani fervoris terminos prætervectum fuisse . Sed tamen nemo minus supposito Firmiliano opitulatur , quam Sanctissimus juxta ac Doctissimus Clarevallensis Abbas . Satis namque , superque foret dumtaxat illud animadvertere , Bernardum primo ex caritate in Eugenium Discipulum suum opus de Consideratione scribendum suscepisse ; post Eugenio ipso suafore , atque impulsore , produxisse , & confecisse . Ast alterum etiam accedit : Bernardus tam prudens , quam qui maxime , intellexit ipse per se , opus istuc aliquatenus contentiosum non omnibus carum futurum peræque ac Eugenio . Idcirco delicatos occupavit Lectores , simulque sese purgavit paucis hisce quidem , sed plenis , & significantibus verbis . *Monebo te proinde non ut Magister , sed ut Mater : plane ut amans . Amens magis videar , sed ei qui non amat , ei qui vim non sentit amoris .* Instet quis cum ipso eodem Bernardo Epist. 395. ad Alvisum Atreb. Episc. *Non sic de caritate præsumendum , ut non etiam Sacerdotali Cathedra deferatur .* Sed frustra , nemo siquidem unus fuit qui tantum Summo Sacerdoti deferret , quantum in hisce iisdem libris de Consideratione

detulit Sanctus Bernardus in cap. præsertim 8. lib. 2. quod ita exorditur. *Age indagemus adhuc diligentius quis sis (Eugenium alloquitur) quam geras videlicet pro tempore personam in Ecclesia Dei. Quis es? Sacerdos Magnus, Summus Pontifex. Tu princeps Episcoporum, Tu hæres Apostolorum, Tu primatu Abel, gubernatu Noe, Patriarchatu Abraham, ordine Melchisedech, dignitate Aaron, auctoritate Moyses, iudicatu Samuel, potestate Petrus, unctione Christus. Sunt quidem & alii Cæli Ianitores, & gregum Pastores: sed Tu tanto gloriosius, quanto & differentius præ ceteris nomen hæreditasti. Habent illi sibi assignatos greges, singuli singulos, tibi universi crediti, uni unus. Non modo ovium, sed & Pastorum. Tu unus omnium Pastor. Siccine tantundem detulit Stephano Firmilianus? Tum fortasse, cum inquit. Indignor ad hanc tam apertam, & manifestam Stephani stultitiam, qui sic de Episcopatus sui loco gloriatur, & se successionem Petri tenere contendit Stephanus, qui per successionem, Cathedram Petri habere se prædicat. Non semel vehementer sum stomachatus, audiens nonnullos, ceteroquin eruditos, uno & altero horum librorum capite abutentes perinde ac si disciplinæ remissio Cathedræ potestatem infringeret, quibus merito Cyprianus irridet de Cardin. Oper. Christi agens de Baptismo. Scribæ (inquit) & Pharisei in Cathedra Moysi sedentes, dum agunt quæ ad Cathedram pertinent per omnia plenitudine potestatis utuntur, & officium, non vita tantis effectibus honoratur.*

Obe.

Obediunt Dæmones Exorcistis : Cbristum , inquit scimus , & Paullum novimus , & in nomine Cbristi , quem Paullus prædicat , adjurati egredimur , vos autem penitus ignoramus . Ecce in nomine suo nihil quæstuarii peragunt exorcistæ , nec se eis deferre ipsi Dæmones profitentur , sed nomen Cbristi etiam per lucrorum sectatores suæ gloriæ retinet potestatem . Discant porro delicatuli isti , qui vitium cum Persona , & mores cum dignitate confundunt ex Tacito lib. 4. Histor. Quomodo sterilitatem , aut nimios imbres , & cetera naturæ mala , ita luxum , vel avaritiam Dominatum tollere . Vitia erunt donec homines , sed neque hæc continua , & meliorum interventu pensantur . Ceterum ad Bernardum quod attinet , Nicolaus Faber in Epist. ad Gerardum Vossium , qui hos libros de Consideratione Romæ seorsim edidit , & Clementi VIII. nuncupavit , affirmat Auctorem Bernardo fere æqualem eos appellasse Deutoronomium Summorum Pontificum . Et quidem auspicato , nam ex monito Johannis Horstii ad Lectorem post Eugenium III. familiarissime iisdem libris usi sunt Nicolaus V. Pius V. Gregorius XIII. Urbanus VII. Gregorius XIV. & Clemens VIII.

Nec majus Firmiliano præsidium affertur per Apologiam ad Abbatem Guillelmum , quandoquidem Bernardus ipse sese purgaverit in sex prioribus capitibus , sed plane egregie in fine Cap. VII. Nostros (inquit) de quibus conquesti estis , quod ordini vestro detraberent , satis quantum potui stilo corripui ; & me quoque ab hujusmodi falsa

spicione purgavi, ut debui. Sed quoniam dum nostris minime parco, nonnullis de vestris nimium, in quibus non decet, videor assentire, pauca quæ, & vobis displicere cognovi, & omnibus bonis vitanda esse non dubito, necessarium reor subjungere: quæ quidem etsi fieri videntur in ordine, absit tamen ut sint de ordine. Nullus quippe ordo quidpiam recipit inordinatum: quod vero inordinatum est ordo non est. Unde non adversum ordinem, sed pro ordine disputare putandus ero, si non ordinem in hominibus, sed hominum vitia reprebendo. Et quidem diligentibus ordinem in hac re molestum me fore non timeo: quin immo gratum procul dubio accepturi sunt, si persequimur quod, & ipsi oderunt. Si quibus vero displicuerit; ipsi se manifestant, quia ordinem non diligunt, cujus utique corruptionem, idest vitia damnari nolunt. Ipsi itaque illud Gregorianum respondeo. Melius est ut scandalum oriatur, quam veritas relinquatur. Et in fine Cap. XIII. Quæ in vestris laudabilia sunt laudo, & prædico: si quæ reprebendenda sunt, ut emendentur, vobis & aliis amicis meis suadere soleo. Hæc non est detractio, sed attractio. In hoc primo refutando argumento paullo diutius, quam in reliquis sum immoratus; quod animadverti: Cypriani Adnotatores, cereroquin doctissimos, in notis ad hanc ipsam Firmiliani Epistolam, id solum enixe conari, ut probent: talem, ac tantam dicacitatem non officere Firmiliani Sanctitati. Officiat vero nec ne, eorum judicium esto, qui nullo studio partium abepti mea, mihi que adversan-

santium dicta eadem trutina pensarint. De Epistola Cypriani ad Pompejum non est hic differendi locus; sed institutum est alterius dissertationis. Etenim cum in eodem argumento, eodemque fere stilo versetur ac Epistola Firmiliani, eadem prorsus censura expendenda est.

Tertium argumentum suppeditat Baluzius in notis ad ea verba *Pseudo-Christum, Pseudo-Propheetam, dolosum operarium*. Ad quæ Christianus Lupus in librum Tertulliani de præscriptionibus, mentem appellens, dubitare se ait in Scholiis suis an Epistola Firmiliani sit vera. *Tamen*, subnectit Baluzius, *nemo hætenus ante Lupum id sibi sumsit, ut dicere auderet eam esse falsam, aut de ejus auctoritate dubicaret. Et certe ista facilitas accusandi falsitatis scripta veterum Patrum valde temeraria est, & periculosa. Nam si cuique liceat inanes ejusmodi conjecturas sequi, nullum erit antiquitatis monumentum, quod iniquas suspiciones effugiat.* Hæc Baluzius.

Quæ Baluzii animadversio proba quidem est; sed importune pronunciata. Etenim ex Christiani Lupi dubitatione non minuantur suspicandi causæ, sed augentur. Lupus namque, ut si quis alius Ecclesiasticarum rerum peritissimus, obtrita tantum verba suspicatus fuit, an hæc Epistola Firmiliani sit vera, quam Epistolam obiter tantum percurrerat; quanto magis dubitasset, si sedulo, & ex instituto illam evoluisset? veluti nos evoluimus. Propterea nec quisquam ante Lupum id sibi sumsit, ut falsam demonstraret. Ego ve-

ro, si per Baluzium licet, mihi sumfi, ut illam falsam esse, dicerem, probaremque. Num ego audacior quam ceteri? at tanto omnium justior, quod non secutus sum leves conjecturas; si tamen levia dicenda sunt, Pontificem Romanum ab Episcopo Catholico, & Sancto appellari imperitum, animosum, apostatam, schismaticum, hæreticum, hæreticis peiorem, pseudo-Christum, pseudo-Apostolum, dolosum operarium. Leves ne erunt conjecturæ tot mendaciorum cumulus; tot, tantorumque Scriptorum silentium tantum; Tot demum pronuntiata, quorum quæ piæ aures offendunt, quæ probos mores inficiunt, quæ schismati favent, quæ plane schismatica, quæ sapiunt hæresim, quæ veluti hæretica damnata. Si hæc levia habenda sint, quid tandem grave Baluzio esse potest? Verum si quæ nos coniecimus a Baluzio perlegerentur, forte fortuna, non adeo levia, nisi me valde amo, a viro doctissimo censerentur existimo; præsertim cum videam plurima veterum Patrum monimenta, quæ jamdudum Majoribus nostris vera, & nativa visa sunt, ob unam, & alteram conjecturam, eamque non gravissimam ab eruditis viris veluti notha repudiari. Quorum nonnulli S. Cypriani librum ad Novatianum ad spuria rejiciunt ob duplicem hanc conjecturam. Primum, quod non *Novatianenses*, sed *Novatianos* eos appellarit, qui Novatiani partibus studebant. Deinde quod apocalypsim bis sub nomine Sancti Johannis, quater nullo Auctoris nomine adduxerit. Quas tamen conjecturas Tillemontius, nec

pror-

prorsus probat , sed nec plane damnat . An vero , quas de Firmiliani Epistola ipse protuli conjecturas nihilo plus istis pendendæ sint , non meum est judicare .

Quantum argumentum eo vergit , ut Baluzii sententiam confirmet , quod ut præstet consensionem præfert Adnotatorum , & Illustratorum Cypriani , Pamellii præsertim [ut reliquos bene multos prætermittam] Rigaltii , Fellii , Pearsonii , ipsius Baluzii , ac Tillemontii , qui omnes Firmiliani dicteria uno ore excusarunt , & in æstum disputationis traduxerunt ; a quorum opinione si quis recedat , verendum ei est , ne audacior habeatur aut confidentior quam ceteri .

Sed hoc effugium facile præcluditur . Tantam siquidem tantorum hominum consensionem appellare præstat , verius , quam Auctor Epistolæ ad Pompejum , *Vetustatem erroris* . Profecto satius fuisset , Cyprianicos Adnotatores , atque Editores Latinio cum Aldo consensisse , quominus hanc Epistolam evulgarent . Pamellius quidem Latinio aut major , aut suppar , falsus est , se illam fuisse omisurum , nisi jam pridem a Morellio edita foret . Baluzii vero , & Rigaltii auctoritas hoc loco me non nimium movet , quorum nonnihil intererat , has literas veras esse , atque vocari ; quorum etiam subdolus , & vaser animus nullo negotio dignosci potest in adnotationibus ad hanc ipsam Epistolam . Quid dicam de Fellio , ac Pearsonio hominibus etherodoxis , & in Sedem Apostolicam communi , & acerbissimo odio æstuantibus .

Con-

Congruenter hic, & apposite dicere lubet cum Augustino lib. de prædîstinat. SS. cap. 14. *Quid igitur opus est, ut eorum scrutemur opuscula, qui priusquam hæc disputatio oriretur non habuerunt necessitatem in hac difficili ad solvendum quæstione versari, quod procul dubio facerent, si respondere talibus cogerentur.* Et sane multum interest universa cuiuspiam Auctoris opera adnotes, an unicum monumentum excutias. Illud leviter, & per transennam, ut ajunt, percurritur, hoc circumspicte, & elaborate præstat. Sed & illud dicere juvabat: Rigaltium universam hanc Epistolam a Cypriano confictam esse non obscure, sed nec jure suspicatum fuisse, uti ex numero postremo Capitis I. Demum non illud nobis propositum est, ut hanc Epistolam rejiciamus ea dumtaxat ratione ducti, quod maledicus animus non bene cum Sanctitate conveniat; sed multa deinceps reliqua sunt argumenta, eademque nec levia, nec minora, ad quæ huic Epistolæ patrocinantibus omnino reponendum esset, tametsi ab illius Auctore maledici labem averterent.

Quod quinto loco opponitur per Baluzium eo gravius videri potest, quo magis obvium est. Succenset Baluzius Latinio, quod auctor fuerit, ne Firmiliani Epistola cuderetur in Aldiana editione, his verbis. *Neque propterea tenebris damnandum esse putassent illustre hoc antiquitatis monumentum, in quo sane bene multa sunt magni momenti, quibus bodie careremus cum grandi rerum nostrarum jactura, ut in simili argumento censuit Sirmondus edens*

edens in lucem libellum precum Marcellini, & Faustini adversus Papam Damasum.

Nunc cominus agendum; Tria siquidem in hac responsione vestiganda sunt, ut objectioni subseruiamus. Primum an illustre sit antiquitatis monumentum? Tum quænam sint hæc bene multa magni momenti? Post num impune, quin & laudabiliter vulgari potuerint? exemplo libelli precum Marcellini, & Faustini a Sirmondo editi. Principio igitur, quod Firmiliani Epistola illustre sit, per me licet, antiquitatis monumentum, id potius probat, non fuisse occultandum; at Firmiliani esse neutiquam probat. Fieri enim potuit, ejus Epistolæ confictorem multa de industria annexisse, quæ eorum temporum, quæ litteræ præferebant, antiquitati responderent. Eo etiam verosimilius, quo non ab aliis sane, quam a Donatistis, qui a Firmiliani ætate non longissime aberant, hæc Epistola confingi potuit. Ideo non est hic pluribus immorandum.

Quamobrem ad id, quod summum est, descendamus. Vide inquit, quæ, & quanta monumenta antiquitatis exciderent: de Eucharistia, quod est maximum in Ecclesia Catholica: de Conciliorum quotannis celebratione: de hæresi Cathaphrygum: de persecutione Maximini: de terræmotibus in Oriente: de Femina illa venetica, & pseudo-propheta: de Exorcistarum in Dæmones virtute: de pace perpetuo a Stephani Decessoribus cum Orientalibus servata: de Paschæ celebratione secus ab Romano ritu: de Asiorum

Y

lega.

legatione ad Romanam Sedem : de hæresi multiplici ; ac de aliis quibusdam , quæ sane ignorarentur , si hæc Epistola confictionis convinceretur . Verum enim vero , qui sic arguunt , imponunt : etenim ut eodem ordine reponamus . De veritate Corporis , & Sanguinis Domini in Eucharistia aperte , & pluribi agit Cyprianus [quidquid Fellus reclamet] præcipue Epist. X. ad Martyres , & Confessores . Epist. LIV. ad Cornelium . Epist. LXIII. ad Cæciliium . Epist. LXX. ad Januarium , & libro de lapsis . De Conciliorum quotannis celebratione divinatio est Rigaltii , cui non minus , quam illi ad stipulantibus repugnat tam modicus Synodorum numerus .

Pro hæresi Cataphrygum non opus est confugere ad Firmiliani Epistolam ? Ecquæ unquam hæresis bone Deus , a pluribus , majoribusque Patribus pertractata est ? III. Ecclesiæ saculo ab Irenæo , a Tertulliano , a Clemente Alexandrino , & ab Origene . IV. vero a Concilio Nicæno , ab Eusebio præsertim , ab Hilario Pictaviensi , ab Athanasio , a Basilio , & a Philastrio . V. item retractarunt S. Epiphanius , Hieronymus , Augustinus , Isidorus Pelusiota , Socrates , & Sozomenus , Cyrillus , ac Theodoretus . Persecutionis Maximini meminit Euseb. l. 6. cap. 21. qui ibidem perhibet , Origenem occasione tam diræ tempestatis librum scripsisse de martyrio . Terremotus in Oriente ingentes fuisse refert Origenes in Johan. Feminae veneficæ factum , quod uti præcipuum exscriptum fuit a Tillemontio , cum Prisca , & Maximilla confundi , quantum conjectura assequi

potui, superius adnotavi. Exorcistarum in daemones virtutem diserte tradit Cyprianus contra Demetrianum. An ante Stephanum Romani Pontifices pacem cum Orientalibus perpetuo custodierint, actum est cap. superiori num. X. In iisdem notis abunde egimus de Quartadecimanis, de Afrorum legatione, & de multiplici priorum temporum hæresi, quæ nil quicquam proficere suppositæ Epistolæ, sed officere magis ostensum est. Quorsum ergo necessaria hæc Epistola ad servanda antiquitatis monumenta? Annon multo plura, & quidem inconcussæ fidei præstat substituere ad ea ipsa, quæ laudantur, confirmanda?

Quod postremo loco adducitur Sirmondi exemplum in editione libelli precum Marcellini, & Faustini adversus *Damasum*, quid conferre possit ad veritatem Firmilianicæ Epistolæ plane non video. Aliud quippe est, non fuisse occultandum tam illustre antiquitatis monumentum, atque item aliud hoc monumentum ejus esse, cujus esse perhibetur. Primum lubenti animo admittimus; alterum negamus de Firmiliano, dubitamus de Marcellino, & Faustino. Poterat itaque Firmiliani Epistola excudi, sed inter spuria; sin minus inter dubia connumerari.

Sextum argumentum invehitur in eas rationes, quibus Cap. I. coniecimus, nec ante Nicænum in Oriente, nec ante Donatum in Africa controversiam de Anabaptismo pertractatam fuisse. Nam Firmilianum ab Origene instructum, & Cyprianum a Tertulliani libris edoctum satis compertum

est. Ex quo illud ut minimum consequitur: vere ante Firmiliani, & Cypriani tempora apud Orientales, & Afros hoc Rebaptizantium dissidium extitisse.

Sed neque hoc argumentum tanti est, ut meam sententiam Cap. I. constitutam, ac demonstratam, nonnihil dejiciat. Etenim si quis Origeni Anabaptismum affingit, veluti quispiam mihi videtur affingere, (nisi me hæc scribentem memoria fallit,) non id certo quodam monumento astringit, sed suspitione tantum attingit; nimirum ex Firmiliani contubernio, quo Origenes aliquando usus est. Ceterum si ejus opera excutiantur, quemadmodum Huetius omnium diligentissime excussit, nihil tale deprehenditur. Huetius inquam lib. 2. Origenianorum cap. 2, quod in quæstiones quatuordecim partitur, singulos Origenis errores expendit; quæstione item 14. quæstiunculas aliquas quasi per saturationem complectitur; at neutrubi anabaptismum commemorat; qui tamen si apud Origenem deprehenderetur, non statim Firmiliano prudenter communicaretur; quandoquidem neque ab ipsis Orientalium anabaptismi ante Nicænum Assertoribus expresse adscribitur hic error Dionysio Alexandrino, præcipuo Origenis discipulo, quem iccirco Anomazorum Parentem appellat S. Basilus. Epist. 41. & Arianismi fontem Gennadius lib. 2. de Dogmat. cap. 2. quibus tamen criminationibus vendicant Dionysium Athanasius, ac Hieronymus. Præterea multa occurrunt in Origenis lectione hæc falsa, illa suspecta, quæ Rufini perfidie adjudicanda sunt: non pauca item Origenis

no-

nomine circumferuntur, quæ verius Origenistis sunt assignanda. Ad Tertullianum quod attinet, non abest ab injuria eorum opinatio, qui quod Cyprianus Tertulliani libris sit delectatus, Anabaptismum ab istiusmodi lectione hausisse autumant, ut propemodum existimandum sit: SS. Cyprianum, nedum Anabaptismum, sed & Montanismum ex Tertulliano fuisse; quando hæc una Tertulliano oblata est causa, cur Anabaptismo consenserit, quod in Montani partem abjerit. Nam Philastrius de Montanistarum erroribus agens, refert: Montanistas in Oriente rebaptizare consuevisse. Hinc duplex eruitur consecutio. Primum, Tertulliani sententiam de baptismo iterando Montanistarum figmentis fuisse accomodatam; cujus conniventia magno est argumento ea Tertulliani protestatio de Bapt. cap. 14. *Sed de isto (inquit) plenius jam nobis in græco digestum est.* Quæ autem causa Tertulliano subesse potuit, cur græcum commentarium Homo Latinus ederet pro Anabaptismo? nisi ut Cataphrygum sententiam de iterando baptismo a Græcis Catholicis oppugnatam græco sermone oppugnaret. Quum vero exploratum sit, Firmilianum; atque Helenum, ceterosque Græcos Antistites uno, & altero Concilio Cataphrygum hæreses condemnasse, quis id sibi serio persuadeat? omnes illos Orientis Episcopos Firmilianum præsertim, atque Helenum huic errori Cataphrygum adhæsisse. Quid quod Montanistæ Tertulliani opem usque ab Africa implorarunt? si Orientalis Antistites, iidemque illustriores, atque

doctiores eorum causæ patrocinebantur. Quid quod Tertullianus commentarium suum græce conscripsit? nisi ut cum Græcis Anabaptismo adversantibus disceptaret. Hinc alterum necessario consequitur: Romanis Pontificibus, Patribusque Orientalibus, si qua illis fuit in Oriente super baptismo contentio, non cum aliis sane fuisse, quam cum Montanistis, Philastrio perhibente, ac Tertulliano ipso indicante.

Postremum pro hujus Epistolæ veritate argumentum suppeditat ipse idem Baluzius, ait namque in suis notis. *Epistola Firmiliani inventa est in viginti sex Codicibus MS.*

Vere Baluzius nil sibi reliqui fecit, quo hanc Epistolam ut verum Firmiliani opus erudit obtruderet. Epistola Firmiliani inventa est in vigintisex Codicibus MS. Quid postea? num ideo vere a Firmiliano conscripta erit? Quæ est hæc consecutio? An Baluzium virum emunctæ naris præterire potuit, hanc conjecturam esse omnium levissimam? Quandoquidem plurima tum Augustini, tum Cypriani, ceterorumque Patrum nomine primitus circumferebantur, quæ tamen hoc tempore communi eruditorum calculo inter nothæ, & apocryphæ recensentur, tametsi in sexcentis Codicibus MS. deprehendantur, immo & in excusis, atque recusis. Præterea non nihil miror, Erasimum, qui tot MS. Cypriani Codices versavit, Codicem ne quidem unum offendisse, in quo tam jactatam Epistolam comperiret.

Laus

Laus Deo , ac Deiparæ Virgini Beatissimæ ; nec non Sanctæ Teresæ , meæ apud Deum Patrem principi , & certissimæ Patronæ , in cujus festo die absoluta est hæc Dissertatio .

NOI REFORMATORI

DELLO STUDIO DI PADOVA.

A Vendo veduto per la Fede di Revisione, ed Approbazione del P. Fra Tomaso Maria Gennari Inquisitore, nel Libro intitolato : *In Epistolam S. Firmiliani Cesareæ Cappadocum Episcopi ad S. Cyprianum &c. Dissertatio F. Raymundi Missori Franciscani Conventualis*, non v'esser cos'alcuna contro la Santa Fede Cattolica, e parimente per Attestato del Segretario Nostro, niente contro Principi, e buoni costumi; concedemo Licenza a *Francesco Pitteri Stampatore*, che possi esser stampato, osservando gl'ordini in materia di Stampe, e presentando le solite copie alle Pubbliche Librerie di Venezia, e di Padova.

Dat. 27. Nov. 1732.

- [Gio: Francesco Morosini Cav. Ref.
- [Alvise Pisani Cav. Proc. Ref.
- [Pietro Grimani Cav. Proc. Ref.

Agostin Gadaldini Segr.